

U Bulungana u Niga tere Iesu Kristo te kolotein e MATIU

*A man solo turu tubuna e Iesu Kristo
(Luk 3:23-38)*

¹ Nonei teka u tubur e Iesu Kristo. E Iesu e tubunen e Devit, na e Devit a hatutubunei tere Abraham.

² E Abraham e hatuhanei e Aisak. Ne Aisak e hatuhanei e Jekop. E Jekop e hatuhaner ere Juda mera u toulanen.

³ Ne Juda e hatuhaner ere Peres mere Sira. E tsinaren e Tamar. Ne Peres e hatuhanei e Hesron. Ne Hesron e hatuhanei e Ram.

⁴ Ne Ram e hatuhanei e Aminadap. Ne Aminadap e hatuhanei e Nason. Ne Nason e hatuhanei e Salmon.

⁵ Ne Salmon e hatuhanei e Boas. E tsinana e Boas e Rehap. Ne Boas e hatuhanei e Obet. E tsinana e Obet e Rut. Ne Obet e hatuhanei e Jesi.

⁶ Ne Jesi e hatuhanei e Devit a king.

Ne Devit e hatuhanei e Solomon. E tsinana e Solomon a tahol tere Uraia.

⁷ Ne Solomon e hatuhanei e Rehaboam. Ne Rehaboam e hatuhanei e Abitsa. Ne Abitsa e hatuhanei e Asa.

⁸ Ne Asa e hatuhanei e Jihosapat. Ne Jihosapat e hatuhanei e Joram. Ne Joram e hatuhanei e Usaia.

- 9 Ne Usaia e hatuhanei e Jotam. Ne Jotam e hatuhanei e Ahas. Ne Ahas e hatuhanei e Hesekia.
- 10 Ne Hesekia e hatuhanei e Manase. Ne Manase e hatuhanei e Amon. Ne Amon e hatuhanei e Josaia.
- 11 Ne Josaia e hatuhaner ere Jekonaia mera u toulanen. Na tara pöata teka a tei Israel i lu meralei i Babilon, tina karabusien.
- 12 Nori i lu meralei i Babilon, be Jekonaia ena hatuhanena e Sieltiel. Be Sieltiel e hatuhanena e Serubabel.
- 13 Be Serubabel e hatuhanena e Abiut. Be Abiut e hatuhanena e Eliakim. Be Eliakim e hatuhanena e Asor.
- 14 Be Asor e hatuhanena e Sedok. Be Sedok e hatuhanena e Akim. Be Akim e hatuhanena e Eliut.
- 15 Be Eliut e hatuhanena e Eliasa. Be Eliasa e hatuhanena e Matan. Be Matan e hatuhanena e Jekop.
- 16 Be Jekop e hatuhanena e Josep a tson tere Maria. E Maria te posei e Iesu, te ngö haseri e Kristo e Mesaia.
- 17 E markato uana teka, a man mun tamana hoboto ti taniama tere Abraham batemi noa ria tere Devit, nori i antunaia turu töa u maloto na tohats tara man mun tamana. Ba man mun tamana te taniama tere Devit batemi noana tara pöata ti lu mera leien i Babilon, u töa u maloto na tohats u mun tamana noahas. Na man mun tamana te taniama tara pöata ti lu mera leien i Babilon batemi noana tara pöata te butuia e Mesaia, nori u töa u maloto na tohats noahas u mun tamana.

*E Maria e posei e Iesu Kristo
(Luk 2:17)*

¹⁸ E Iesu Kristo i mar posa menai teka. E Maria i hopö kap bei tego tölo menaien e Josep. Kaba nori ima soho gono noai, be Maria e pikana turu Namnamei u Göagono. ¹⁹ E Josep a tson tere Maria e poei, e Maria e pikaia tara tana tson. Na nonei a katuun a matskö koru na nonei e raman hamatsingolein e Maria i matar u katuun tego markato uen teka, ba nonei e katsin la momous ba tuun nena e Maria. ²⁰ E Josep e hakhakats noa hasin a ka teka, ba töa angelo tara Tsunono e butuna i tanen turu sinasoho me poeiena, “O Josep, a hatutubunei tere Devit, alö goma matout ii tego lu menai lö e Maria a tahol i tamölö. Taraha, nonei e pikana turu Namnamei u Göagono. ²¹ Nonei e pose nou a pien tson, balö te ngöe moien e Iesu, e mar mouna uana teka, A Katuun a Hihitaguhu. Nonei e taguhu ranou u katuun i tanen bate luba nanou a man markato a man omi i taren.”

²²⁻²³ A mamanaka hoboto teka e butu sil koeiena tega kato hamana menaien u raranga te ranga naia a Tsunono tara töa propet i manasa. A propet e mar ranga uu teka: “Hengoiam! A tahol a kukubei tema soho gono noa menei ta tson e pika nou. Ba nonei te pose nou a pien tson, ba nori te ngöe roi a solonen e Emanuel.” A solo e Emanuel e mar mouna uana teka, “E Sunahan e ka gono mera noura.”

²⁴ Be Josep e tagulena ba nonei e kato tatatiena temar ranga menaien a angelo tara Tsunono me töleiena a tahol i tanen. ²⁵ Kaba nonei ema soho gono noa meien, e antunaia tara pöata tena poseia a tahol i tanen a pien tson. Ba e Josep e ngöe neien e Iesu.

2

U tson atei i lama i lehana temi tara menaien e Iesu

¹⁻² E Iesu i poseia i Betlehem i Judia tara pöata te king ia e Herot. Na tara pöata ti posa hakapeia e Iesu, ba palair u tson atei tara pala te butu nama a pitala e la uarima i Jerusalem memi rangatar, “Ime te kana a pien ti posa sile ii ega kingir u Jiu? Alam u tarema a pitopito i tanen tara makum te roron butu nama a pitala, ba lam e la sile muma tegomi hatsunono uu lam i tanen.”*

³ Pöata te hengo naia e King Herot u ranga teka, ba nonei e toku koruna. Na u katuun hobotor i Jerusalem i toku koru has. ⁴ Be Herot e ngö gögono hoboto rena u pris pan, na u tson hihatutsura tara Lo† me rangata ranen, “Ime tegi poseia e Mesaia, a katuun te hopö kapiin e Sunahan?”

⁵ Ba nori e hateieren, “Tara taun i Betlehem i Judia, temar koloto has uu a propet i manasa:

⁶ ‘Alimiuu u katunura i Betlehem, turu tsiktsikina i Judia,

alimiuu e ka tala memou a solo a kapan i gusuna a pal tsunono i Judia.

Taraha, a töa tsunono pan e butuna romana i Betlehem,

ba nonei te tarakap ranou u katuun i tar a tei Israel.’ ”

⁷ Be Herot e ngö momous tuun rena u tson atei. Ba nonei e rangrangata raneien a saha pöata te butuia a pitopito teka. ⁸ Ba nonei e tula mera neien i Betlehem tegina sake menaien nonei a pien teka.

* **2:1-2:** A pitopito e harötein a king e poselila. † **2:4:** A Lo tere Mosis.

“Pöata te sabie mumen romana limiou, ba limiou temi hatei poutse moulia. Ba lia tena hatsunono hase gouen.”

⁹ Ba nori e hengoer u raranga tere king ba nori e lar. Na pitopito ti röto mam me len tara pala te roron butu nama a pitala e mam raien, mena ka hamatianan töana tara makum te kaia a pien.

¹⁰ Ba nori e tareier a pitopito me sasaala korur.

¹¹ Ba nori e tasur iahana luma te kaia a pien na e tsinanan e Maria, mena hatukunur me hatsunono uar tara pien. Ba nori e kalater a man pora i taren me luer a manka a man niga me halerien a pien: a goul na u insens te haatser bate soka hamasi hanigan töana, na u uapi u soksoka.

¹² Nori i hakopis pouts uala i han i taren me sila lila tara tana maroro. Taraha, turu sinasoho i taren e Sunahan e ranga meraien, nori gima tatei la pouts uai tere Herot.

E Josep mere Maria na e Iesu i la uu i Itsip

¹³ Pöata ti la hakapaia u tson atei, ba töa angelo tara Tsunono e butuna turu sinasoho tere Josep me poeiena i tanen, “Alö go takei ba lö te lu rem u mun tsinana, ba limiou te bus uamiou tara han i Itsip. Ba limiou tena ka möa i Itsip e antunana tara pöata te ranga lel goa lia i tamölö. Taraha, e King Herot e sake la nanou a pien bate atung hamatie nouen.”

¹⁴ Be Josep e takei noa mena a bong me lu rena u mun tsinana ba nori e la uar i Itsip. ¹⁵ Ba nori ena ka ria i Itsip e antunaia tara pöata tega mateia e Herot. A ka teka e butu sil tego kato hamana menaien u raranga te ranga naia a Tsunono tara

propet i manasa: “Alia u ngö ba namei a pien tson i tar a han i Itsip.”

E Herot e rangein tegi atung hamate merai a galapien tson

¹⁶ Pöata te atei sil hamanaseia e Herot u tson atei tara pala te roron butu nama a pitala i gamoeien, ba torinen e raharaha koruna. Ba nonei e hala meranei u soldia i Betlehem, na tara man han i sukusuku, ba nori ena atung hamate rer a galapien tson hoboto ti kamei u huol u hiningal,[†] temar bobo uen tara pöata ti hateien u tson atei.

¹⁷ Nonei a mar maroro teka e hatara hamana nena u raranga te ranga naia e Sunahan tere propet Jeremaia. ¹⁸ Nonei e mar ranga uu teka, “A nitaatagi pan e butuna tara han i Rama.

U katuun e ku hapan koru mer te tabe hataatagi uaren.

E Retsel e tabe hataatagi sil koru reiena a galapien i tanen.

Na nonei ema ngilenei tegi hasokolei menaien.

Taraha, a galapien i tanen i mate hakapa nitöa.”

E Josep na u mun tsinana i la poutsuma

¹⁹ I murina te mate hakapaia e Herot, ba töa angelo tara Tsunono e butuna turu sinasoho tere Josep i Itsip. ²⁰ Ba nonei e poeiena, “Alö go takei, ba lö te lu rem u mun tsinana, ba limiou te la pouts miou tara han i Israel. A katuun te katsin atung hamati a pien e mate hakapa.” ²¹ Be Josep e takeina me lu rena u mun tsinana, ba nori e

[†] **2:16:** A ka teka e salo hoboto hasir a galapien ti kukutema i muriren.

la poutsur tara han i Israel. ²² Kaba e Josep e hengen te lu menai e Akelaus a makum tere tamanen e Herot, me king nena a provins i Judia. Be Josep e matout koruna. Na turu tana u sinasoho e Sunahan e hateien nonei goma la uai i Judia, ba nonei e la uana tara provins i Galili. ²³ Ba nonei ena kana tara töa taun te ngöeri i Nasaret. A ka teka e butu sil hasi tego hatara hamana menaien u raranga ti habulunganein u propet. Nori i mar ranga uu teka, “Nonei e ngöe roi a toun Nasaret.”

3

E Jon a Tsonun Baptais e habulunganein u raranga

(Mak 1:1-8, Luk 3:1-18, Jon 1:19-28)

¹ Nonei tara pöata teka* e Jon a Tsonun Baptais, e habulungana naia u raranga tere Sunahan tara makum a palaka i Judia. ² Ba nonei e poeiena, “Alimiou go palis ba naiam a man markato a man omi. A Nipepeito tere Sunahan e sukusuku hakapa.” ³ E Jon nonei a katuun te rangein e Aisaia a propet i manasa. Ba nonei e poeiena, “A töa katuun ena ku hapan noa romana tara makum a palaka bate poeiena, ‘Kato hamatsköeiam a maroro, a Tsonono e ngilin sila nama romana tara maroro a matskö.’ ”

⁴ E Jon e roron hasogi u hasobö ti katoei a huluna a kemol, bate pouseiena a lete. Na nonei e roron noui a köno na möröana. ⁵ Na tara pöata teka, u

* **3:1:** Tara pöata teka e Iesu e tetenei na tara kapakapa tere Matiu sapta 2. Nonei e kamei u topisa u maloto u hiningal tara tantania na sapta 3.

katunura i Jerusalem na tara man han hoboto tara provins i Judia na tara man han has i rehina a ramun i Jodan, i la hoboto uama tere Jon. ⁶ Ba nori e pokeier a man markato a man omi i taren, ba nonei e baptais ranen tara ramun i Jodan.

⁷ Be Jon e tara rena u Parasi† na u Sadiusi u parpara koru i la silema tegimi habaptais uen, ba nonei e poeiena i taren, “Alimiou u katunura tara kökötsi a omi, alimiou u katuun u gamogamo! Alimiou ema antunan bus ba namoi a raharaha tere Sunahan te butu nou! ⁸ Te hapolasa ba namia limiou a man markato a man omi i tamilimiou, bora hatara marei tala naiam a markato a niga, tu habirits ba menami limiou a man markato a man omi i tamilimiou. ⁹ Alimiou goma tatei mar hakats uami teka, ‘Alam e kamem e Abraham e tubumulam.’ Alia e hatei ragou limiou, e Sunahan e antunan katoe nei u hatu teka a hun haposa tere Abraham. E Sunahan ema antunan ngil pinopinoe nei a katuun te pala uana tere Abraham. E möa. E ngileiena a katuun te kato hanigana. ¹⁰ A nikö e ka hakapaia i mouna u ruei. A man ruei tema hua haniga ri e ngats ba rariou bate lapo ba raroa turu tula.

¹¹ “Alia e baptais ragi limiou u ramun tuun, e hatara nena alimiou u habirits ba hakapa naiam a man markato a man omi i tamilimiou. Kaba a katuun te la hamurimuri nama romana i tar e pan bala koru nanou lia. Nonei a tsunono pan, na lia a katuun papala koru ema antunan söata

† 3:7: U Parasi na u Sadiusi a huol a hun katuun turu Jiu ti tagala koru sil u lotu na man lo turu Jiu. Nori i hakats koruni a man lo pinopino, kaba nori i ma taatagi rai u katuun.

nagi u sendol i tanen. Nonei te baptais ranoui limiou u Namnamei u Göagono na u tula. ¹² Nonei e katsin kato hamanasena a toukuin hamou turu wit. Nonei e lu kaakata ranou u katuun u niga na u katuun u omi. Nonei e haka ranoa u katuun u niga tara han a niga, ba nonei te tsuga mera noi u katuun u omi turu tula tema antunan hoso nari.”

E Jon e baptaisi e Iesu

(Mak 1:9-11, Luk 3:21-22)

¹³ Na tara pöata teka e Iesu e la ba nema i Galili me la uana tara ramun i Jodan tegomi habaptais uen tere Jon. ¹⁴ Kaba e Jon e torohanan katoeien ego palis u hakats i tanen me poeiena, “Alia ego habaptaisia i tamölö, kaba lö e la noa has uamuma i tar? Alö e pan bala koru namou lia.”

¹⁵ Be Iesu e ranga palisenen me poeiena, “E noahasina alö go markato uu temar ranga uagu lia. Tara markato teka bara te kato hantunera a mamanaka a matskö te ngilena e Sunahan.” Be Jon e töa kukutiena temar ranga uu e Iesu. ¹⁶ Pöata lahas te baptais hakapeien e Iesu me takei sei nama i ramun, ba u kolö e takalatana, ba nonei e tarena u Namnamei tere Sunahan e koul heremei a apena te ngöeri a kulu, memi töna tere Iesu. ¹⁷ Ba u töa u raranga e butu nama i Kolö me poeiena, “Nonei a Pien Tson koru i tar. Alia e ngil korue gen, na lia e sasaala koru has megen.”

4

E Satan e torohani e Iesu

(Mak 1:12-13, Luk 4:1-13)

¹ Tara pöata teka u Namnamei tere Sunahan e peigi menai e Iesu tara makum a palaka tegona

torohana menaien e Satan. ² E Iesu ema nouei ta kannou e antunaia turu tohats u maloto u lan na u tohats u maloto a bong. Ba i murinen ba nonei e bes koruna. ³ Be Satan emi torohane nen me poeiena i tanen, “Tego Pien uu lö tere Sunahan, ba lö te rangam, bu hatu teka te palis uar tara beret.”

⁴ Kaba e Iesu e ranga palis uu i tanen me poeiena, “Turu Buku u Göagono tere Sunahan i koloto hasiin, ‘A beret peisa ema antunan hala nanei a nitöatöa tara katuun. E möa. A katuun te kukutiena a man raranga tere Sunahan nonei e luenou a nitöatöa.’ ”

⁵ Nonei e mar ranga uu teka, be Satan e lu mena neien tara taun i Jerusalem, mena hatuole nen iasa koru i pungana tara Luman Lotu Pan. ⁶ Ba nonei e poeiena tere Iesu, “Tego Pien uu lö tere Sunahan, ba lö te kurapa uam i puta. Taraha, turu Buku u Göagono i koloto hasiin, ‘E Sunahan e ranga mera nou u angelo i tanen tegi tara kap menaien lö.

Na nori e pile sei nariou lö,

ba u hatu tema tatei toke roi a mou mölö.’ ”

⁷ Be Iesu e ranga menen me poeiena, “Turu Buku u Göagono i koloto hasiin, ‘Alö goma torohanei a Tsunono. Nonei e Sunahan i tamölö.’ ”

⁸ Be Satan e lu mena neien turu töa u pokus iasa koru. Ba nonei e haröte neien a man han hoboto i puta na mamana a niga i taren. ⁹ Be Satan e poeiena tere Iesu, “Te hatukun moa lö bate hatsunono uaiem i tar, ba lia te hale goi lö a mamana han hoboto teka.” ¹⁰ Be Iesu e ranga menen me poeiena, “Satan, alö go laba naiou lia! Turu Buku u Göagono i koloto hasiin, ‘Alö go hatsunono uu tere Sunahan. Nonei puku a töa a Tsunono i

tamölö tego kukuti lö.’ ” ¹¹ Be Satan e laba nanen. Ba u angelo e la rima memi taguheier e Iesu.

*E Iesu e hatanieia a toukui i tanen i Galili
(Mak 1:14-15, Luk 4:14-15)*

¹² Pöata te hengo naia e Iesu u raranga ti haka menai e Jon tara karabus, ba nonei e lana i Galili.

¹³ Ba nonei e laba nena i Nasaret mena kana tara taun i Kapenium i rehina a Ramun a Perperere i Galili. * I Kapenium e kaia tara pala turu Sebulun na u Naptali, a huol a pala turu Jiu. ¹⁴ A ka teka e butu sil tega kato hamana menaien u raranga te ranga naia e Sunahan tere propet Aisaia i manasa.

¹⁵ Ba nonei e poeiena,

“U katunura turu tsiktsiki i Sebulun na turu tsiktsikina i Naptali,

te ka ria tara maroro pan te la uana i tasi na turu tsiktsiki te kana i hapalana ramun i Jodan,

na turu tsiktsikina i Galili te ka has ria u katuun tema Jiu ri.

¹⁶ U katuun ti kaia turu kuhil,

nori i tara hakapi u ualesala pan!

Na pala ti kaia turu tsiktsiki turu kuhilina tara tou mate,

u ualesala pan e alesala uanou i taren.”

¹⁷ Nonei tara pöata teka, e Iesu e tanian habulunganein a man raranga i tanen ba e poeiena, “Alimiou go palis ba naiam a man markato a man omi! Taraha, a Nipepeito tere Sunahan e sulusuku hakapa.”

* **4:13:** A Ramun a Perperere i Galili e pan koruna. A ningahangaha i tanen e antunana tara 21 kilomita, na nitataabala i tanen e antunana tara 10 kilomita.

*E Iesu e ngör u katunun tsitsilo tutuun
(Mak 1:16-20, Luk 5:1-11)*

¹⁸ Pöata te tataalaia e Iesu i kotalana tara Ramun a Perperere i Galili, ba nonei e tareiena e Saimon ti ngö hase ii e Pita na e toulanen e Endru, bate hagala ria i ramun, taraha nori u katunun hagala. Nori i holei a kannou i taren a iena. ¹⁹ Be Iesu e poeiena i taren, “La gono memu moulia, ba lia te hatuts ragoui limiou temar soho merari u katuun.”† ²⁰ Ba nori e laba ner u abe i taren, me kukuteier e Iesu.

²¹ Ba nonei e gamon la lenina me tarena u taina u mun toulana ere Jemis mere Jon, a galapien tere Sebedi. Nori i kaia tara tolaala‡ i taren bate sugeier a man abe i taren, ba nonei e ngö ranen egi la gono meien. ²² Ba nori e laba ner e tamaren na tolaala na u tsonun kui. Ba nori a huol e la gono meier e Iesu.

*E Iesu e hihatutsia turu katuun me kato haniga pouts ranen
(Luk 6:17-19)*

²³ E Iesu e hula laia tara man han hoboto i Galili, me hihatutsna tara man luman lotu turu Jiu. Nonei e hihatutsin u Bulungana u Niga tara Nipepeito tere Sunahan bate kato haniga pouts has raiena u katuun ti ka mei a mamana mar siki. ²⁴ Ba u katunura tara mamana han hoboto tara provins i Siria e hengo ner a toukui na u hihatuts te katoe e Iesu. Ba nori e la merarima u katuun

† **4:19:** E Iesu e ngilin hatutsir u katunun tsitsilo i tanen tego lu merameien u katuun i tanen ba nori te katunun tsitsilo has uariou i tanen. ‡ **4:21:** A tolaala a tetenei teka i katoeia a kaan hagala. E antunan hosei a maloto na tolima tsi u huol u maloto tara katuun.

hoboto ti ka mei a mamana mar siki, u katuun ti sagohi a mamana mar kamits, na u katuun u popolöana, nu katuun u kotskotsibong, nu katuun u matekata. E Iesu e kato haniga hoboto pouts raien. ²⁵ Bu katuun u parpara koru e kukutier e Iesu: u katunura i Galili na i Dikapolis na i Jerusalem na i Judia na turu tsiksiki i hapalana a ramun i Jodan.

5

E Iesu e hihatutsia turu pokus

¹⁻² A pöata te tareia e Iesu u katuun u parpara koru i gonoma, ba nonei e sei uana iasa turu pokus, me gumuna ba u katunun tsitsilo i tanen e larima, ba nonei e tania hihatutsna i taren.

A nisasaala hamana (Luk 6:20-23)

³ Ba nonei e poeiena,
“U katuun te kato hateteneier a peisaren egi sasaala.

E Sunahan e ngö raneien u katunun sasaala,
taraha a Nipepeito tere Sunahan e ka uana i taren.

⁴ Na u katuun te taatagir egi sasaala.

E Sunahan e ngö raneien u katunun sasaala,
taraha nonei e kato hagogaha poutse nou a nitaatagi i taren.

⁵ Na u katuun te kakamotor batema tatei raharahari egi sasaala.

E Sunahan e ngö raneien u katunun sasaala,
taraha nori e lue riou a han i puta.

⁶ Na u katuun te ngil korueier a markato te matsköna i matana e Sunahan egi sasaala.

Nori e here rari u katuun te besir na te maka siler a ka a niga.

E Sunahan e ngö ranoien u katunun sasaala, taraha nori e masul riou.

⁷ Na u katuun te taatagi rer a palair u katuun egi sasaala.

E Sunahan e ngö ranoien u katunun sasaala, taraha nonei e taatagi has ranoien.

⁸ Na u katuun a toriren te gogosona egi sasaala.

E Sunahan e ngö ranoien u katunun sasaala, taraha nori ena tare roien.

⁹ Na u katuun te nolo pouts rer a pala te hiaraharahar egi sasaala.

E Sunahan e ngö ranoien u katunun sasaala, taraha nonei e ngö has ranoien romana a galapien i tanen.

¹⁰ Na u katuun te kato hamatskö ria i matana e Sunahan
ba palair u katuun te kato homi raren egi sasaala.

E Sunahan e ngö ranoien u katunun sasaala, taraha a Nipepeito tere Sunahan e ka uana i taren.

¹¹ “Alimiou te ka uamiou tara pala i tar, ba nori te ranga hohomi rariou limiou, bate kato hohomi rariou limiou, bate saka rari limiou u mamana u mar ranga u gamo, alimiou e tatei sasaala noahas miou. ¹² Alimiou go sasaala koruiam, taraha alimiou ena lue mou u hamatana pan koru i Kolö. Nonei ti markato hohomi has merai u propet ti ka i manasa.”

*U sol na u ualesala
(Mak 9:50, Luk 14:34-35)*

¹³ E Iesu e ranga lel me poeiena, “Alimiou e here rami u soluna i puta. Kaba te tia banena u sol a nimal i tanen, e möa len ta maroro tegi markato menaien bate mal poutsina.* E gi ba lasiin ba u katuun te tötö ria i oulunen.

¹⁴ “Alimiou e here hasemi u ualesala tara mana makum. Na taun te kana i ouluna u pokus ema antunan hamous nari. ¹⁵ Na u katuun ema ron hakuluperi u lam bate kopo kap narien a sosopene. E möa. Nori e haka seie rien tara makumun gungum turu lam bate alesala uana turu katuun hoboto te ka ria iahana luma. ¹⁶ Na u ualesala i tamilimiou ega kato has uu iesana bate alesala uana turu katuun. Ba nori te tare riou a markato a niga i tamilimiou bate soloseier e Tamamilimiou i Kolö.”

U hihatuts tara man Lo tere Mosis

¹⁷ E Iesu e ranga me poeiena, “Alimiou goma poeiami alia u la silema tegomi luba menai a man Lo tere Mosis na u raranga turu propet. E möa. Alia u la silema tegomi kato hamouna koru menaien. ¹⁸ Na lia e hatei hamana ragou limiou, u kolö na u puta e tatei kapa nou, kaba e möa ta tsi töa ta tsi makumun raranga tega tia iou tara man Lo, e antunana tara pöata te butu hakapa noa a mamanaka. ¹⁹ Ba katuun te hipus nena a tsi tabubun makumun raranga tara man Lo bate las rena a palai egi markato has uu te markato uanen, nonei e katuun papala koru noa tara Nipepeito tere Sunahan. Kaba a katuun te hengoena a man raranga tere Sunahan, bate hatuts rena a

* **5:13:** U sol hamana, a nimal i tanen ema tatei tiane, kaba u sol gamogamo a nimal i tanen e tatei tiana.

palai egi markato has uu te markato uanen, nonei ena katuun pan noa tara Nipepeito tere Sunahan. ²⁰ Alia e hatei ragou limiou, te ngilin tasu mia limiou tara Nipepeito tere Sunahan, alimiou ego kukute hanigeiam u raranga i tanen, kaba te kukute mia limiou a markato turu tson hihatuts tara Lo na turu Parasi, alimiou ema antunan tasu moi tara Nipepeito tere Sunahan.”

U hihatutsina tara hiaraharaha

²¹ Be Iesu e ranga lenina me poeiena, “Alimiou u hengo hakapa naiam u raranga ti hengoan u tuburara i manasa te poeiena, ‘Alö goma hhipuli ii. A katuun te hhipulina e la uanou turu kout.’

²² Kaba alia e hatei ragou limiou, te raharahe mia lö e toulamölö, alö e la mou turu kout. Na te ranga hohomi kuru namia lö e toulamölö, alö e la uamou turu kout pan. Na katuun te ngöe nei e toulanen a momolö ena mots lauana turu tulana i hel. ²³⁻²⁴ Kaba te katsin hatsunono mialö tere Sunahan balö te hakats sabe nem e toulamölö e raharahe noulö, kopis pouts uu i tanen balö tena ranga haniga pouts bumia tere toulamölö. Ba lö tena töan hatsunono uamou tere Sunahan.

²⁵ “Na tego katsin kout naia lö ta katuun, balö te ranga haniga pouts boroboro mia i tanen i mamuna tena butu möa limiou turu kout. Te moa talanen, ba nonei te kout nana lö tara tsonun hahamou, ba tsonun hahamou te hala menanoi lö tara polis, ba polis tena hake noa lö tara karabus.

²⁶ Na lia e hatei hamana korue goulö, alö ema antunan halakase roi tara karabus e antunana te hole moa lö u kout.”

U hihatutsina tara tou tsikolo

²⁷ Be Iesu e ranga lenina me poeiena, “Alimiou u hengo hakapa naiam u raranga te poeiena, ‘Alimiou goma tsikolomi.’ ²⁸ Kaba alia e hatei ragou limiou, a tson te tara uana tara tahol bate ka mena u hakats u omi i torinen, nonei e kato hakape lala a markato a omi. ²⁹ Tega kato homieia a pal mata tara pal matou i tamölö, balö te hasemen bate ba namen! Taraha, ema niga korunei tegi lapo ba mei u tuenrei hoboto i tamölö turu tula i hel, kaba ema omi bala nei tego tia uu a tsi töa a tsi makum turu tuenrei i tamölö. ³⁰ Tega kato homieia ualima tara pal matou i tamölö, balö te ngats kotsemen bate ba namen! Taraha, e omi koruna tegi lapo ba menai u tuenrei hoboto i tamölö turu tulana i hel, kaba ema omi bala nei tego tia uu a tsi töa puku a tsi makum turu tuenrei i tamölö.”

U hihatutsina turu katuun u hitöl te hialala kalakalar

(Matiu 19:9, Mak 10:11-12, Luk 16:18)

³¹ Be Iesu e ranga lenina me poeiena, “Alimiou u hengo hakapa naiam u raranga te poeiena, ‘A tson te laba nena a tahol i tanen ego haleien u pepa te hatei nena a hitöl e kapana.’ ³² Kaba alia e hatei ragou limiou, a tson te laba nena a tahol i tanen kaba tahol ema lue ii ta taina ta tson, a ka teka e kato here nanei a tahol teka a tahol a omi. Na tson te tölena a tahol a hitöl te laban a tson i tanen, a tson teka e here hase nei a tson te tsikolona.”

U hihatutsina turu ranga te mana uana iasa

³³ Be Iesu e ranga lenina me poeiena, “Alimiou u hengo has naiam u raranga ti hengo en u tuburara i manasa te poeiena, ‘Alö goma gamo ii te hamana uamölö iasa, kaba lö go kato hamani a ka te

hamana sile mölö i matana a Tsunono.’ ³⁴ Kaba lia e hatei ragou limiou, alimiou goma hamana uami i Kolö, taraha u Kolö a makum tara nitsunono tere Sunahan. ³⁵ Na limiou goma hamana uami tara han i puta, taraha u puta e here nei u töto te haholena e Sunahan a mounen. Na limiou goma hamana has uami i Jerusalem, taraha nonei a taun tara King a kapan. ³⁶ Na limiou goma hamana has uami i baku milimiou, taraha alimiou ema antunan kato hahiake mien, tsi ema antunan kato haruruhana nami ta tsi töa ta tsi hulu. ³⁷ Alimiou go poe tuun laseiam, ‘Aa’ tsi ‘E möa.’ Ta saha ta ka te ranga lel namou limiou e la hamanasa tala nama tere Satan.”

*U hihatutsina tara hipou
(Luk 6:29-30)*

³⁸ “Alimiou u hengo naiam u raranga te poeiena, “Tego kato homiea a katuun a matamölö, balö te kato homi hasem a matanen, na tego kato homi haseien a lihomölö balö te kato homi hasem a lihonen.’ ³⁹ Kaba alia e hatei ragou limiou, alimiou goma palisemi a katuun te kato homina i tamilimiou. E möa. Te tapalena a katuun a abuabu mölö tara pal matou, habirits balö te hatapala nem a hapala. ⁴⁰ Na te kout nena lö a töa katuun bate katsin luena u siot i tamölö, hala hasei u hasobö u ngahangaha i tamölö. ⁴¹ Na te hasöate na lö a polis ta ka balö te tataala memien a töa kilomita, söata noahasi bate tataale mula a huol a kilomita. ⁴² Pöata te harangata silena a katuun ta ka i tamölö, halei a ka te ngile nen. Na pöata te katsin haroho nena a katuun a ka i tamölö, alö goma tatei peits naien.”

*Aragi ngilir u katuun te pakö rarioura
(Luk 6:27-28,32-36)*

⁴³ Be Iesu e ranga lenina me poeiena, “Alimiou u hengo hakapa naiam u raranga te poeiena, ‘Alö go ngilir a man hahikapien i tamölö balö te pakö rem u katuun te paköe riou lö.’ ⁴⁴ Kaba alia e hatei ragou limiou, alimiou go ngil raian u katuun te pakö rariou limiou, ba limiou te singo sile miou u katuun te kato hakamits rariou limiou. ⁴⁵ Te kato uamou limiou teka, ba limiou te haröto namou alimiou a galapien tere Tamamilimiou te kana i Kolö. Taraha, nonei e roron hapirena a pitala i tanen tara katuun a niga na tara katuun a omi has, na nonei e roron hapolena a langits tara katuun te kato hamatsköna na tara katuun tema kato hamatskö has nei. ⁴⁶ Aha te hala sile noi e Sunahan u hamatana i tamilimiou, te ngil puku merami limiou u katuun te ngil rariou limiou? U katuun te lulu takisir e markato has uar iesana. ⁴⁷ Na te kato haniga peisa mia limiou tara man hahikapien i tamilimiou, ga limiou e mar halhal uamiou ime tara palai? Te markato has uer u katuun u omi koru tema hamana uari tere Kristo. ⁴⁸ A markato i tamilimiou ega matskö nitöa, te markato has uana e Tamamilimiou i Kolö a markato i tanen e matskö nitöana.”

6

U hihatutsina tara monin hitaguhu

¹ Be Iesu e ranga lenina me poeiena, “Haneiam, möa tu hatara naiam a markato a niga i tamilimiou i matar u katuun, tegi tara meraien limiou bate haniga rariou limiou. Te kato uamou limiou teka

be Tamamilimiou te kana i Kolö tema hamatana ranoui limiou.

² “Hena, te hala namia lö a moni turu katuun te moar ta moni, alö goma katoeien i matar u katuun, te markato uar u katuun u gamogamo iahana luman lotu na i kalana. Nori e kato meri a ka teka i matar u katuun tegi solosei meraien. Na lia e hatei hamana nitöa ragou limiou, nori i lu hakapi u hamatana i taren. ³ Kaba pöata te hala namia lö a moni tara katuun te moana ta moni, möa tu hatein a ka te katoena a pal matou i tamölö turu hapalana u ualima. ⁴ E markato uana teka, alö go hala hamousin a monin hitaguhu i tamölö. Be Tamamölö te tarena a mamanaka, bate hala hasenoi lö u hamatana.”

U hihatutsina temar singo uar

(Luk 11:2-4)

⁵ “Na tara pöata te singo mia limiou, alimiou goma hererami u katuun u gamogamo. Te ngiler u katuun egi tara raien tara pöata te singo rien tara man luman lotu na tara man la hagono i maroro. Alia e hatei hamana nitöa ragou limiou, nori i lu hakapi u hamatana i taren. ⁶ Kaba pöata te singo mia lö, alö go tasuia tara rum i tamölö bate hapiliem a tamana balö te singo mia tere Tamamölö tema tareri. Be Tamamölö te tarena a mamanaka te kato hamouse mölö, bate hale noilö u hamatana.

⁷ “Na pöata te singo mia lö, alö goma hula hakopis nai u ranga te kato uar u tematan. Nori e pei laser egi hengo merai te kato menarien u raranga u parpara. ⁸ Alö goma here raien, taraha e Tamamölö e Sunahan e solon atei sil hakapa noa haselala aha te ngilin rangate mien lö.

⁹ “Alimiou go mar singo uaiam teka:
 ‘O Tamamulam alö e kamia i Kolö,
 alam e hagöagonem a solomölö.

¹⁰ Alö gomi tsunone rilam.

Alam go maniata uu i tamölö i puta
 te maniata has uar i tamölö i Kolö.

¹¹ Alö go hala rameilam a kannou na i romana.

¹² Alö go hapolasema u kato homi i tamulam
 te hapolasa has menamilam u kato homi ti
 katoeia u katuun i tamulam.

¹³ Alö goma hala merai lam tara tou hiamus,
 kaba lö go luba nema a man niomi i tamulam.
 U mana.’

¹⁴ “Te tori polasa ba namia lö a markato a omi ti
 katoeia a palair u katuun i tamölö, be Tamamölö i
 Kolö te luba has nanou a markato a omi tu kati lö.

¹⁵ Kaba tema tori polasei mia lö a markato a omi
 ti katoeia a palair u katuun i tamölö, e Tamamölö
 ema luba has nanoi a markato a omi tu katoi lö.”

U hihatutsina te agono uar

¹⁶ “Na pöata te agono mialö, alö goma mataloho
 ii. Te kato uar u katuun u gamogamo te matalohor
 bate kato siler u katuun egi tari te agono uaren.
 Alia e hatei hamana nitöa ragou limiou, nori i lu
 hakapa ban töani u hamatana i taren. ¹⁷ Kaba
 pöata te agono mialö, sousoupi a mata mölö bate
 hakeiem u uapi i baku mölö. ¹⁸ Ba u katuun tema
 antunan tara marei ri te agono uamölö. Kaba
 e Tamamölö puku tema tareri te atei silena te
 agono uamölö. Nonei has te tarenou a ka te kato
 hamouse mölö bate hale noilö u hamatana.”

A manka a man nigana i Kolö
(Luk 12:33-34)

19 “Alimiou goma kui hatagala silemi a manka a man nigana i puta. U numa e kato homieriou a manka teka, na u kopkop e hela has riou bate kopur. 20 Kaba limiou go kui hatagala sileiam a mankana i Kolö tema antunan omiri. Be Sunahan te hala ranoui limiou u hamatana pan i Kolö. A numa ema antunan kato homi nanei a manka teka, na u kopkop has ema antunan helari bate kopur. 21 Na, te pei mia limiou a ka a niga hamana e kana i puta, u ngil i tamilimiou e ka has uana i puta. Na te pei mia limiou a ka a niga hamana e kana i Kolö, u ngil i tamilimiou e ka has uana i Kolö.”

A maroro te alesalana
(Luk 11:34-36)

22 “U mata, u lamina turu tuenrei. Na te nigana a mata milimiou, mamana makum i tuenrei milimiou e saputu menou u ualesala. 23 Kaba te omina a mata mölö, a tuenrei mölö hoboto e saputu menou u kuhil. Na te kuhilna u alesala te kana i tamölö, e kuhil hapan koru len talanou.”

E Sunahan na katuun te kamena a manka
(Luk 16:13, 12:22-31)

24 “A katuun ema antunan kui neia tara huol a tsunono. Taraha, nonei e rama nanou a töa bate ngilena a tabi. Alö ema antunan kui hoboto bemi e Sunahan na moni.

25 “Nonei te hatei sila ragia lia limiou: alimiou goma hakats silemi a nitöatöa i tamilimiou bate poe miou, ‘A saha ka te noue riou? Na saha ka te ue riou?’ Na limiou goma hakats silemi u tuenrei i tamilimiou, na tu hasobö tegi hasogi. A nitöatöa e pan bala nena a kannou, na u tuenrei e pan

bala nena u hasobu. ²⁶ Alimiou go taraiam turu apenar iasa. Nori ema leberi ta kannou na nori ema hagala haseri ta kannou batemi hakeria tara luman haputu. E möa. Kaba e Tamamilimiou i Kolö e hanou noa las ranen. Na limiou e niga bala ramiou u apena. ²⁷ Na esi i tamilimiou te taatagina e antunan hangahangaha hasena a nitöatöa i tanen?

²⁸ “Na saha ka te hakats sil me milimiou u hasobö? Alimiou go rötoiam turu palaua u hie temar pusuku uaren. Nori ema katoeri a peisaren bate tara hanigar. E möa. ²⁹ Na lia e hatei has ragou limiou, e King Solomon e kamei u hasobö u tara haniga nitöa, kaba a tsi töa puku tara man palaua teka e tara haniga bala nena u hasobö tere King Solomon. ³⁰ Na temar hasogo menanei e Sunahan u garas, te ka nou i romana bate haatse ria turu tula i mahö. E hana, e Sunahan ema antunan hasogo ranoui limiou tu hasobö, alimiou te ka memiou u nihamana u tetenei? ³¹ Alimiou goma hakats balami bate peimiou, ‘Aha te noue rou ra? Na ha te ue rou ra na te hasoge rou ra?’ ³² A mamanaka teka te kato siler u tematan egi lueien. E Tamamilimiou i Kolö e atei silena te ngil mena milimiou a manka teka. ³³ Kaba limiou go hakats mam naiam a Nipepeito tere Sunahan na manka te matsköna i matanen. Ba mamanaka hoboto teka, te hala hanigan töa raroui limiou. ³⁴ Na limiou egoma hakats hapara sile mi u lan i mahö, taraha u lan i mahö e ka menou u tana u mar hakhakats peisa i tanen. Na nitiamana i romana e antuna puku hasna i romana.”

7

*E möa tego ona mena milimiou a tana katuun
(Luk 6:37-38,41-42)*

¹ Be Iesu e rangana me poeiena, “Möa tu ona raiam a palair u katuun, be Sunahan tema ona has ranoui limioui. ² Temar ona mera milimiou a palai, nonei has tena mar ona meraroi limioui. Na temar tara mera milimiou a palair u katuun, nonei has tena mar tara meraroi limioui. ³ Aha te tara sile milö a tsi bita i matana e toulamölö, ba lö tema taremi a makumun palang i matamölö pouts? ⁴ Ime te markato uanen balö te poeiem tere toulamölö ‘Lama, ba lia te luba negu a tsi bita i matamölö’ tara pöata te kana a makumun palang i matamölö pouts? ⁵ Alö a katuun a gamogamo, alö go luba mamin a makumun palang i matamölö pouts, ba lö te töan tara haniga mou bate luba nem a tsi köahu i matana e toulamölö.

⁶ “Möa tu hala rami u muki a ka te göagonona. Na e möa tu lapo namia u beröana turu poum, taraha nori e namots tö hohomie ren bate habiritsir bate koto lileke rariou limioui.”

*Alimiou go rangataiam, ne go sakeiam, ne go porokoiam
(Luk 11:9-13)*

⁷ Be Iesu e rangana me poeiena, “Rangataiam ba limioui te lue moen. Na limioui go sakeiam ba limioui te sabie mouen. Na limioui go porokoiam ba tamana te kalata beranou limioui. ⁸ Taraha, u katuun te rangatar e lue rouen, na u katuun te saker e sabie rouen, na u katuun te porporokor, a tamana e kalata bera nouen. ⁹ Esi i tamilimioui te tatei hale nei a pien tson i tanen a hatu te singoe

nen ta tsi beret? ¹⁰ Na esi te tatei hale nei a pien i tanen a kōkōtsi te singoenen ta iena? ¹¹ Alimiou e ka memiou a markato a omi, kaba limiou e hala noa has namiou a manka man niga tara galapien i tamilimiou. Na e Tamamilimiou i Kolō e hala has ranoui limiou a manka a man niga te singo uamia limiou i tanen. ¹² Na tara mamananaka, te ngile milimiou u katuun egi katoeien i tamilimiou, alimiou go kato hasemen i taren. Nonei a mouna u raranga te kana turu buku tere Mosis na turu propet has.”

A makum a tekteki
(Luk 13:24)

¹³ “Alimiou go tasu mia tara tamana a tekteki. A tamana a pannen e la uana tara han a omi, na a parpara koru a katuun te tasu ria tara tamana teka. ¹⁴ Kaba limiou go tasu sila mia tara tamana a teki, taraha a tamana a tekteki te la uana tara nitōatōa, na ema katuun a para nei tena tasu roa i tanen.”

U ruei na man hua i tanen
(Luk 6:43-44)

¹⁵ Be Iesu e rangana me poeiena, “Hanei sil raiam u propet u gamogamo. Nori e hererari u muki u hie, kaba nori e gamor bate kato here nari a peisaren u sipsip u alena. ¹⁶ Alimiou e tatei tara marei sila ramoien tara man hua i taren. E hana, u katuun e antunan patsiki hase ria a huana u grep tara latu a hihitoka? Na a huana u fik tara latu a kits? ¹⁷ A man ruei a man niga e hua haniga hasir, na man ruei a man omi e hua homi hasir. ¹⁸ U ruei u niga ema tatei hua homi nei, na u ruei u omi ema tatei hua haniga has nei. ¹⁹ U mamana u ruei tema

hua haniga ri e ngats lupu rariou bate lapo raria turu tula. ²⁰ Ba limiou te tara marei mou nori u propet u gamogamo.”

Alia uma mala haniga rai limiou
(Luk 13:25-27)

²¹ Be Iesu e rangana me poeiena, “Ema katuun hoboto nei te ranga ria i tar bate poeier ‘O Tsunono, O Tsunono,’ tena tasu roa tara Nipepeito tere Sunahan. Kaba u katuun puku lasi te kukuteier u ngilngil tere Tamar te kana i Kolö tena tasu riou. ²² Nonei turu Lan teka, a parpara a katuun e poeiena romana i tar, ‘O Tsunono, o Tsunono. Alam u hihatuts silaia tara solomölö na lam u tsuga ba has raia u liliahanei u omi tara solomölö, na lam u kato sila has naia a man hiharöto tara solomölö.’ ²³ Ba lia te ranga meragouen bate poeiegu, ‘Alia ema atei sil rai limiou. La ba namou lia! Alimiou u katuun u omi.’ ”

A huol a katunun kukui luma
(Luk 6:47-49)

²⁴ Be Iesu e ranga lenina me poeiena, “A katuun te hengoena u raranga i tar, bate kukutie nen e here nei a katuun a atei te hatakeia a luma i tanen ieluna u lapo. ²⁵ Ba langits te polona bu uolo te la nama, ba lomolomo pan te bahuna, kaba ema antunan gasenoui a luma teka. Taraha a luma i kuieia ioluna u lapo. ²⁶ Kaba u katuun te hengoer u raranga i tar batema kukute rien, nori e hereri a katuun a tutu te hatakeia a luma i tanen turu kotolana. ²⁷ Ba langits e polona ba uolo e la nama, ba lomolomo pan e bahuna, be gas harus homin töa nena a luma teka. Ba luma e takupuna be tarura hakapa nitöana.”

A nitsunono tere Iesu

²⁸ Pöata te ranga hakapanaia e Iesu a manka teka ba u katuun e asingoto koru ner temar hihatuts uaien. ²⁹ Taraha, nonei ema here rai u tson hihatutsura tara Lo, kaba nonei e hihatuts here ii a katuun te kamena a nitsunono.

8

A katuun te kamei a toba

(Mak 1:40-45, Luk 5:12-16)

¹ Pöata te koul putama e Iesu turu pokus ba parpara koru a katuun e kukutie nanen. ² Ba töa katuun te kamei a toba e la nama memi hatukunna i matanen me poeiena, “O Tsunono, te ngil mialö, balö te tatei kato hagogose mumoulia.” ³ Be Iesu e hasoa nena a limanen ba nonei e sebele nen. Me poeiena, “Alia e ngilegu. Alö go gogoso!” Ema mala pinatöai ba toba i tanen te taiana. ⁴ Be Iesu e poeiena i tanen, “Alö ema antunan hatei korue moi ta töa ta katuun. Kaba lö go la uala tara pris balö tena hatare mien te niga uana a peisamölö. Ba lö te hale moien a kaan haats te ranga uu e Mosis i manasa. Ba u katuun te tatei atei sile riou a toba i tamölö e kapa nitöa.”

E Iesu e kato haniga poutsi a katunun kui tara tsunono turu soldia

(Luk 7:1-10)

⁵⁻⁶ Pöata te tataalaia e Iesu iahana taun i Kape-nium, ba töa tsunono turu soldia e la uanama i tanen memi ranga hataatagina i tanen me poeiena, “O Tsunono, a katunun kui i tar e opö mena u tuenrei u matekata, na e sagoho koru hasena a kamits pan i peisanen.” ⁷ Be Iesu e

poeiena, “Alia e lagou batena kato haniga poutse goien.”

⁸ Kaba a tsunono turu soldia e ranga paliseien me poeiena, “O Tsunono, alia ema katuun a nigagi balö te laua muma i luma i tar. Alö go ranga tuun ba katunun kui i tar te niga pouts nou. ⁹ Taraha, i tar peisa alia e atei silegu alia e ka puta gia tara töa pal tsunono, na töa pal soldia e ka puta has ria i tar. Na tego ranga meia lia ta töa balia te poeiegu, ‘Alö go la,’ ba nonei te la hasina. Na tego ranga meia lia ta tabi balia te poeiegu, ‘Alö go lama,’ ba nonei te la has nama. Na lia go ranga mei a katunun kui i tar, ‘Alö go kato a toukui teka,’ ba nonei te kato hase nen. Na u raranga tuun has i tamölö e ka mena a nitagala.”

¹⁰ Pöata te hengoeia e Iesu u raranga teka ba nonei e asingoto koruna. Ba nonei e ranga meraiena u katuun ti kukutieien me poeiena, “Alia e ranga hamana koru meragou limiou, alia uma sabie mei ta töa ta mar katuun teka i Israel tega kamei u mar nihamana te kamena a tson teka. ¹¹ Na lia e hatei ragou limiou, u katuun u parpara koru e la rima romana tara mamana han. Batemi gum gono mera nou ere Abraham mere Aisak ne Jekop tara kannou iahana a Nipepeito tere Sunahan. ¹² Kaba limiou u Jiu, u katuun tego kamia nonei tara Nipepeito teka, e Sunahan e tsuga mera noi limiou ielesala turu kuhil. Tena tabe hohomi moua limiou bate kutu hakarkarangake mou a liho milimiou.”

¹³ Be Iesu e poeiena tara tsunono turu soldia, “La tala. A ka ena mar butu has benoi lö turu mar

nihamana i tamölö.” Ba nonei tara tsi pöata puku has teka ba katunun kui i tanen e niga poutsuna.

E Iesu e kato haniga poutsi e tsinana a tahol tere Pita

(Mak 1:29-34, Luk 4:38-41)

¹⁴ Pöata te tasuia e Iesu iahana luma tere Pita ba nonei e tarena e tsinana a tahol tere Pita, te opö menaien u baku kamits. ¹⁵ Be Iesu e sebeleiena a limanen, ba kamits i bakunen e kapana. Ba nonei e takeina me kato benei e Iesu a tsi kannou.

E Iesu e kato hanigeir u katuun u parpara

¹⁶ Ba tara lahibong ba nori ena piou raria u katuun u para ti kamei u liliahanei, tere Iesu. Ba nonei e ranga tununa me tsuga baraiena u liliahanei u omi i taren. Ba nonei e kato haniga pouts has rena u katuun hoboto ti kamei a siki. ¹⁷ A ka teka e butu sil tega kato hamana menaien u raranga te ranga sila naia e Sunahan tere propet Aisaia i manasa.

“Nonei peisa tega luban a mamana mar siki i tarara,
na nonei has tega söateien.”

U katuun ti katsin kukuti e Iesu

(Luk 9:57-62)

¹⁸ Be Iesu e tara rena u katuun u parpara koru ti gono hahiseien, ba nonei e ranga meraiena u katunun tsitsilo tanen, “Aragi la u i hapalana ramun.” ¹⁹ Ba töa tson hihatutsuna tara Lo e la uanama i tanen me poeiena, “Tson Hihatuts, alia e la gono megou lö tara mamana han te la uamou lö.” ²⁰ Be Iesu poeiena i tanen, “U muki u hie e kamer a man kiou i taren, na u apenar iasa e kamer a man suhana i taren. Kaba lia tu butun

Katunuma, ema kamegi ta makumun soho i tar.”
²¹ Ba tana katunun tsitsilo e poeiena i tanen, “O Tsunono, alö go haniga balia tena kaho bunaguma e tamar, balia te töan lagono megou lö.” ²² Be Iesu e poeiena i tanen, “Alö go la gono memou lia. Hakabar u mate gi kaho peisar u mate i taren.”

*E Iesu e haselohi a lomolomo pan
 (Mak 4:35-41, Luk 8:22-25)*

²³ Pöata te osaia e Iesu tara tolaala, ba u katunun tsitsilo i tanen e osa gono meren. ²⁴ Ba lomolomo pan e songots butuna, ba u ramun e posa hongo beiena a tolaala. Kaba e Iesu e soho. ²⁵ Ba u katunun tsitsilo ena gulie ren me poeier, “O Tsunono, alö go taguhu ramou lam! Ara e katsin ruku hamanasa talara!” ²⁶ Ba nonei e poeiena i taren, “U nihamana i tamilimiou e tetenei koruna! Aha te matout memilimiou?” Ba nonei e takeina me abis hatagalena a lomolomo ba ramun e selohona. Ba lomolomo e hanöana, ba ramun e maraha poutsuna. ²⁷ Nori i asingoto koru me poeier, “A saha a mar katuun koru teka? A lomolomo na u ramun e hengo korueren!”

*E Iesu e tsuga bar u liliahanei u omi tara huol a katuun
 (Mak 5:1-20, Luk 8:26-39)*

²⁸ Pöata te butuien i hapalana Ramun i Galili tara makumun tsiktsikina i Gadara. Ba huol a katuun i kamei a liliahanei e buturima turu kahokaho ti roron kaien, me hitupali mer e Iesu. A huol a katuun teka i hie homi koru batema ron ngileri ta katuun ega silaia tara maroro teka. ²⁹ Ba huol e ku hohomi korur me poeier, “A Pien Tson tere Sunahan, alö emi hamia i tamulam? Alö goma

hakamits mam railam, a pöatan hahuna i tamulam e kanoana!”

³⁰ Na töa pannen a heis poum i nou, kaba ima ka halehana bala nai ti kaien. ³¹ Ba u liliahanei u omi e ranga hataatagi ria tere Iesu me poeier, “Te tsuga ramoa lö alam, ba lö te tsuga mera moi lam tara heis poum.” ³² Ba nonei e poeiena turu liliahanei u omi, “Alimiou go la iam.” Ba nori e koul ba ner a huol a katuun teka, mena sei ria tara heis poum. Ba heis poum hoboto teka e hiapipiata gala hoboto uar turu uarahana, me kurapa uar iahana a ramun be rukur me mater.

³³ Ba u katunun taratarakap turu poum e busur. Ba nori ena butu ria tara taun me habulungana ner a ka te butuia tara huol a katuun ti kamei u liliahanei u omi na mamanaka hoboto te butu. ³⁴ Ba mamana katununa tara taun teka emi sakeier e Iesu. Ba pöata ti tareien e Iesu ba nori e ranga merien tego la ba menaien a han i taren.

9

E Iesu e kato haniga poutsi a katuun a matekata (Mak 2:1-12, Luk 5:17-26)

¹ Be Iesu e osana tara tolaala, me kopis sila poutsuna i hapalana a ramun a perperere mena tukuna tara taun hamatskö i tanen. ² Ba u katuun e söata menarimei a katuun a matekata i tanen, e opöma tara pöapöa. A pöata te tareia e Iesu u nihamana i taren, ba nonei e poeiena tara katuun a matekata, “A tsi pien, a torimölö e tatei tagolala poutsuna. A man markato a man omi i tamölö e luba hakapa nalila.” ³ Ba palair u tson hihatuts tara Lo e hakats tunur me poeier, “A katuun teka e katsin gulena a nitsunono tere Sunahan.”

⁴ Kaba e Iesu e atei sil hakapi u hakhakats i taren me poeiena, “Taraha tsiponi ba limiou te ka memiou u hakats homi i torimilimiou? ⁵ Alimiou ema hanigami te poei mena gulei lia, ‘A markato a omi i tamölö e luba nalila?’ Tsi alia go pei aha? ‘Alö go takei bate lam?’ ⁶ Alia e haröto ragi limiou u mirakol teka, alia tu butun Katunuma e ka has megu a nitagala i puta teka tego luba menai lia a man markato a man omi.” Be Iesu e poeiena tara katuun a matekata, “Alö go takei bate söatem a pöapöa i tamölö ba lö te lam i han.”

⁷ Ba nonei e takeina me lauana i han i tanen. ⁸ Pöata ti tareia u katuun u parpara koru a ka teka ba nori e matout korur. Taraha nori i tari te hala menai e Sunahan a mar nitagala teka tara katuun, ba nori e töan soloseier e Sunahan.

*E Iesu e ngöi e Matiu
(Mak 2:13-17, Luk 5:27-32)*

⁹ A pöata te tataalaia e Iesu ba nonei e tareiena a töa katuun a solonen e Matiu bate gumna tara luman lulu takis. Be Iesu e poeiena i tanen, “Alö go kukutie mou lia.” Ba nonei e takeina me kukutienen. ¹⁰ Be Iesu ena nou gono meraiena u katuun u parpara koru ti ron lului a takis na palair u katuun has i luma tere Matiu. Ba nori e gum gono mer e Iesu na u katunun tsitsilo i tanen me nou gono meraren. ¹¹ Ba pöata ti tareia u Parasi a ka teka ba nori e poeier turu katunun tsitsilo tere Iesu, “E hana ba Tson Hihatuts i tamilimiou te nou gono meraiena u katuun te luluer a takis na u palair u katuun u omi?” ¹² Kaba e Iesu e hengoe a ka teka me poeiena i taren, “U katuun te moar ta siki ema tatei la uari tere dokta. E möa.

U katuun lasi te ka mer a siki te tatei la uar tere dokta. ¹³ Alimiou gona lue mia ta niatei temar mouna uana u raranga teka turu Buku u Göagono: ‘Alia ema ngilegi u haats tuun. Alia e ngilegu u katuun egi taatagin a taina katuun.’ Alia uma la silemei tegomi ngö merai u katuun u niga. Alia u la silema tegomi ngö merai u katuun u omi.”

*A markato te agono menari a kannou
(Mak 2:18-22, Luk 5:33-39)*

¹⁴ Tara pöata teka ba u katunun tsitsilo tere Jon a Tsonun Baptais e la uarima tere Iesu memi poeier, “Taraha tsiponi ba lam na u Parasi te roron agono nem a kannou te singo uamulam tere Sunahan, ba u katunun tsitsilo i tamölö tema agonori?” ¹⁵ Ba e Iesu e ranga palis ranen me poeiena, “U katuun te karia tara hahitöl, e tatei taatagi hasir tara pöata te kagono merien a tson te hitöluna? Kaba e kamena a man lan e la nama romana ba tson te hitöluna te luba rarien. Ba nori te töan agonor romana.”

¹⁶ Be Iesu e poeiena, “A katuun ema tatei hasamapenei a makumun labalaba a tsi tsimus tara tabutu turu labalaba u toutounei. Te markato uanen teka ba pöata te galuse rien ba makumun labalaba a tsimus te roropitsina bate takis ba nena a makumun labalaba a toutounei, ba tabutu te pan koru len talanou. ¹⁷ Na tegi osuleia uain u tsimus tara pikpiköna meme a toutounei. Ba pikpiköna meme te takalana ba uain te tatsuna ba pikpiköna meme te omi hasina. Kaba te osule mialö a uain a tsimus tara kaan osul a tsimus, ba huol te ka haniga habotor.”

*A pien tahol tara tson pepeito na tahol te hase-beleia turu hasobö tere Iesu
(Mak 5:21-43, Luk 8:40-56)*

¹⁸ Pöata te ranga noa naien a manka teka, ba töa tson pepeito turu Jiu e tasu nama me hatukunna i matanen me poeiena, “A pien tahol i tar e mate lala eni tuun. Kaba lö gona hatakopeia a limamölo i tanen ba nonei te töatöa poutsuna.” ¹⁹ Be Iesu e takeina me la gono menen na u katunun tsitsilo has i tanen.

²⁰ Ba töa tahol te posa nitöan u rahatsing turu töa u maloto na u huol u hiningal e la silanama i murina e Iesu me sebelena a runguna u hasobö i tanen. ²¹ A tahol e mar ranga uu teka turu hakats i tanen pouts, “Te sebele tuun goua lia turu hasobö tere Iesu balia te niga pouts gou.” ²² Be Iesu e habiritsina me tara uana i tanen me poeiena, “E nigana, u nihamana i tamölo e kato haniga poutse lalou lö.” Ba nonei tara tsi pöata puku has teka ba tahol e niga poutsuna.

²³ A pöata te tasuia e Iesu i luma tara tson pepeito me hengoena ti tabe uu katuun bate getar. ²⁴ Ba nonei e poeiena, “Laiam. A pien tahol ema mate nei. Nonei e soho tununa.” Pöata ti hengoeien temar ranga uu e Iesu teka, ba nori e golgol sileren. ²⁵ Kaba pöata ti halakasa merai u katuun ielesala, be Iesu e tasuna me luena a limana pien tahol, ba pien tahol e takeina be niga poutsuna. ²⁶ Ba u bulungana tara ka teka e tasata uana tara mamana han.

E Iesu e kato haniga poutsi a huol a katuun a matakiau

²⁷ A pöata te la ba naia e Iesu a han teka, ba huol a katuun a matakiou e kukutie ren me ku hapanir me poeier, “A Hatutubunei tere Devit alö go taatagi ramou lam!” ²⁸ Be Iesu e tasuna tara luma ba u matakiou e la uarima i tanen ba nonei e poeiena i taren, “Alimiou e hamanemiou, alia e antunan kato negu a ka te ngile milimiou?” Ba nori e poeier i tanen, “Aa, O Tsunono.”

²⁹ Ba nonei e sebeleiena a mataren me poeiena, “E tatei mar butu uana turu nihamana i tamilim-iou.” ³⁰ Ba man mata i taren e takalatana! Be Iesu e ranga hatagala mera nen me poeiena, “E möa tegona hatei mena milimiou ta katuun a ka teka!” ³¹ Kaba nori i lala mena habulungana laner e Iesu tara mamana a man han hoboto.

E Iesu e kato haniga poutsi a katuun a biru

³² A pöata ti lalen, ba u katuun emi piou ner a töa katuun a biru te kamei a liliahanei, tere Iesu. ³³ Be Iesu e tsuga ba nena a liliahanei a omi ba katuun e töan ranga poutsuna. Ba u katuun e asingoto korur me poeier, “E möa koru ta töa ta marka teka tego butu noa buia i Israel!” ³⁴ Kaba u Parasi i ranga me poeier, “A tsunono turu liliahanei te haleien a nitagala tego tsuga ba meraien u liliahanei u omi!”

E Iesu e taatagir u katuun

³⁵ E Iesu e hula laia tara mamana taun na man han hoboto. Ba e hihatuts lana tara man luman lotu turu Jiu bate habulungana la nena u Bulungana u Niga tara Nipepeito tere Sunahan. Na nonei e kato haniga pouts hasir u katuun ti kamei a mamana mar siki. ³⁶ Pöata te tara raien u katuun u parpara ti gonogono, ba nonei te taatagi

koru ranen, taraha nori i kaan tutu here rai u sipsip te möa ta katunun taratarakap i taren. ³⁷ Be Iesu e poeiena turu katunun tsitsilo i tanen, “A kannou a parpara koru te tangohona, kaba e möa ta katunun kui ta parpara tega hagaleien. ³⁸ Nonei tego singo beiam limiou tara katuun te hatamana nena a kui, bate halane nama ta katunun kui tega gono beien a kannou.”

10

A maloto na huol a aposol (Mak 3:13-19, Luk 6:12-16)

¹ Be Iesu e ngö gögono rena a maloto na huol a katunun tsitsilo i tanen ba nonei e hala raneien a nitagala tegi tsuga ba meraien u liliahanei u omi ba nori te kato haniga pouts raier u katuun te ka mer a mamana mar siki.

² Nonei teka a man solo tara maloto na huol a aposol tere Iesu:

E Saimon ti ngö hasei e Pita.

Ne Endru e toulana e Saimon.

Ne Jemis a pien tson tere Sebedi.

Ne Jon e toulana e Jemis.

³ Ne Pilip,

ne Batolomio,

ne Tomas,

ne Matiu te lului a takis,

ne Jemis a pien tson tere Alpius,

ne Tadius,

⁴ ne Saimon a toun Silot,

na e Judas Iskariot a katuun te harötein e Iesu turu katuun ti paköeien.

*E Iesu e tuler a maloto na huol a aposol
(Mak 6:7-13, Luk 9:1-6)*

⁵ Nonei a maloto na huol a aposol teka e Iesu e tula ralen me poeiena i taren, “Möa tu la uaiam turu katuun tema Jiu ri na tara man han has i Samaria. ⁶ Alimiou go la las uaiam turu sipsipira i Israel te tiar. ⁷ Ba limiou tena habulungana namiou u raranga teka: ‘A Nipepeito tere Sunahan e sukusukuna!’ ⁸ Alimiou go kato haniga pouts raiam u katuun te ka mer a siki na ego hatakei pouts has raiam u katuun ti mate. Ba limiou te kato haniga pouts ramiou u katuun u toba bate tsuga ba has ramiou u liliahanei u omi. Alimiou uma hole mi a nihitaguhi alimiou u lu pukpukuemen, na taguhu tala raiam u katuun bate ma luemi ta hihol. ⁹ Möa tu la meiam ta goul na ta silba na ta kopa. ¹⁰ Alimiou goma la has memi ta pora na tu sendol na tu tukana tara nilala i tamilimiou. Alimiou go la las meiam u töa puku u hasobö u ngahangaha. Ba u katuun tena taguhu rami limiou tena hanou rariou limiou.

¹¹ “Na pöata te la mia limiou bate tasu mia ia-hana saha taun na saha han, alimiou e tara sake-sake mou ta katuun ta niga bate kamia tara luma i tanen antunana tena kopis pouts muma limiou.

¹² Tara pöata tena tasu mia limiou tara luma teka, ba limiou te hala rami u katuun a masalohana.

¹³ Na te lu raroua limiou u katuun teka, a masalohana i tamilimiou e tatei kana i taren. Kaba tema antunan lu rarouien limiou, a masalohana e tatei la pouts uana i tamilimiou. ¹⁴ Tema hala narien ta niniganiga i tamilimiou na tema hengo haserien u raranga i tamilimiou ba limiou te tohu ba namiou

u köahu i pitapitana a moumilimiou tara pöata te la ba ramien limiou. ¹⁵ Alia e hatei hamana koru ragou limiou, a nihahuna tara taun teka e pan bala koru nanou a nihahuna tara taun i Sodom na i Gomora.”

*A pöata a omi e la nama romana
(Mak 13:9-13, Luk 21:12-17)*

¹⁶ Be Iesu e poeiena, “Hengoiam! Alia e hala here ragoui limiou u sipsip te sila ria i gusura u muki u hie. Alimiou go tarakap here rami u kökötsi, ba limiou te here hase mi a kulu tema tatei kato homie nei ta ka. ¹⁷ Haneiam, u katuun ena pile kap rariou limiou bate lu mera rilimiou turu kout, ba nori tena lahus raroua limiou turu luman lotu i taren. ¹⁸ Nori e haka raroua limiou i matar u tsunono na u king te hamana uami limiou i tar, taraha u ngilngil i tar tego hatei meramien limiou u Bulungana u Niga, bate hatei has ramiou u katuun tema Jiu ri. ¹⁹ Na pöata te kout rarouen limiou, e möa tu hakats haparpara balö te poeiem, ‘Ime tala temar ranga uagou lia? Na, aha tala te pei gou lia?’ Nonei koru has tara tsi pöata teka alimiou e hala raroui a ka tego ranga naiam limiou. ²⁰ Ema limiou peisanei te ranga mou. Kaba u Namnamei tere Tamamilimiou e Sunahan te haranga ranou limiou.

²¹ “Na nonei tara pöata, u katuun e hala rariou u toularen tegi kato hamate meraien, ba a palair u katuun te haniga nariou tegi atung hamate merai a galapien i taren. Na palair a galapien e omi has rariou u tsinaren na u tamaren, bate kato hamate has rariou. ²² U katuun u parpara koru e omi rariou limiou te hamana uami limiou i tar. Kaba a katuun te hamana nitöa uana i tar, e Sunahan

e lu pouts mena noien i tanen. ²³ Na te kato homi raroa limiou tara töa taun, ba limiou te bus uamiou tara taina taun. Alia e hatei hamana nitöa ragou limiou, alimiou ema hakapa noa hase moi a toukui i tamilimiou tara mamana taun hoboto i Israel, ba lia tu butun Katunuma te la pouts guma romana.

²⁴ “A katunun tsitsilo ema pan nanei a tson hihatuts i tanen, na katunun kukui puku ema pan has nanei a katuun pan i tanen. ²⁵ E nigana te kato here mena nei a katunun tsitsilo a peisanen a tson hihatuts i tanen. Na e niga hasina te kato here mena nei a katunun kukui puku a peisanen a katuun pan i tanen. Alia a katuun pan tara pal katuun i tar. Na a palair u katuun e ngö tsipone rilia e Belsebul. Te markato tala uaren teka, ba nori te ngö raroui limiou u katuun u omi koru, taraha alimiou e pala uamiou i tar.”

Alimiou go matouteiam e Sunahan
(Luk 12:2-7)

²⁶ E Iesu e ranga lel me poeiena, “Alimiou goma matout rami u katuun. Taraha, a manka hoboto te hamouser ena butu noua turu ualesala i murimuri. ²⁷ U raranga te hatei ragi lia alimiou turu kuhil, alimiou ena ranga namouen turu alesala. Na saha ka te hengoe mölö te hahasi tuun ner, ena ranga hapan namoa limiou i ioluna a pungana. ²⁸ Na limiou goma matout rami u katuun te atung hamateier u tuenrei, nori ema atung hamatieri u namnamei. Kaba limiou go matouteiam e Sunahan, nonei te antunan kato homi nitoeiena u tuenrei na u namnamei i hel. ²⁹ Alimiou e antunan holemi a huol a apena a 10 toea puku. Kaba e möa koru ta töa tega antunan

rus uu i puta tegoma haniga uai e Tamamilimiou.
³⁰⁻³¹ Na limiou goma matout has rami u katuun, taraha e Sunahan e tara kap ranou limiou, na limiou e niga bala koru ramiou u apena i matana e Sunahan. Na nonei e atei sil hasena u hihase turu hulu hoboto i baku milimiou.”

Alimiou goma holis nami e Kristo
(Luk 12:8-9)

³² Be Iesu e poeiena, “Esi te hatei ranei u katuun nonei e pala uana i tar, ba lia te hatei hase gou e Tamar i Kolö nonei a katuun i tar. ³³ Kaba esi te holis nena te pala uanen i tar i matar u katuun, ba lia te holis has nagoen romana tere Tamar i Kolö.”

E möa ta masalohana, kaba a hiatatung
(Luk 12:51-53, 14:26-27)

³⁴ Be Iesu e ranga lenina me poeiena, “E moa tego pei mena milimiou alia u la silema tegomi hala menai a masalohana turu katunura i puta. Alia uma la memei a masalohana. Alia u la mema a hiatatung. ³⁵ Alia u la silema tegomi hahiapalpal merai u katuun

‘a tson e pal nanou e tamanen,

na tahol e pal nanou e tsinanen,

na taholun tölo e pal nanou u halöanabei i tanen.

³⁶ U katuun noahas i luma i tamölö tena kato homie rioulö.’

³⁷ “A katuun te ngil koruena e tamanen na e tsinanen, batema ngile nei lia, nonei ema katuun hamana uanei i tar. Na katuun te ngil koruena a pien tson i tanen na pien tahol i tanen batema ngile nei lia, nonei ema katuun hamana uanei i tar. ³⁸ Na esi tema söatenei a kuruse i tanen bate kukutie noulia, nonei ema katuun hamana has

uanei i tar. ³⁹ Esi te poeiena e ka peisa mena a nitöatöa i tanen e hatia pouts hase nouen. Kaba esi te hakats nanoulia ba nitöatöa i tanen te taiana, nonei ena sabie nou a nitöatöa hamana i tanen.”

*U katuun te lue riou u hamatana u niga
(Mak 9:41)*

⁴⁰ E Iesu e ranga lel me poeiena, “A katuun te nigana i tamilimiou e niga hasna i tar. Na katuun te nigana i tar, nonei e niga hasna tere Tamar te hale moulia. ⁴¹ Na katuun te rarariena u raranga tere Sunahan, bate hanigeiena a toukui i tanen, nonei ena lue nou u hamatana te lu hase nou a katuun te rarariena u raranga tere Sunahan. Na katuun te tarena a katuun te matsköna i matana e Sunahan bate hanigeiena nonei a katuun, nonei ena lu hasenou u hamatana te lu hasenou a katuun a matskö. ⁴² Na lia e hatei hamana nitöa ragou limiou, a katuun te tarena a tsi katuun papala koru i tar bate haue nen a tsi ramun, nonei ena lu korue nou u hamatana u niga tema antunan taia nei.”

11

*E Jon a Tsonun Baptais mere Iesu
(Luk 7:18-35)*

¹ A pöata te hala hakapa neia e Iesu u raranga tara maloto na huol a katunun tsitsilo i tanen, ba nonei e lana mena hihatutsna tara man taun i taren.

² Na tara pöata te kaia e Jon a Tsonun Baptais tara karabus. Ba nonei e hengo nena a man toukui te katoe e Iesu. Ba nonei e hala mera namei u katunun tsitsilo i tanen u raranga tere Iesu. ³ Ba

nori emi poeier tere Iesu, “Nonei alö a katuun tego lama, tsi alam ego hahalosi a tabina katuun?”

⁴ Be Iesu e ranga palis ranen me poeiena, “La mula batena hateimi e Jon a ka te tare mula limiou na ka te hengoe mula limiou. ⁵ U katuun u kiou e tara poutsur, na u katuun u mou omi e tataala poutsur, nu katuun u toba e gogoso poutsur, na u talinga tupu e hengo poutsur, nu katuun ti mate e töatöa poutsur. Na u Bulungana u Niga e lauama turu katuun papala. ⁶ Na esi a katuun te hamana nitöa uana i tar e sasaala nou!”

⁷ Na pöata ti la poutsia u katunun tsitsilo tere Jon, be Iesu e tanian ranga hatei ranei u katuun e Jon me poeiena, “Alimiou i la sile mula egona tareiam a saha ka tara makum a palaka? Toum romana u nga te gagas mena te pihu mena neien a lomolomo? ⁸ Tsi alimiou u la sile mula tegona tara menami u katuun te ka meier u hasobö u niga koru? Kaba a mar katuun teka e kana tara mar luma a nigan töa tere king. ⁹ Tsi alimiou u la sile mula tegona tara menami a propet? Aa, alia e hatei ragou limiou e Jon a propet hamana. ¹⁰ E Jon nonei a katuun te hatei nena u Buku u Göagono, ‘Alia e Sunahan e halana gou a tson sösöata ranga te mam nanoulö,

tena hamatsköenou a maroro i tamölö.’

¹¹ “Na lia e hatei hamana ragou limiou, e Jon a Tsonun Baptais nonei te pan balana turu katuun hoboto ti poseir te ka ria turu tsiktsiki. Kaba a katuun papala koru tara Nipepeito tere Sunahan nonei te pan bala has nena e Jon. ¹² Na tara man pöata tere Jon a Tsonun Baptais bate noana i romana, u katunun hiatatung i tagala sil korui

a Nipepeito tere Sunahan, ba nori e torohana hatagala sil haser tegi tasu uen i tanen. ¹³ Na i mam tara pöata tere Jon a Tsonun Baptais, na turu propet hobotora i manasa, na lo tere Mosis, i hatein a Nipepeito tere Sunahan i mamuna te butuia e Jon. ¹⁴ Na te hamane mia limiou u raranga i taren, alimiou e atei silemiou e Jon nonei e Elaitsa tego lama. ¹⁵ Esi te kamena u talinga ega hengo!

¹⁶ “Alia go mar ranga merai u katuun te kar i romana ime? Alimiou e hererami a galapien te gum ria tara man makumun töana bate hia kukur, ¹⁷ ‘Alam e kohi bera mulo limiou kaba limiou ema sani mulei! Na lam e köma hase mula u hahuri, kaba limiou ema tabe mulei!’ ¹⁸ E Jon a Tsonun Baptais e lama kaba nonei ema nou ii nema ua hase ii ta uain. Ba nori e poeier nonei a katuun a momolö. ¹⁹ Na lia tu butun Katunuma e nougu na e uagu. Kaba nori e poeier alia a katuun a nounou pala, na uaua pala. Na e kapiena has raiegu u katuun te lulueier a takis na u katuun u omi. Kaba a man markato turu katuun tere Sunahan e haröto nena te mana uana a niatei i tanen.”

*A man pala ti hahamana
(Luk 10:13-15)*

²⁰ Be Iesu e tanian ranga sisi rena u katuun tara man taun te katoe men a man mirakol a man parpara. Taraha, nori ima tori polasa banai a man markato a man omi i taren. ²¹ Ba nonei e poeiena, “A nomi pan koru e butu noua i tamilim-iou u katunura tara taun i Korasin na i Betsaida! Sanena e Sunahan te katoeia a man mar mirakol teka tara taun i Taia na i Saidon, nori sanena i solon harötein tegi tori polasa ba menaien a man markato a man omi i taren, bate hasoger u

hasobön mou bate göagöaeier u köahu. ²² Na lia e hatei ragou limiou, turu lanin hahuna tere Sunahan, a nihahuna i tamilimiu u katunura i Korasin na i Betsaida e pan bala nanou a nihahuna turu katunura i Taia na i Saidon. ²³ Na limiou u katunura i Kapenium e tatei soloseiemiu a peisa milimiu i kolö, kaba e Sunahan e lapo ba has ranoua limiou i hel! Sanena e Sunahan te katoe u mar mirakol teka tara taun i Sodom, a taun i Sodom sanena e ka noa hasina i romana. ²⁴ Na lia e hatei ragou limiou, turu lanin hahuna tere Sunahan, a nihahuna i tamilimiu u katunura i Kapenium e pan bala nanou u nihahuna turu katunura i Sodom.”

*La uamuma i tar bate husa miou
(Luk 10:21-22)*

²⁵ Nonei tara pöata teka be Iesu e poeiena, “O Tamar, alö e Tsunono pan mia i Kolö na i puta. Alia e haniga uagu i tamölö te hamous mena milö a manka teka turu katuun te poeier e ka mer a niatei, bate haröto namen turu katuun papala tema atei balari. ²⁶ Aa, O Tamar, alö e markato uam turu ngil peisa i tamölö.

²⁷ “A mamanaka hoboto teka e Tamar te hale meien lia. Na e möa ta taina ta katuun tega atei sileiou lia, a Pien Tson tere Sunahan. E Tamar puku lahas. Na e möa has ta katuun tega atei sil e Tamar. Alia puku lahas a Pien Tson i tanen te atei silegen, na eresi tu onarilia te haröto ragoui lia e Tamar.

²⁸ “La uamuma i tar, alimiu hoboto te kui hata-gala koru miou, bate söate miou a nitiaama a kapan koru. Alia e hahusa ragou limiou. ²⁹ Lueiam a toukui i tar balia te hatuts ragou limiou, taraha

alia e ron hala puteiegu a peisar na e tori tami has gia turu katuun hoboto. Ba limiou tena tatei husa mou batena sabe hase mou a nigungum a niga te ka nitöana. ³⁰ Taraha a toukui i tar e hahan kana, na nitiamama te hale gilia lö e gigahana.”

12

Urarangana turu Lan u Göagono turu Jiu (Mak 2:23-28, Luk 6:1-5)

¹ Nonei tara pöata e Iesu e tataala silaia i gusuna man kuin wit turu Lan u Göagono turu Jiu. Ba u katunun tsitsilo i tanen e besir ba nori e tanian patsikeier a man hua turu wit be noue ren. ² Pöata ti tareia u Parasi a ka teka ba nori e poeier tere Iesu, “Tara, u katunun tsitsilo i tamölö e katoeier a ka tema antunan kato nari turu Lan u Göagono.”

³ Be Iesu e poeiena i taren, “Alimiou go mala rit hanigeiam a ka te katoe e Devit na man hahikapien i tanen tara pöata ti bes ien. ⁴ Ba nonei e tasuna tara luma tere Sunahan me nouena a beret a göagono ti hakeia i matana e Sunahan. Taraha, nonei na man hahikapien i tanen egima tatei noueien. Taraha, a beret puku turu pris. ⁵ Na limiou go mala rit hanigeiam a Lo tere Mosis te hatei nena u pris puku lasi te tatei kui ria iahana Luman Lotu Pan turu Lan u Göagono. ⁶ Na lia e hatei ragou limiou, a ka te kana teka e pan bala koru nena a Luman Lotu. ⁷ Alimiou sanena te ateri silemiou te mouna uana u raranga teka, ba limiou tema kato homi rami u aposol i tar. Alia e ngilegu, alimiou go taatagi raiam a palair u katuun, ema haats nei. ⁸ Taraha, Alia tu butun Katunuma te pan bala has negu u Lan u Göagono.”

*A katuun te ka mei u ualima u mate
(Mak 3:1-6, Luk 6:6-11)*

⁹ Be Iesu e la banena nonei a han mena tasuna tara luman lotu turu Jiu. ¹⁰ Na e kamei a katuun a lima mate e ka. Ba nori e rangate ren me poeier, “A Lo i tarara e haniga has nena tegi kato haniga pouts mei a katuun turu Lan u Göagono?” Taraha, nori i sake ta maroro tegi kout meien e Iesu.

¹¹ Be Iesu e poeiena i taren, “Tega ka meia ta töa i tamilimiou a töa sipsip, ba sipsip te rus hongo uana iahana kiou turu Lan u Göagono, e hana, alö ma antunan lusei poutse meien iahana a kiou?”

¹² Na a katuun e pan bala koru nena a sipsip. Na Lo i tarara e tatei haniga has nena tegi taguhu mei a katuun turu Lan u Göagono.” ¹³ Be Iesu e poeiena tara katuun, “Alö go haparori a limamölä.”

Ba nonei e haparorena a limanen, me niga pouts here nei a hapalana a limanen. ¹⁴ Ba u Parasi e lakasar mena korupakö ner tegi mar atung hamate menaien e Iesu.

A katunun kui te hopö kapiin e Sunahan

¹⁵ Na pöata te atei sileia e Iesu a ka teka, ba nonei e la ba nena a han teka, ba parpara koru a katuun e kukute nen. Ba nonei e kato haniga hoboton töa rena u katuun ti kamei a siki. ¹⁶ Ba nonei e ranga mera neien e gima hahatei rai a palaier u katuun. ¹⁷⁻¹⁸ A ka teka e butu sil tego kato hamana menaien u raranga ti ranga naia tere propet Aisaia.

“Nonei a katunun kui i tar teka, a katuun tu hopö kapiin lia.

Na lia e ngil koruegen.

Na lia e hale goien u Namnamei i tar,

ba nonei te habulungana has nanou a markato a matskö i tar turu katuun tema Jiu ri.

¹⁹ Kaba nonei ema ku hapan noi na ema ngala hapan has noi.

Na e möa nou ta katuun tego hengo u raranga i tanen tara man maroro.

²⁰ Nonei ema antunan pekoe nei u nga te mag-magolona,

na ema antunan kato hoseinei u lam tema kulupu haniga nei.

Kaba nonei e kui tuun las nou,

e antunana te kato hatagala hanigan töa nanouen a markato a matskö.

²¹ Na u katuun tema Jiu ri e hamane roen bate hahalose ren.”

*E Iesu na e Belsebul
(Mak 3:20-30, Luk 11:14-23)*

²² Ba nori emi piou naria a katuun a matakiou na biru tere Iesu. Be Iesu e kato haniga poutse nen, ba nonei e tarana me ranga pouts hasina.

²³ Ba u katuun hoboto e asingoto korur me poeier, “Nonei toum a pien tson tere Devit?”

²⁴ Pöata ti hengo naia u Parasi a ka teka ba nori e poeier, “Tara nitagala tere Belsebul, a tsunono turu liliahanei, ba nonei te antunan tsuga bara lala u liliahanei u omi.”

²⁵ E Iesu e atei sil u hakhakats i taren be poeiena, “Tegi hiatatungia u katuun tara töa han pan, ba han teka te omi nou. Na tegi lukataia a töa han tsi a töa hun haposa, bate hiatatungur bate möa nou ta hun haposa tega ka haniga. ²⁶ Ga tega tsugeia e Satan u katuun i tanen pouts, ga nonei e luba

pouts has nanen i tanen pouts. Bora, ga nipepeito tere Satan e mar tagala uanou ime? ²⁷ Sanena lia ego tsuga ba merai u liliahanei u omi a nitagala tere Belsebul, go katunun tsitsilo i tamilimiou e mar tsuga ba mera rouien ime? Bora, ga u katuun pouts tala i tamilimiou te ona pouts rariou limiou. ²⁸ Na te Namnamei tala uanen tere Sunahan te tsuga mera gilia u liliahanei u omi, ga Nipepeito tere Sunahan e la tala uanou i tamilimiou.

²⁹ “Tega ngilin tasuia ta töa ta katuun i luma tara katuun a tagala, nonei ega kits kap mam bin a katuun a tagala. Ba nonei te töan tasuna bate luena a manka i tanen. ³⁰ Esi tema ka gono menei lia, nonei ema ngile nei lia. Na katuun tema gono bera nei lia u katuun, nonei e tsuga ba raneien lia. ³¹ Na lia e hatei ragou limiou, e Sunahan e tatei luba nanou a mamana markato a man omi. Kaba esi te ranga homi nena u Namnamei tere Sunahan, e Sunahan ema tatei luba nanou a markato a omi teka i tanen. ³² A katuun te ranga homi nanou lia tu butun Katunuma, e Sunahan e tatei luba nanou a markato a omi i tanen. Kaba a katuun te ranga homi nena u Namnamei u Göagono, e Sunahan ema tatei luba nanou a markato a omi teka i tanen, tara pöata i romana, na tara pöata i murimuri has.”

U ruei na hua i tanen
(Luk 6:43-45)

³³ Be Iesu e rangana me poeiena, “U ruei u niga e ka mena a hua a niga. Na u ruei u omi e ka has mena a hua a omi. U katuun e tara mamer a hua bate töan ateiler u ruei u niga tsi u omi.

³⁴ Alimiou u katuun tara kökötsi. Ime te tatei mar ranga mena milimiou a manka man niga te katuun omi uamilimiou? A ka te kana turu tori, u

rung te ranga halakasa nanen. ³⁵ A katuun a niga e halakasena a manka man niga, na katuun a omi e halakasa hasena a manka man omi.

³⁶ “Na lia e hatei ragou limiou, turu Lanin Hahuna alimiou e hala raroui a nihahuna tara man ranga pinopino a man omi tu ranga naiam limiou. ³⁷ Tara man raranga noahas i tamölö e Sunahan e ngöe noi lö a katuun a niga tsi a katuun a omi.”

*U katuun i ngilin tarein tu mirakol
(Mak 8:11-12, Luk 11:29-32)*

³⁸ Ba palair u tson hihatuts tara Lo na u Parasi e poeier tere Iesu, “Tson Hihatuts, alam e ngilin tara nem tu mirakol i tamölö.”

³⁹ Be Iesu e ranga palis ranen me poeiena, “Alimiou u katuun u omi tara pöata i romana te rangata silemiou tu mirakol. Kaba alia ema tatei haröto ragi limiou tu mirakol. A hatöatongo lasi tere Jona a propet i manasa te haröto ragi lia limiou. ⁴⁰ E Jona e kaia i torina a iena pan u topisa u lan na topisa a bong, na Alia tu butun Katunuma e ka hasegou u topisa u lan na u topisa a bong iahana u tsiktsiki. ⁴¹ Pöata te butu noa u lanin hahuna, ba u katunura i Ninive te tuol roa turu kout bate hatei ner a markato a omi turu katunura i romana. Taraha, a tei Ninive i hengoe u raranga tere Jona me hapolaser a man markato a man omi i taren. Na töa katuun te pan bala nena e Jona e kana teka. ⁴² Na turu lanin hahuna, a tetahol panina i Siba e tuol noa turu kout bate hatei nena a markato a omi turu katunura i romana. Taraha, nonei e lama i lehana koru tegomi hengo menaien u hihatuts u niga tere King Solomon. Na lia e

hatei ragou limiou, a katuun te pan bala nena e Solomon e kana teka.”

U namnamei u omi e tuku pouts
(Luk 11:24-26)

⁴³ Be Iesu e ranga lenina me poeiena, “Alimiou u katuun u omi ra i romana e heremi u katuun u momolö. Pöata te la ba nena a liliahanei a omi a katuun, ba nonei te lagi sakesakiena ta makum tegona husa ien tara makum a palaka. ⁴⁴ Ba nonei e poeiena, ‘Alia e la pouts uagou tara luma tu la ma lia.’ Ba pöata te la pouts men batemi sabiena a luma e ka haniga, na e kaka pukuna, na i salo hagogosi na e ka haniga. ⁴⁵ Ba liliahanei a omi e lana mena lu lelana a tana tohit a liliahanei, ti omi koru naien. Ba nori emi karia iahana katuun teka. Ba nonei e omi bala koru lel tala nena temar omi tutuun uaien. Te markato has uariou u katuun u omi ra i romana.”

E tsinane Iesu na u toulanen
(Mak 3:31-35, Luk 8:19-21)

⁴⁶ Pöata te ranga noaia e Iesu turu katuun, be tsinanen na u toulanen te tukur. Ba nori e tuol ria ielesala me rangata ner tegi ranga uaien tere Iesu. ⁴⁷ Ba töa katuun e hatei nen, “E tsinamölö na u toulamölö te tuolur ielesala e ngilin ranga ria i tamölö.”

⁴⁸ Be Iesu e ranga palise nen me poeiena, “Esi nonei e tsinar na eresi u toular?” ⁴⁹ Be Iesu e tus uana turu katunun tsitsilo i tanen me poeiena, “Nori teka u tsinar na u toular. ⁵⁰ Eresi te kuku-tieier u ngilngil tere Tamar i Kolö nori u toular na u hahinar nu tsinar.”

13

*U haharuei tara katuun te tsihasein a man ngal
(Mak 4:1-9, Luk 8:4-8)*

¹ Nonei noahas turu lan be Iesu e la ba nena a luma mena gumna i rehina Ramun a Perperere i Galili, me hihatutsina. ² A katuun a parpara koru te gono hahiseien, ba nonei ena töa osana tara tolaala me gumna, ba u katuun te tuolria i kotolana.

³ Ba nonei e hatei raneien a parpara koru a ka turu haharuei me poeiena, “Hahengoiam. A töa katuun ena tsihasein a man ngalin kannou. ⁴ Ba tara pöata te tsihasa naiien a man ngal tara kui, ba palaina a man ngal e pururuku ria i maroro, ba u apena e la rima memi nou hakape ren. ⁵ Na palaina a man ngal i pururukuia turu tsiktsiki te kamei u lapo, ba man ngal e pusuku boroboro tunur, taraha u tsiktsiki ema pongotoi. ⁶ Ba pöata te la seima a pitala me piri halangoe nen, taraha nori ima kanoa mei ta poloso. ⁷ Na palair a man ngal i pururukuia i gusuna u kolits u hihitoka, ba u kolits e panir me kato homier a man kaan leba teka. ⁸ Ba palair a man ngal e pururuku ria turu tsiktsiki u niga, me panir me huar. A palai i ka mei a hua a parpara koru, na palai i ka mei a hua te gamon para, na palai i kamei a hua tema para balai.”

⁹ Be Iesu e poeiena, “Esi te kamena u talinga ega hengo.”

*A ka te haharuei sil e Iesu
(Mak 4:10-12, Luk 8:9-10)*

¹⁰ Ba u katunun tsitsilo e la uarima tere Iesu me rangate ren, “E hana ba lö te ranga meramen turu haharuei?”

¹¹ Be Iesu e ranga palis ranen, “Alimiou e atei silemiou u ranga momous tara nipepeito kapanina i Kolö. Kaba nori ema ateiri.

¹² “A katuun te ateina, e Sunahan e hala lele noien a niatei a para. Kaba a katuun tema ateinei, e Sunahan e luba nanou a tsitabubun niatei te ka menen. ¹³ Nonei koru a ka te ranga sila meragien lia turu haharuei, taraha nori e tarar kaba ema tarari, na nori e hahengor kaba ema hengori na ema atei has ri. ¹⁴ Na u raranga tere propet Aisaia e butu hamana koru talana te poeiena, ‘Alimiou e hahengo mou kaba ema atei sile moi a ka te hengoe milimiou.

Na limiou e tara mou, kaba limiou ema tara marei moi aha te tare milimiou.

¹⁵ Be Sunahan e poeiena, U katuun teka a man tui i taren e tupu hakapa.

Na man talinga i taren ema antunan hengo korunei, na nori e hasoheier a mataren.

Taraha, a mataren e namots tarana,
na talingaren e namots hengona,
ne na mots ateir.

Nori ena mots habirits uarima i tar
balia te kato haniga ragen.’

¹⁶ “Kaba limiou e tatei sasaalamiou. Taraha, a mata milimiou e tarana, na talinga milimiou e hengona. ¹⁷ Na lia e hatei hamana ragou limiou! U propet u para na u katuun u matsköra i manasa i ngilin tara korui a manka te tare milimiou, kaba nori ima antunan tareien. Na nori i ngilin hengo

korui a manka te hengoe milimiou, kaba nori ima antunan hengoeien.”

*E Iesu e ranga hatararein u haharuei
(Mak 4:13-20, Luk 8:11-15)*

¹⁸ Be Iesu e poeiena, “Hengo tala iam, u haharuei tara katuun te tsihasein a man ngal. ¹⁹ U katuun te hengoer u raranga tara nipepeito kap ba tema atei silerien, e Satan ena la nama romana bate lubanena a tsi niatei te kana i tori milimiou. E herenei a man ngal ti tsihasa naia i maroro.

²⁰ Na man ngal ti tsihasa naia turu tsiktsiki te ka mena u lapo e here nei u katuun te hengoer u raranga bate toul boroboro merien a nisasaala.

²¹ Kaba nori ema lu hongo menari u raranga tere Sunahan i taren, ba nori te ka taleier a tsitabubun pöata puku. Ba pöata te omi mera rien u katuun te hamana mena rien u raranga tere Sunahan bate kato hatiamer u hakhakats i taren, ba nori te tori polasa boroboro tuneren.

²² “Na man ngal ti tsihasa naia tara kolits a hihitoka e here nei u katuun te hengoer u raranga, kaba nori e ka mer u hakhakats pan tara nitöatöana i puta, bate ngileier tegi lu menai ta moni ta parpara. Na manka teka e here nei e pil kakap nena u raranga tere Sunahan batema habute nei ta markato ta niga turu katuun teka.

²³ Kaba a man ngal ti tsihasa naia turu tsiktsiki u niga e here nei u katuun te hengoer u raranga bate atei sile ren. Ba u raranga te kato hanige iena a markato turu katuun teka: a palai e niga korur, na palai e gamon nigar na palai e niga hatsitabubu tunur.”

U haharuei turu pulung u omi te butuna tara kui

²⁴ Be Iesu e ranga mera nei u katuun u taina u haharuei me poeiena, “A Nipepeito tere Sunahan ega herei a katuun te tsihasein a ngalin wit a niga tara kui i tanen. ²⁵ Kaba tara pöata ti soho haka-paia u katuun ba pakö i tanen e la nama memi tsihasa nena a huana u pulung u omi i gusuna a kuin wit, me lana. ²⁶ Ba pöata te pusukuema a man ngalin wit be huana, ba u parpara u pulung u omi e butu hasina.

²⁷ “Ba u katunun kui tere tamana kui e la rima memi poeier, ‘O tsunono, alö u tsihasein a man ngalin wit a man niga tara kui i tamölö, kaba ime temar butu uu parpara u pulung u omi?’ ²⁸ Ba nonei e poeiena, ‘A katuun a omi te kati a ka teka.’ Ba nori e rangate ren, ‘Galö e ngilem alam gona pate ban u pulung?’

²⁹ “Ba nonei e poeiena, ‘E möa. Alimiou ena mots pate ba has namiou u wit te sohalana turu pulung tegona pate ba mena milimiou u pulung u omi. ³⁰ Hakeiam u wit na u pulung u omi egi pan hoboto antunana tena tangoho noa u wit. Ba lia te ranga merakou u katuun tena gone riou a kannou a tangoho, pate mam meiam u pulung u omi bate kits ramen batena lapo ramen turu tula. Ba limiyou te töan gone miou u wit batena haka ramen tara luman haputu kannou i tar.’ ”

U haharuei turu ngalin mastet

(Mak 4:30-32, Luk 13:18-19)

³¹⁻³² Be Iesu e hatei raneien u taina u haharuei me poeiena, “A Nipepeito tere Sunahan e here nei u ngalin mastet, te tetenei koruna. Ba katuun e lue nen bena tsihasa nanen tara kui i tanen. Ba tara

pöata te pan ien, e pan bala koru lenin a man kaan leba hoboto, bate butu here nei u ruei. Ba u apena te la rima batemi katoeria a man suhana tara man kalan ruei i tanen. Na Nipepeito tere Sunahan e tania hatetenei hasina batena töan pan susuluna.”

*U haharuei turu is
(Luk 13:20-21)*

³³ Be Iesu e ranga mera neien u taina u haharuei me poeiena, “A Nipepeito tere Sunahan e here nei u is te luena a tahol bate sohale neien a töa taram palaua, ba i murinen ba palaua hoboto te la seina.”

*A man haharuei tere Iesu
(Mak 4:33-34)*

³⁴ A mamananaka hoboto teka e Iesu e hatuts raien u katuun turu haharuei. Nonei ema tatei ranga hamatskö nai ta ka i taren, e subun hihatuts lasia i taren turu haharuei. ³⁵ A ka teka e kato hantoeiena u raranga te rangein a propet, “Alia e ranga goua turu haharuei tego ranga uu lia i taren.

Alia e ranga mera gouien a manka tima atei sileien i manasa koru batemi antunana i romana.”

E Iesu e ranga hatararein u haharuei turu pulung u omi

³⁶ Be Iesu e la ba rena u katuun me tasuna tara luma. Ba u katunun tsitsilo i tanen e la uarima i tanen ba töa i taren e poeiena, “Hatei ramei lam aha te poeiena u haharuei turu pulung te kana tara kui.”

³⁷ Be Iesu e ranga palis ranen me poeiena, “A katuun te tsihasein a man ngal a man niga e here nei Alia tu butun Katunuma. ³⁸ Na kui e here nei

u han hoboto i puta. Na man ngal a man niga e here nei u katunura tara Nipepeito tere Sunahan. Na u pulung u omi e here nei u katuun tere Satan. ³⁹ Na katuun a omi te tsihasein u pulung tara kui, nonei e Satan. Na pöata te gone ria a kannou a tangoho e here nei a kapakapana pöata turu han i puta. Na u katuun te goner a kannou a tangoho tara kui, nori u angelo. ⁴⁰ Na te gono menari u pulung bate haatse ria turu tula, nonei te kato uanen romana tara pöata te kapana romana a han. ⁴¹ Alia tu butun Katunuma e hala raguma romana u angelo i tar, ba nori temi luer romana a mamana katuun te roron kato homir na u katuun has te tuke rer a palai bate kato homir, bate luba raria romana tara Nipepeito i tar. ⁴² Ba nori te lapo merari romana turu pannen u tula. Ba nori te tabe hohomi ria romana turu tula teka bate har hasir. ⁴³ Ba u katuun u matskö te alesala hereri romana a pitala tara Nipepeito tere Tamaren. Na lö a katuun te ka mem u talinga alö go hengo haniga!”

U haharuei tara moni

⁴⁴ Be Iesu e poeiena, “A Nipepeito tere Sunahan e here nei a bokis moni pan te hamouse ria tara kui. Ba töa katuun temi sabe nen bate hamous lele nen. Ba nonei te sasaala koruna, batena hahol nena a mamananaka hoboto i tanen, batemi töan holena nonei a kui.”

U haharuei turu kabono te ka mena a hol pan

⁴⁵ Be Iesu e ranga lenina me poeiena, “Na Nipepeito tere Sunahan e here nei a katunun hahol te sake la nena tu kabono tu niga koru. ⁴⁶ Ba tara pöata te sabe nen u töa u kabono u niga koru, a hihol i tanen e la sei koruna, ba nonei te töan

hahol hakapan töa nena a mamananaka hoboto te ka menen, batena töan holena nonei u kabono.”

U haharuei tara abe

⁴⁷ E Iesu e ranga lel me poeiena, “Na Nipepeito tere Sunahan e here nei a abe te lapo naria i tasi bate soohena a mamana mar iena. ⁴⁸ Pöata te saputu nen, ba u katuun te hagalar te las menari a abe i mounsingmou bate hagum mer te arena menarien u iena u niga, bate hongé rien turu bona i taren, bate baner a pala te omina. ⁴⁹⁻⁵⁰ Te markato has uaren romana tara pöata te kapana romana a han. U angelo e la rima romana batemi arena rariou u katuun u omi na u katuun u niga, bate lapo ba raria romana u katuun u omi turu pannen u tula. Ba nori te tabe hohomi ria romana turu tula bate har hasir.”

U raranga u tsimus na u rangana i manasa

⁵¹ Be Iesu e rangana turu katuun ti hahengoa i tanen me poeiena, “Alimiou e atei sile miou a man raranga te katoe gula lia?”

Ba nori i poeier, “Aa.”

⁵² Ba nonei e poeiena i taren, “U tson hihatuts hoboto tara Lo, na limiou u katunun tsitsilo has i tar tara Nipepeito tere Sunahan, alimiou e heremi a katuun terena luma te lue nama a manka a man tsimus na manka man toutounei tara makumun haputu i tanen.”

U katunur i Nasaret i tori tsugani e Iesu

(Mak 6:1-6, Luk 4:16-30)

⁵³ E Iesu e ranga hakapein a man haharuei teka, me la ba nena nonei a han. ⁵⁴ Ba nonei e la pouts uana tara han i tanen i Nasaret. Ba nonei e taniaan hihatutsna tara luman lotu turu Jiu. Ba u katuun

ti hengoeien e asingoto korur me poeier, “Ime te luema a katuun teka a mar niatei na mar nitagala temar kato uana teka? ⁵⁵ Nonei toum banei a pien tere Josep a kapenta na e tsinanen toum te ngöeri e Maria na u toulanen toum ere Jemis mere Josep na e Saimon na e Judas? ⁵⁶ Na u hahinanen toum hoboto e ka gono has merariora? Gime te lue men a mar nitsunono teka?” ⁵⁷ Ba nori e raharahe ren.

Be Iesu e poeiena i taren, “A propet tere Sunahan e ka mena a solo turu han hoboto. Kaba u katunura i han pouts i tanen na i luma has i tanen nori ema hatsitsie rien nema hatsunone rien.” ⁵⁸ Na nonei ema katoei tu parpara i han i tanen, taraha u katuun i tanen e hahamana naren.

14

E Jon a Tsonun Baptais e mate hakapa (Mak 6:14-29, Luk 9:7-9)

¹ Tara pöata teka e Herot a King e hengoen a man raranga hatei tara manka te katoe e Iesu. ² Ba nonei e poeiena turu katunun kui i tanen, “Nonei lasi e Jon a Tsonun Baptais te takei poutsia tara tou mate. Nonei te ka beneien a nitagala te kato meneien a man mirakol.”

³ I mam nen e Herot e pile kapiin e Jon, be kitsenen bena hakenen tara karabus. Nonei e kato mei a ka teka a ngilina e Herodias a tahol tere Pilip, e toulanen. ⁴ Taraha e Jon e ranga mei e Herot me poeiena, “E ma niga koru nei tego tölo menai lö e Herodias!” ⁵ Be Herot e katsin atung hamatie nen, kaba nonei e matoutir u Jiu. Taraha, nori i pei e Jon a töa propet.

6-7 Na turu lan ti hatöatongeia u lan ti poseia e Herot ba nori e katoeier a kannou pan na u hirata, ba pien tahol a kukubei tere Herodias e sanina i matar u katuun hoboto ti kaia tara kannou. Be Herot e haniga korueiena te sani uen, me ranga hamana koru menen turu ranga te mana uana iasa me poeiena, “Ta saha ta ka te ngile moa lö i tar, alia e hale goien lö!”⁸ Be Herodias e ranga meiena a pien tahol i tanen, “Alö ena mar ranga uamou teka tere Herot, ‘Hakema a bakuna e Jon a Tsonun Baptais tara pelete ba lö temi hala mien lia.’” Ba pien tahol ena mar ranga has uana teka.⁹ E Herot e tori tiama koru, kaba nonei e kato hakapa talei u ranga u mana i matar u katuun ti nou gono meien, ba nonei e hatangana tala nena u raranga tara tahol.¹⁰ Ba nonei e tahulena a töa tsonun taratarakap egona söatema a bakuna e Jon. Ba tsonun taratarakap ena ngats kotsena a bakuna e Jon.¹¹ Ba u baku e hake rima tara pelete me haleri a pien tahol, ba nonei ena hale neien e tsinanen.¹² Ba u katunun tsitsilo tere Jon e la rima, me luer a tuenreinen mena kaho naren. Ba nori ena hateier e Iesu.

*E Iesu e hanouri a 5,000 tara katuun
(Mak 6:30-44, Luk 9:10-17, Jon 6:1-14)*

¹³ Pöata te hengo naia e Iesu e Jon e mate, ba nonei mera u katunun tsitsilo i tanen e la ba ner a han teka, me osa ria tara tolaala me la uar tara töa han tema kame ii ta katuun. Ba u katuun u parpara koru e hengoner te la ba meien a taun ba nori e kukute sila nalila e Iesu i maroro.¹⁴ Be Iesu ena hasunguna me koul ba nena a tolaala. Ba pöata te tara raien u katuun u parpara koru,

ba torinen e taatagi koru ranen, ba nonei e kato haniga pouts rena u katuun ti kamei a siki.

¹⁵ Ba tara pöata te lahi hamanasama ka ba u katunun tsitsilo i tanen e la uarima i tanen memi poeier, “A ka e lahibong hakapa tala, na e möa ta han tara makum teka. Hala mera lei u katuun tara matsi han te sulusukur batena hol peiseier ta kannou i taren.” ¹⁶ Be Iesu e poeiena, “Nori ema antunan lari. Alimiou go hala ramien ta ka tegi nouen.” ¹⁷ Ba nori e poeier, “Alam e ka puku meiem a tolima a beret na huol a iena.”

¹⁸ Be Iesu e poeiena, “Lu mena mumei i tar.” ¹⁹ Ba nonei e ranga merena u katuun egi gum ia turu garas. Ba nonei e luena a tolima beret na huol a iena, me tara sei uana i Kolö, me haniga uana tere Sunahan. Ba nonei e posepose iena a beret me hala raneien u katunun tsitsilo, ba nori e molamola rarien u katuun. ²⁰ Ba nori hoboto e nour me masulur. Ba u katunun tsitsilo e luer a maloto na huol a kalobaka a saputu tara man kannou ti nouba naien. ²¹ U hihase turu katuun ti nou e sulusukuia turu 5,000 tara pal tson peisa, kaba a touhaliou na galapien ima ase raien.

*E Iesu e tataalaia i ieluna u ramun
(Mak 6:45-52, Jon 6:15-21)*

²² Be Iesu e ranga merena u katunun tsitsilo egi osaia tara tolaala, bate la mam uar i hapalana ramun a perperere, ba nonei te töan hala kalakala rena u katuun. ²³ I murina te hala kalakala raien u katuun, ba nonei e la sei pepeisa uana turu pokus tena singo uaien. Ba pöata te lahima a ka, ba nonei e ka pepeisana turu pokus. ²⁴ Tara pöata teka a tolaala e la halehana ba hakapein a mounsingmou,

ba lomolomo e la uanama i matana a tolaala ba u keikei e kato havigere iena a tolaala. ²⁵ Ba tara sukusukuna lunlan, be Iesu e la uanama i taren me tataala silanama ioluna u ramun. ²⁶ Ba pöata ti tareia u katunun tsitsilo te tataala uama e Iesu ioluna u ramun, ba nori e toltololo koru mer a nimatout. Nori i ku hohomi koru me poeier, “A liliahanei!”

²⁷ Be Iesu e ranga boroboro uana i taren me poeiena, “Alia ba. Möa tu matout iam!” ²⁸ Be Pita e ranga palisenen, “O Tsunono, tego Iesu hamana koru u lö, ranga memoulia balia te tataala sila goa ioluna u ramun bate la uagou i tamölö.” ²⁹ Be Iesu e poeiena, “Lama!” Be Pita e koulna tara tolaala me tataala lala ioluna u ramun me lauana tere Iesu. ³⁰ Kaba pöata te tareien a lomolomo ba nonei e matout koruna, me taniaan rukuna. Ba nonei e ku uana tere Iesu me poeiena, “O Tsunono, taguhe moulia!”

³¹ Be Iesu e hasöa boroboro nena a limanen me pile nanen me poeiena, “Alö e kamem u nihamana u tetenei koru! Aha tsiponi te hula hakats memulalö?” ³² Ba pöata ti osaien tara tolaala, ba lomolomo e seloho poutsuna. ³³ Ba u katunun tsitsilo ti kaia tara tolaala e hatsunoner e Iesu me poeier, “U mana koru, alö a Pien Tson tere Sunahan!”

E Iesu e kato haniga poutsir u katunura i Genesaret

(Mak 6:53-56)

³⁴⁻³⁵ Ba nori e aroher a ramun mena sung ria tara han i Genesaret, ba u katunura i Genesaret e mareier e Iesu. Ba nori e hangö rer u katuun hoboto ti kamei a siki tara mamana han hoboto

memi piou rarien tere Iesu. ³⁶ Ba nori i ranga hatagala hoboto siler tegi hapile tuun meraien u katuun ti kamei a siki i runguna u hasobö tere Iesu. Ba u katuun hoboto ti sebeleia turu hasobö i tanen e niga poutsur.

15

U hihatuts tara lo na turu hatubuna (Mak 7:1-13)

¹⁻² Ba palair u Parasi na u tson hihatuts tara Lo i la uama i Jerusalem me la uarima tere Iesu memi rangate ren, “Taraha tsiponi ba u katunun tsitsilo i tamölö te hipus ner u hihatuts ti halan u katuun pan i tarara i manasa? Nori ema galus mameri a limaren bate töan nour!” ³ Be Iesu e ranga palis ranen me poeiena, “Gaha tsiponi te hipus me na mi limiou u hihatuts tere Sunahan bate kukute miou u hihatuts turu katunura i manasa? ⁴ E Sunahan e ranga me poeiena, ‘Hapaneiam u tamamilimiou na u tsinamilimiou. A katuun te ranga homi nena e tamanen tsi e tsinanen egi atung hamate korui.’ ⁵ Kaba u hihatuts i tamilim-iou e poeiena, ‘A katuun te ka mena a ka te tatei taguhena e tamanen tsi e tsinanen, nonei e tatei poeiena, A ka teka a ka tere Sunahan.’ ⁶ Ba u raranga te poeiena, ‘Hapaneiam e tamamilimiou’ ema la uanei tara katuun teka. Tamar ranga uami limiou. E markato uana teka, alimiou e roron hala putemiou u raranga tere Sunahan te kukute mena milimiou u hihatuts turu tubumilimiou. ⁷⁻⁸ Alimiou u katuun u gamogamo! E propet Aisaia e ranga hamana koruia tara markato i tamilimiou, me poeiena,

‘U katuun teka e hatsunono tune ria lia turu ranga
 tuun i taren,
 kaba i toriren na turu hakhakats i taren e ka
 halehana ba koru nariou lia.
⁹ Nori e mastein hatsunone riou lia,
 kaba nori e roron hihatuts ner a man markato
 turu katuun tuun,
 bate poeier e hihatuts ner a man markato tere
 Sunahan!’ ”

*A man ka te kato hakorkoriana hamana rena u
 katuun
 (Mak 7:14-23)*

¹⁰ Be Iesu e ngö mera nei u katuun i tanen me
 poeiena, “Hengoiam, ba limiou te ateimiou! ¹¹ A
 ka te la uana i runguna katuun ema kato hakorko-
 riane nei a katuun. Kaba a ka lasi te lakasanama
 i runguna a katuun te kato hakorkoriane nen.”
¹² Ba u katunun tsitsilo e la uarima i tanen memi
 poeier, “U Parasi ema hanigeri u raranga te katoe
 mula lö ba nori e raharahar.” ¹³ Be Iesu e poeiena,
 “Noahasina. U katuun teka e hereri u pulung
 u omi te ka ria tara kui tere Tamar. Nonei e
 pate baba ranoen. ¹⁴ Nori e hererari u katuun u
 matakiau te peigiraier a palai. Ba tara pöata te
 peigena a töa katuun a matakiau a tana matakiau
 has ba nori te rus hoboto uar i kiou.”

¹⁵ Be Pita e poeiena i tanen, “Alö go hatei ramei
 lam a ka te poeiena u haharuei te katoe mula
 lö.” ¹⁶ Be Iesu e poeiena i taren, “Alimiou ema ka
 noahas memi ta niatei. ¹⁷ Alimiou go atei sileiam,
 a mamanaka te tasuna i runguna katuun e la uana
 i torinen batena lakasa ba pouts banena u tuenrei.
¹⁸ Kaba manka te lakasa nama turu rung e la
 nama i torina a katuun. Nonei a manka te kato

hakorkorianena a katuun. ¹⁹ Na manka man omi teka e la nama tara katuun: u hakats u omi na hipöli na tsikolo na kop na u ranga u gamo, na u tuts. ²⁰ A manka teka te kato hakorkorianena a katuun. Kaba tegi nou menai a kannou ualima u tabuna galus, a ka teka ema kato hakorkoriane nei a katuun.”

*A nihamana tara töa tahol
(Mak 7:24-30)*

²¹ Be Iesu e la ba nena a han teka me la uana tara han turu katuun tema Jiu ri te sukuukuia tara man taun i Taia na i Saidon. ²² Ba töa taholuna tara provins i Kenan te kaia tara han teka e la uana i tanen bena ranga hataatagina i tanen me poeiena, “O Tsunono, a Hatutubunei tere Devit! Alö go taatagi namou lia! Uliliahanei u omi e karia tara pien tahol i tar!” ²³ E Iesu ema ranga töa nai tatsi töa tatsi ranga i tanen. Ba u katunun tsitsilo e la uarima tere Iesu me ranga hatagala meren, “Hala ban! Taraha, nonei e kukute mera neira u tabe.”

²⁴ Be Iesu e ranga palisina me poeiena, “E Sunahan e hala sil puku me melia u katunura i Israel te taiar. Na lö ema Jiu mi.” ²⁵ Kaba a tahol e lama memi hatukunna i matanen me poeiena, “O Tsunono, taguhe moulia!”

²⁶ Be Iesu e ranga palisenen, me poeiena, “E ma matskö nei tegi lu menai a kannou tara galapien bate ba naria turu muki.” ²⁷ Ba tahol e hatanganana, “U mana koru, o Tsunono. Kaba u muki e roron nou noa haser a matsi kannou te pururukuna turu tebol turu Tsunono i taren.” ²⁸ E Iesu e atei sil temar hakats uu a tahol teka. Ba Nonei e ranga palisenen me poeiena, “U nihamana i

tamölö e tagala koruna. Na ka te ngile mölö e butu hamanasana.” Ba pien tahol i tanen e niga pouts hamanasana hasina.

E Iesu e kato haniga poutsir u katuun u parpara

²⁹ Be Iesu e laba nena a han teka me sila uana i rehina Ramun a Perperere i Galili. Ba nonei ena seinu turu pokus me gumna. ³⁰ Bu katuun u parpara e la uarima i tanen, me la merima u katuun ti ma antunan tataalai, na u korus, na u matakiau, na u katuun u biru, na palair u katuun has u parpara ti kamei a siki, me haka rarien i mouna e Iesu. Ba nonei e kato haniga pouts ranen. ³¹ Ba u katuun e asingoto koruner ti hengo menaien ti ranga uu biru, na ti tara meraien u katuun u korus na u katuun tima antunan tataalai i niga pouts, na u katuun u matakiau i tara pouts. Ba nori i soloseier e Sunahan a Tsunonona i Israel.

*E Iesu e hanour a 4,000 tara katuun
(Mak 8:1-10)*

³² Be Iesu e ngö gögono rena u katunun tsitsilo i tanen me poeina, “Alia e taatagi koru regu u katuun teka, taraha nori i ka gono meiou lia turu topisa u lan bate moana ta ka tegi noueien. Alia e raman hala kalakala meragien a bes, taraha nori ena mots tutupu ria i maroro.” ³³ Ba u katunun tsitsilo i tanen e rangate ren, “Ime te sabie roara ta kannou tega antunaia turu katuun u parpara koru teka tegi hanou raien?” ³⁴ Be Iesu e rangata ranen, “A lahisa beret te ka memi limiou?” Ba nori e poeier, “A tohit a beret na matsi iena has.” ³⁵ Be Iesu e ranga mera nei u katuun egi gum ia turu tsiktsiki. ³⁶ Ba nonei e luena a tohit a beret na matsi iena, me haniga uana tere Sunahan, me

pose ranen me hala raneien u katunun tsitsilo, ba u katunun tsitsilo e molamola rarien u katuun. ³⁷ Ba nori hoboto e nour me masulur. Ba u katunun tsitsilo e luer a tohit a kalobaka a saputu tara man nouba i taren. ³⁸ U hihase turu katuun ti nou e noaia tara 4,000 tara pal tson peisa, kaba a touhaliou na galapien ima ase rai. ³⁹ Be Iesu e töan hala kalakala rena u katuun, ba nonei e osana tara tolaala, ba nonei e la uana tara pal han i Magadan.

16

*U katuun i ngilin tarein tu mirakol
(Mak 8:11-13, Luk 12:54-56)*

¹ Na tara pöata ti lama u Parasi na u Sadiusi tere Iesu. Ba nori e rangate rien tegi hatara meraien tu mirakol tego harötein a nitagala tere Sunahan. ² Be Iesu e ranga palis ranen me poeiena, “Pöata te tsirukuna a pitala ba limiou te pemiou, ‘Ara e ka merou a pöata a niga, taraha u kolö e röröna.’ ³ Ba tara bongbong, ba limiou te pemiou, ‘A langits e polo nou i romana, taraha u kolö e röröna na e ruruhanana bate tara here nei a langits.’ Alimiou e atei silemiou te mouna uana a mar nitaratara i kolö. Kaba limiou ema atei silemi te mouna uana a man hiharöto tara kapakapana pöata. ⁴ U katuun u omi ti hapolasa hakapa ban e Sunahan e kato siler tegi tara menaien tu mirakol. Kaba lia ema tatei haröto nagi tu töa tu mirakol. A hatöatongo lahas tere Jona a propetina i manasa te hatara ragi lia alimiou.” Be Iesu e la ba ranen.

*U is turu Parasi na u Sadiusi
(Mak 8:14-21)*

⁵ Ba tara pöata tina tukuia u katunun tsitsilo tere Iesu i hapalana Ramun, ba nori e töan hakats sabe ner ti solopala mena leien ta beret. ⁶ Be Iesu e poeiena i taren, “Alimiou go tarakap hanigaiam bate hanei silemou u is turu Parasi na u Sadiusi.”

⁷ Ba nori e taniaan hiararanga pouts ria i taren me poeier, “Nonei e mar ranga uana teka, taraha ara ema lue rimei ta beret.” ⁸ Ba pöata te atei sileia e Iesu a saha ka ti hiararanga naien, ba nonei e poeiena i taren, “A tsi nihamana i tamilimiou e tetenei koruna. E hana ba limiou te hiaraharaha pouts silemiou tema lu mena mumei limiou ta beret? ⁹ Alimiou bema atei noa hasmi? Alimiou go hakats pouts neiam ti posepose mena mei lia a tolina a beret tara 5,000 tara katuun na man kalobaka ti ongo hasaputeiam limiou. ¹⁰ Na limiou go hakats pouts has naiam a tohit a beret tara 4,000 tara katuun na man kalobaka ti ongo hasaputeiam limiou. ¹¹ E ha koruna ba limiou tema atei sile mulei, alia ema ranga silegulei a beret? Kaba hanei sileiam u is turu Parasi na u Sadiusi!”

¹² Ba u katunun tsitsilo i tanen e töan atei sil taler nonei ema ranga silei u is te katoeri a beret, kaba nonei e ranga sil tegi hanei sil meien u hihatuts u omi turu Parasi na u Sadiusi.

*E Pita e ngöei e Iesu e Mesaia
(Mak 8:27-30, Luk 9:18-21)*

¹³ Pöata te la uu e Iesu tara han i Sisaria Pilipai, ba nonei e rangata rena u katunun tsitsilo i tanen me poeiena, “U katuun e ngöeri, Alia tu butun Katunuma, esi?” ¹⁴ Ba nori e ranga palise ren me poeier, “A palai e poeier alö e Jon a Tsonun

Baptais, na palai e poeier alö e Ilaitsa na palai e poeier alö e Jeremaia tsi alö a töa turu propet.”

¹⁵ Be Iesu e poeiena taren, “Ga limiou e pemiou alia esi?” ¹⁶ Be Saimon Pita e ranga palisenen me poeiena, “Alö e Mesaia te hopö kapiin e Sunahan. Alö a Pien Tson tere Sunahan te töatöa nitöana.”

¹⁷ Be Iesu e poeiena i tanen, “O Saimon a pien tson tere Jona, e Sunahan e kalale noulö! Taraha a niatei teka ema hatei nelalei ta katuun tuun. Kaba e Tamar te kana i Kolö te hale nameien lö. ¹⁸ Na lia e hateie goulö, alö e Pita, a hatu. Na ieluna a hatu teka alia e hatakeiegoa a luman lotu i tar i tanen. Na nitagala tara tou mate ema antunan tagala saluhe ba na nouien. ¹⁹ Alia e hale goi lö a kii na tara Nipepeito tere Sunahan. A saha ka te kitse moalö i puta, e kits hase roa i Kolö. Na saha ka te haniga namoa lö i puta, e haniga has naroo i Kolö.” ²⁰ Be Iesu e ranga hatagala merena u katunun tsitsilo i tanen egima tatei hate ii ta katuun nonei e Mesaia.

*E Iesu e rangein u kamits na tou mate i tanen
(Mak 8:31–9:1, Luk 9:22-27)*

²¹ Tara pöata teka e Iesu e tansion hatei ri u katunun tsitsilo i tanen tega mate uen ba nonei e poeiena, “Alia e la uagou i Jerusalem balia tena sagoho kamits goa i limar u tsunono, na u pris pan, na u tson hihatuts tara Lo. Ba nori tena atung hamate riou lia, ba lia te takei pouts gou turu hatopisana u lan.”

²² Be Pita e lu mena neien i harerehi mena ranga hapiou menen me poeiena, “O Tsunono, e Sunahan ega hapioun a ka teka! Ego ma tatei butu koruia i tamölö!” ²³ Be Iesu e habiritsina

me poeiena tere Pita, “Lau i murir o Satan! Alö e hatu kap namou lia. Taraha alö ema hakei mia u hakkakats i tamölö tere Sunahan. Alö e ka lasmem u hakatsin a katuun tuun!”

²⁴ Be Iesu e poeiena turu katunun tsitsilo i tanen, “Esi te ngilin kukute nanou lia ega solopali a mananaka te ka uana i peisanen, bate töan söatena a kuruse i tanen bate kukutie nou lia. ²⁵ Esi te pile kap haröto nena a nitöatöa i tanen e tia ba nanouen. Kaba a katuun te mate silena te ngil mena neien lia, nonei ena sabie nou a nitöatöa te ka nitöana. ²⁶ Tega lueia ta katuun a mananaka hobotona i puta, kaba nonei e hatia hakapi a nitöatöa i tanen, ga mananaka teka e mar taguhu menoi ena ime? Nonei e hala nanou ta saha ta ka bate lu poutse nou a nitöatöa i tanen? ²⁷ Alia lahas tu butun Katunuma te la gono meguma romana u angelo i tar turu ualesala pan tere Tamar, ba lia temi hala palis ragoui u katuun ti kato homi a ka a omi na u katuun ti kato haniga a ka a niga. ²⁸ Alia e hatei hamana ragou limiou, a palair u katuun te tuolur teka ema antunan materi, e antunana tegi tara menien Alia tu butun Katunuma ena la here gumei romana a king.”

17

U tuenrei tere Iesu e palis

(Mak 9:2-13, Luk 9:28-36)

¹ I murina u tönomo u lan be Iesu e lue raiena ere Pita, na u muntoulana ere Jemis mere Jon, me peigi pepeisa mera neien ieluna u pokus u pannen koru. ² Ba tara pöata ti tara uaien tere Iesu, ba nori e tareier te palis uu tuenrei tere Iesu: a matanen e alesala herei a pitala, na u hasobö i tanen e hiakan

töa bate alesala hatagala koruna. ³ Be Mosis mere Elaitsa e songotei butu hasingoto ria i rehinen be ranga gono meren.

⁴ Be Pita e ranga me poeiena tere Iesu, “O Tsunono, e nigana te ka uariara teka. Tego ngil ia lö, ba lia te kuiegou a topisa taluhu teka, a töa i tamölö, na töa tere Mosis, na töa tere Ilaitsa.”

⁵ Tara pöata te ranga noaien, bu köasi u alesala koru emi hoho ranen ba u töa u raranga e butu nama turu köasi me poeiena, “Nonei a Pien Tson a tsomi koru i tar teka. Alia e haniga korue gen. Alimiou ego hengoe men!” ⁶ Pöata ti hengoeia u katunun tsitsilo u raranga teka ba nori e matout korur, me tuhatukun rana i puta.

⁷ Be Iesu e la uanama i taren me sebele ranen me poeiena, “Takei iam. Alimiou goma matoutmi!”

⁸ Ba pöata ti tara seien ba nori e tareier e Iesu pepeisa. ⁹ Pöata ti koul puta men turu pokus be Iesu e ranga mera nen, “Alimiou ema tatei hatei moi ta töa ta katuun aha te tara muma limiou e antunana te takei pouts goa lia, Alia tu butun Katunuma, tara tou mate.”

¹⁰ Ba u katunun tsitsilo e rangateier e Iesu, “Taraha tsiponi ba u tson hihatuts tara Lo te poeier e Elaitsa ega mam nema e Mesaia?” ¹¹ Be Iesu e ranga palis ranen me poeiena, “E Elaitsa ena la mam pouts hamana nama ba nonei temi kato hamatsköena a mamanaka. ¹² Na lia e hatei ragou limiou e Elaitsa e la hakapama, kaba u katuun ima tara mareien ba nori e markato hohomi menar-ien ti mar ngil uaien. Na nonei noahas tena markato hohomi has merorien lia, Alia tu butun Katunuma.” ¹³ Ba u katunun tsitsilo i tanen e töan

atei siler nonei e ranga meraien e Jon a Tsonun Baptais.

E Iesu e kato haniga poutsi a pien tson te kamei a liliahanei a omi

(Mak 9:14-29, Luk 9:37-43)

¹⁴⁻¹⁵ Pöata ti la uamen turu katuun, ba töa katuun e la uanama tere Iesu, me hatukunna i matanen me poeiena, “O Tsonono, alö go taatagi nema a pien tson i tar! Nonei e roron kotskotsi-bonguna na peisanen e omi koruna, na nonei e roron rus uana turu tula na iahana ramun. ¹⁶ Alia u la mena meien turu katunun tsitsilo i tamölö, kaba nori ima antunan kato hanigeien.”

¹⁷ Be Iesu e ranga palis ranen me poeiena, “Al-imiou u katuun u hahamana koru na limiou ema matskömi! A lahisa pöata ti ka gono meraia lia limiou? Na lahisa pöata ti söateia lia u nikamits i tamilimiou? La mena mumei a pien i tar!” ¹⁸ Be Iesu e tsuga barena u liliahanei u omi ti kaia tara pien, ba nonei tara tsi pöata puku noahas ba pien tson e niga poutsuna. ¹⁹ Ba u katunun tsitsilo e la uarima tere Iesu memi rangata momouse ren, “E hana ba lam tema antunan tsuga ba ramulei u liliahanei u omi?”

²⁰⁻²¹ Be Iesu e poeiena i taren, “Taraha, a tsi nihamana i tamilimiou e tetenei koruna. Na lia e hatei hamana koru ragou limiou, Sanena u nihamana i tamilimiou ega popoia tara ngalin mastet, alimiou e tatei peimiou turu pokus teka, “Takei ban a makum teka bate la uamula ili,’ ba nonei te takei hasina bate lana. Ba limiou te tatei katoe mou a mamanaka.”

E Iesu e ranga lenin tegana mate uen bate takei poutsuna

(Mak 9:30-32, Luk 9:43-45)

²²⁻²³ Ba pöata ti gono hobotoia u katunun tsitsilo i Galili, be Iesu e poeiena i taren, “Alia tu butun Katunuma e susukun hala menari i limar u katuun tena atung hamate riou lia. Kaba turu hatopisana u lan ba lia te takei pouts gou.” Ba u katunun tsitsilo i tanen e taatagi korur.

E Iesu e hol a takis tara Luman Lotu Pan

²⁴ Ba tara pöata te la uu e Iesu na u katunun tsitsilo i tanen i Kapenyum, ba u katunun lulu monina tara Luman Lotu Pan e la rima memi rangateier e Pita, “A tson hihatuts i tamilimiou e hol hasena a takis tara Luman Lotu Pan, tsime?” ²⁵ Be Pita e poeiena, “Aa.” Ba tara pöata te tasuia e Pita i luma me katsin rangana, be Iesu te ranga mam tsiponna i tanen me poeiena, “O Saimon, u saha u mar hakats i tamölö? Esi te holena a takis turu king tara man han i puta? U katuun hamatskö tere king tsi u katuun halhal?” ²⁶ Be Pita e ranga palisenen me poeiena, “U katuun halhal.” Be Iesu e poeiena, “Aa, Na tega markato has uen i tarara. ²⁷ Kaba, ara ena mots kato haraharaha raiera u katuun teka. Lala i ramun balö tena lase muma ta iena. A iena tutuun tena lase mölö alö na hoso hapange mou a rungunen bate sabie mou a töa a moni, balö tena lue mumen batemi hole mien a takis i tarara.”

18

A katuun te kapanina

(Mak 9:33-37, Luk 9:46-48)

¹ Nonei tara pöata teka ba u katunun tsitsilo e la uarima tere Iesu memi rangateren, “Esi kuru te pan balana tara Nipepeito tere Sunahan?” ²⁻³ Be Iesu e ngöena a pien a tetenei me hatuole nen i gusuren me poeiena, “Alia e hatei hamana kuru ragou limiou. Tema habirits ba namoi limiou a markato a omi, bate here rami a galapien u tetenei, alimiou ema antunan tasu noahas mia tara Nipepeito tere Sunahan. ⁴ A katuun te hala puteiena a peisanen bate here nei a tsi pien a tsi tetenei teka, nonei te pan kuru noa tara Nipepeito tere Sunahan. ⁵ Na e si a katuun te toul hatamiena a mar pien teka, nonei e toul hatami hase noulia.”

*A markato a omi te kato homiena u nihamana
(Mak 9:42-48, Luk 17:1-2)*

⁶ E Iesu e ranga noa me poeiena, “Esi ta katuun te las meranoi a galapien te hamana uar i tar tara markato a omi, e niga bala nena tegi hakits mei a hatu pan i totongolona a katuun teka batena harukue ria i gusuna tasi. ⁷ A nomi pan e butu noa romana turu han i puta, taraha a katuun a omi e gono te kato homiena u nihamana turu katuun. Kaba a nomi pan e butu noa romana tara katuun te habute nen! ⁸ Tega kato homieia a limamölö tsi a moumölö alö, balö te ngats kotsemen bate banamen! Taraha, e niga bala nena tego kamei lö u töa puku u ualima, tsi u töa puku u mou, balö te töan luemou a nitöatöa te ka nitöana. Kaba ema niganei tego kamei lö u huol u ualima tsi u huol u mou balö te lapo baneria turu tulana i hel te ka nitöana. ⁹ Na tega kato homieia a matamölö alö, balö te hasemen balö te banamen. E niga bala nena tego kamei lö u töa puku u mata balö te töan

luemou a nitöatöa te ka nitöana. Kaba ema niganei tego kamei lö u huol u mata balö te baneria turu tulana i hel te ka nitöana.”

U haharuei tara sipsip te taia

(Luk 15:3-7)

¹⁰ Be Iesu e poeiena, “Alimiou go haneiam möa tu sigaleiam ta töa tara galapien teka. Na lia e hatei ragou limiou, u angelo i taren e tarakapin töa raren te ka rien tere Tamar i Kolö. ¹¹ Taraha, Alia u butun katuun silema tegomi lu pouts merai u katuun hoboto ti taia. ¹² Na u saha u mar hakats te ka memi limiou tara katuun te kamena a 100 tara sipsip ba töa i taren te taiana? Nonei e la ba ranou u 99 tara sipsip bate karia turu pokus ba nonei tena sakiena a sipsip te taiana. ¹³ Bora, gate sabe poutsenoen a sipsip te taia, alia e hatei hamana nitöa ragou limiou, nonei e sasaala koru lasmenou nonei a töa sipsip te taia, batema hakats sil ranei a 99 tara pal sipsip tima taia ii. ¹⁴ Nonei tema ngil benei e Tamamilimiou i Kolö ta töa tara galapien u tetenei teka ega taia.”

A hatoulana te kato homi

¹⁵ E Iesu e ranga lel me poeiena, “Tega kato homieia a hahatoulana i tamölö alö, balö te la uam i tanen ba limiou a huol te ka pepeisamiou balö te hatei mien a markato a omi i tanen. Te hengo talenoien u raranga i tamölö, ba limiou te ka haniga pouts miou. ¹⁶ Kaba tema hengoe neien lö, balö te luem ta töa tsi ta huol ta katuun bate la gono meriou lö. Ba huol tsi a topisa katuun te tatei hitaguhu ria turu ranga bate hatagaleren. ¹⁷ Kaba tema ngilin hengo naneien u raranga i taren, balö te hatei rem u katunun kui turu lotu. Na tema

hengo noa hase neien u raranga i taren, ba limiou te kato here namien a katuun tema tahongo neia turu lotu, tsi te lehana banena u lotu.”

A ka te hapiou ner na te hanigeier

¹⁸ Be Iesu e poeiena, “Na lia e hatei hamana koru ragou limiou, a saha ka te kitse mialimiou i puta, e Sunahan e kits hasenouen i Kolö. Na saha ka te purese mialimiou i puta, e Sunahan e hapurese hase nouen i Kolö. ¹⁹ Ba lia te hatei hamana koru len ragou limiou, tegi singo sileia ta huol i tamilimiou ta ka i puta teka, bate haniga hoboto naren, ba e Tamar i Kolö te kato beranoi limiou a ka te singo sile milimiou. ²⁰ Na tegi gonoia a huol tsi a topisa a katuun tara solor, alia e ka gia i gusuren.”

A katunun pepeitokap tema taatagi nei

²¹ Be Pita e la uanama tere Iesu me rangatenen, “O Tsunono, a lahisa pöata tego ranga hataatagi ia lia tere toular bate solopalena a markato a omi i tanen, bate tara poutse noulia? Ega para hapopoia tara tohit a pöata?” ²² Be Iesu e poeiena i tanen, “A tohit a pöata puku ema antunanei. Alö go ranga hataatagia i tanen a tohit a pöata, na tana tohit lel a pöata bate kato talasina.

²³ “E markato uana teka, a Nipepeito tere Sunahan e herenei a king te katsin hakapena a haroho turu katunun pepeitokap i tanen. ²⁴ Ba pöata te tanian kato hamatsköeien a haroho, ba nori emi piou ner a töa katunun pepeitokap te kamei a haroho te antunaia turu 10 milion kina. ²⁵ Kaba nonei ema antunan palis poutse ii a haroho teka. Ba king e poeiena turu katunun pepeitokap

i tanen, ‘Alimiou go hahol neiam a tson teka na tahol, na galapien, na mamanaka hoboto i tanen. Ba moni te hol rarouien te palis poutse roi a haroho i tar.’ ²⁶ Ba katunun pepeitokap e tuhatukun nena i puta be ranga hataatagi tori koruna i tanen me poeiena, ‘Alö go hahaloso noa bum ba lia te palis poutse gou a man haroho hoboto i tamölö.’ ²⁷ Ba king e taatagi nena a katunun pepeito kap i tanen be palis hakapan töa nena a man haroho i tanen me hapurese poutsenen.

²⁸ “Ba nonei a katunun pepeitokap teka e lana me hitupali mena a hahuol i tanen, te ka hasmei a haroho i tanen e antunaia tara 100 kina puku. Ba nonei e pile nanen i totongolonen me poeiena, ‘Alö go palis poutsema a haroho i tar!’ ²⁹ Ba hahuol i tanen e tuhopö nena i matanen ba e ranga hataatagi tori koruna i tanen me poeiena, ‘Alö go hahaloso noa bum balia te palis poutse gou a haroho i tamölö.’ ³⁰ Kaba nonei ema ngil ii ba nonei ena hakei nen tara karabus e antunaia te palis poutseien a haroho.

³¹ “A pöata ti tareia u palair u katunun pepeitokap a ka teka ba nori e raharaha korur mena hateieri e king a mamanaka hoboto te butu. ³² Ba king e ngöeiena a katunun pepeitokap teka me poeiena i tanen, ‘Alö a katuun a omi koru! Alia u palis bei lö a haroho pan tu katoia lö i tar, taraha alö u ranga hataatagi tori koruia i tar. ³³ Ga lö go mala taatagi hasnela a hahuol i tamölö ti mar taatagi has mei lia alö!’ ³⁴ Ba king e raharaha koru talana me hala mena neien tara karabus, tegona sagoho kamits uen bate antunana tara pöata tego palis poutseien man haroho hoboto.”

35 “Nonei te markato has meranoi limiou, e Tamar i Kolö tegoma solopala mena milimiou a markato a omi tara palair u katuun, e antunana tena tara pouts ramouen limiou.”

19

U hihatutsina te hiamramama uar u muntahol (Mak 10:1-12)

¹ Pöata te ranga hakapa naia e Iesu a manka teka, ba nonei e laba nena i Galili me la pouts uana tara han i Judia i hapalana Ramun i Jodan. ² Ba u katuun u parpara koru e kukutie ren, ba nonei e kato haniga pouts ranen ti kaien.

³ Ba palair u Parasi e la uarima i tanen memi torohane ren me poeier, “A Lo i tarara e haniganena tega laba menai a tson a tahol i tanen?” ⁴⁻⁵ Be Iesu e ranga palis ranen me poeiena, “Alimiou u rit haniga haseiam u raranga te kana turu Buku u Göagono te poeiena, “tara tantania e Sunahan e kato raien a tson na tahol, Nonei te laba silanena a tson e tamanen na e tsinanen batena ka gono mena a tahol i tanen ba nori a huol te katoeier u töa puku u tuenrei.’ ⁶ Nori ema huol len talari, kaba u töa puku u tuenrei. Na sahaka te kits takono hakapi e Sunahan, e möa ta töa ta katuun tega antunan purese kalakala pouts leleien.”

⁷ Ba u Parasi e poeier i tanen, “Ga tara ha tsiponi be Mosis te hala nena a lo te poeiena a tson e tatei kolotena u pepa tega tsuga menaien a tahol i tanen?” ⁸ Be Iesu e poeiena i taren, “Mosis e hala mei u raranga teka i tamilimiou, taraha alimiou u katuun u hhipus, kaba tara tantania e möa taka tega markato uu teka. ⁹ Na lia e ranga mera

goulimiou, a tson te laba nena a tahol i tanen, ba tahol tema kaka gono menei ta tabina ta tson, ba tson i tanen tena töl lelana a tabina tahol, nonei e katoena a markatona tara tsikolo.”

¹⁰ Ba u katunun tsitsilo e poeier i tanen, “Tega markato tala uaien teka ba tson na tahol, tema antunan hitölrri.” ¹¹ Be Iesu e ranga palisina me poeiena, “U raranga teka ema tatei la uanei turu katuun u parpara, kaba e Sunahan e hala hasiin a nitagala turu palair u katuun tegima hitöl uaien.

¹² Palair a pal tson tema antunan hitölrri, nori i mar posa merai teka. Na palai ema hitöl meri ti hapö uaien. Na palai ema hitöl meri, taraha nori e ngilin kato ner a toukuina tara Nipepeito tere Sunahan. Kaba tson te antunan kukutiena u raranga teka, e tatei kukutie nen.”

*E Iesu mera galapien u tetenei
(Mak 10:13-16, Luk 18:15-17)*

¹³ U katuun i la mera mei a galapien u tetenei tere Iesu, tegomi hatakopo menaien a limanen i taren bate singo uana tere Sunahan. Ba u katunun tsitsilo i tanen e ranga haraharaha ria i taren. ¹⁴ Be Iesu e poeiena, “Haka baraiam a galapien gi la uama i tar, ma hapiou rami, taraha a Nipepeito tere Sunahan e ka uana turu mar katuun teka.”

¹⁵ Ba nonei e hatakopena a limanen i taren me lana.

*A tson moni a hitots
(Mak 10:17-31, Luk 18:18-30)*

¹⁶ Ba töa katuun e la uanama tere Iesu me poeiena, “Tson Hihatuts, a saha ka a niga tego kati lia balia te luegou a nitöatöa te ka nitöana?” ¹⁷ Be Iesu e poeiena i tanen, “Taraha balö te rangate

milia saha ka te nigana? E Sunahan puku a töa te nigana. Te ngilin lue mialö a nitöatöa te ka nitöana, ba lö te kukutiem a man raranga tere Sunahan.”

¹⁸ Ba nonei a katuun e rangatenen, “A man saha man raranga?” Be Iesu e ranga palisenen me poeiena, “Alö goma atung hamatei a tana katuun. Na lö goma kope ii a ka tara tana katuun. Alö goma gamogamoi. Na lö goma tsikolo ii. ¹⁹ Alö go hapani e tamamölö na e tsinamölö. Na lö go ngili a tana katuun temar ngil hasmena milö a peisamölö.”

²⁰ Ba tson a hitots e poeiena i tanen, “Alia e kukutiegu a man raranga hoboto teka. Ka ha lel tego kati lia?” ²¹ Be Iesu e poeiena i tanen, “Te ngilin butu haniga koru mia lö i matana a Tsunono, balö tena hahol ba nem a mamanaka i tamölö balö te hala rami u katuun ti möa ta ka ta moni, balö te kame mou a mamanaka a nigana i Kolö. Balö te kukutie moulia.” ²² Ba pöata te hengoeia a tson a hitots a ka teka, ba nonei e taatagi koruna me lana, taraha nonei e kamei a moni na mamanaka.

²³ Be Iesu e poeiena turu katunun tsitsilo i tanen, “Alia e ranga hamana koru mera goulimiou, a katuun te kamena a moni a parpara ema antunan tahongo boroboro neia tara Nipepeito tere Sunahan. ²⁴ Na lia e hatei lel ragou limiou, ema antuna koru lasnei tega la uu a katuun te kamena a moni a parpara koru tara Nipepeito tere Sunahan, temar kato has uana a kemol te katsin sipina tara tsi tabutu tara salum.”

²⁵ Ba pöata ti hengoeia u katunun tsitsilo i tanen a ka teka, ba nori i asingoto korur me poeier, “Gesi te antunan ka haniga nou?” ²⁶ Be Iesu e tara uana i taren me ranga palis ranen, “Turu katuun tuun

ema antunari, kaba tere Sunahan a mamanaka e hahankana.”

²⁷ Be Pita e poeiena tere Iesu, “Alam u laba nema a mamanaka me kukutie mumoulö. Ga lam e lue mou aha?” ²⁸ Be Iesu e poeiena i taren, “Alia e ranga hamana koru meragou limiou, tara han a tsimus i murimuri, tena gum goa Lia tu butun Katunuma turu Gungum u Göagono i tar, ba limiou u katuun te lala gono memou lia tena gum has moa turu maloto na u huol u gungum u göagono turu king, bate taratarakap ramou u maloto na huol tara pal katunura i Israel. ²⁹ Na u katuun hoboto te hakats nariou lia bate labaner u luma i taren na u toularen nu hahinaren na u tamaren nu tsinaren, na galapien i taren na u tsiktsiki, nori ena lueriou a parpara koru lel a ka, bate lu hase riou a nitöatöa te ka nitöana. ³⁰ Kaba u katuun u parpara koru ti mammam ena murimuri riou, ba u katuun ti murimurima tena mam riou.”

20

U katunun kui tara kuin grep

¹ Be Iesu e poeiena, “A Nipepeito tere Sunahan e here nei a katuun terena kuin grep te la bongbong silena tegona sake menaien ta katuun tegona kui ia tara kuin grep i tanen. ² Na pöata ti haniga naien tegi hol meraien a 1 kina tara man töa man lan, ba nonei e töan hala mera neien tara kuin grep.

³ “Ba tara pal 9 kilok tara bongbong ba nonei la uana tara makumun töana, bena tara rena a palair u katuun ti möa ta toukui ti tutuol puku. ⁴ Ba nonei e ranga mera nen, ‘Alimiou egona kui mia tara kuin grep i tar balia te hol ragoui limiou a hihol a

matskö.’ Ba nori e lar. ⁵ Ba nonei lalen ponina tara pal 12 kilok na tara 3 kilok, ba nonei ena markato has uana iesana.

⁶⁻⁷ “Ba tara pal 5 kilok ba nonei e la lenina bena tarena a palair u katuun bate tutuol puku ponir. Ba nonei e poeiena i taren, ‘Aha te hakapa pinopino sile milimiou u lan u ohots teka batema kuimi?’ Ba nori e ranga palise ren me poeier, ‘E möa ta katuun tega hala railam ta toukui.’ Ba nonei e poeiena, ‘La tala iam batena kui mia tara kuin grep i tar.’

⁸ “Ba pöata te lahima ka, ba katuun terena kuin grep e ranga mena a tson mammam i tanen. ‘Ngö rema u katunun kui bate hala ramien a man hihol i taren, taniama tara pala te hagoun kui tuun lila, balö te töan hol ramou a pala te kui mam lila.’ ⁹ U katuun ti taniaan kui mei a pal 5 kilok i holrai a man 1 kina 1 kina tara a man tötäa. ¹⁰ Ba pöata ti holraia a pala ti kui mam, nori i pei lasi egi gamon lusei a hihol i taren. Kaba nori i hala hasrai a man 1 kina 1 kina puku has tara man tötäa. ¹¹⁻¹² A pöata lahas ti lu hakapeien a moni i taren, ba nori te raharaha hamanaseier a katuun terena kuin grep, ‘U katuun te hagou kui lila e kui pukue lila a töa aua, ba hihol i taren te hihinatue tsipon mena a hihol i tamulam. Kaba lam e kui noa mula i bongbong me lana i gusuna pitala a hiski mena antunan töa nena a lahi, balö te hol tsipon ramule lam a mar hol te hol ramuleien lö!’

¹³ “Ba katuun terena kuin grep e ranga palisena a töa katuun i gusuren, ‘A tsi hahikapien, Alia ema kato homi gia i tamölö. Alö e hatangana namula tego kui sil mei lö a 1 kina turu töa u lan.

¹⁴ Bara, lu talei a hihol i tamölö ba lö te lam. Alia e

ngilin mar hol has menagi a katuun te hagou kui lala temar hol has mena lilei lö. ¹⁵ Alia e tatein markato menagi a moni i tar temar ngil uagu lia. Te tangana nagia lia a manka i tar, alö goma tatei hiomi ii.’”

¹⁶ Be Iesu e poeiena, “U katuun ti hamurimuri nori tena mamir romana, na u katuun ti mam-mam nori tena murimurir romana.”

E Iesu e ranga hatopisein a tou mate i tanen
(Mak 10:32-34, Luk 18:31-34)

¹⁷⁻¹⁸ Pöata te laia e Iesu i Jerusalem, ba nonei e lu halhal rena a maloto na huol a katunun tsitsilo i tanen, ba nonei e rangana i taren tara pöata ti tataalaien i maroro. “Ara e la talara i Jerusalem, ba Alia tu butun Katunuma tena hala neroa turu pris pan na turu tson ateï tara Lo. Ba nori tena kout nariou lia bate kitser u raranga tegi atung hamate menai lia. ¹⁹ Ba nori te hala lel naroa lia turu katuun tema Jiu ri, ba nori tena hahakos ria i tar bate lahuse riou lia, bate nila naria lia tara kuruse. Ba turu hatopisana u lan balia te takei pouts gia romana tara tou mate.”

U ngil tara galapien tson tere Sebedi
(Mak 10:35-45)

²⁰ Be tsinar a galapien tson tere Sebedi e la uarima tere Iesu na huol a pien tson i tanen, be tsinaren e hatukunna i matana e Iesu, me rangata nena tega haniga mei e Iesu u ngilngil i tanen. ²¹ Be Iesu e poeiena i tanen, “Aha te ngile mölö?” Ba nonei e ranga palisenen me poeiena, “Alö go haniga ba huol a pien tson i tar teka tena gum gono meriou lö romana tara pöata tena king möalö, a töa tara pal matou na tabi tara pal keruka.”

²² Be Iesu e poeiena i taren, “Alimiou ema atei silemi a ka te rangata nami limiou. Alimiou e antunan ua mia tara kap tena ua goa lia ba limiou tena sagohe mou a kamits tena sagohe gou lia?” Ba nori ranga palise ren me poeier, “Alam e antunam.” ²³ Be Iesu e poeiena, “Alimiou ena ua moa tara kap i tar. Kaba lia ema antunan hopö kap nagi esi tena gum noa tara pal matou na tara pal keruka i tar. E Tamar puku lahas te hopö kapiin u katuun tegi lui a man makum teka.”

²⁴ A pöata ti hengo naia a maloto a katunun tsitsilo u raranga teka, ba nori e raharaha koru rer u mun toulana teka. ²⁵ Be Iesu e ngö gögono mera neien i tanen me poeiena, “Alimiou e atei silemiou a markato turu katuun tema Jiu ri. U tsunono i taren e ranga hamal ria i taren, na pal kapan i taren e peits kap hatagala has raren. ²⁶ Kaba a markato teka ema tatei ka neia i gusumilimiou. E möa. A katuun te ngilin panna i tamilimiou, nonei go kato herenai a peisanen a katunun kui i tamilimiou. ²⁷⁻²⁸ Na te ngilin mamna ta töa i tamilimiou, nonei go kato herenai a peisanen a katunun kukui puku, te markato has uagu Lia tu butun Katunuma. Alia uma la sile mei u katuun egimi kui beiou lia. E möa. Alia u la silema emi kui ber u katuun, bate sakahis ragen tara tou mate i tar.”

E Iesu e kato haniga poutsir a huol a katuun a matakiou

(Mak 10:46-52, Luk 18:35-43)

²⁹ Tara pöata ti laba naien i Jeriko, ba u katuun u parpara koru e kukute raren. ³⁰ Ba huol a katuun a matakiou te gum talaria i rehina kalana me

hengoer te la karasa uu e Iesu ba nori e kur me poeier, “O Tsunono a Hatutubunei tere Devit! Alö go taatagi ramou lam!” ³¹ Ba u katuun e ranga merarien egi kakamoto. Kaba nori i ku hapan noalasi, “O Tsunono a Hatutubunei tere Devit! Alö go taatagi ramou lam!” ³² Be Iesu e tuoluna me ngö ranen, “Aha te ngile milimiou tego kati lia i tamilimiou?” ³³ Ba nori i ranga paliseren me poeier, “O Tsunono, alam e ngilin tarām!” ³⁴ Be Iesu e taatagi koru ranen me sebele iena a mataren, ba nonei tara tsi pöata puku noahas ba nori e tara poutsur, me kukutier e Iesu.

21

*E Iesu e tuku herei a king i Jerusalem
(Mak 11:1-11, Luk 19:28-40, Jon 12:12-19)*

¹⁻² Ba tara pöata ti butuieren i Jerusalem, me la uar i Betpats turu Pokus i Olip. Be Iesu e hala mam rena a huol a katunun tsitsilo i tanen me poeiena i taren, “La uamula tara han te kanama ili, ba limiou tena tare mou a töa rongki e kamena a tuna i kits kapiin. Ba limiou tena purese ramoien bate la mera mumeien i tar. ³ Na tena ranga nanao ta töa ta katuun ta ka i tamilimiou ba limiou te ranga memen, ‘A Tsunono te ngil rena men.’ Ba nonei te hala tuun las nena men romana.” ⁴ A ka teka e butu sil tega kato hamana menaieren u raranga te rangein a propet i manasa:

⁵ “Hatei raiam u katunur i Saion,
‘Tara iam a King i tamilimiou e la hamanasa uanama i tamilimiou.
Nonei e kato here nanei a peisanen a katuun papala koru

bate osana tara tunan rongki a hitots.’ ”

⁶ Ba u katunun tsitsilo tere Iesu ena kato haseier a ka ti ranga meraleien. ⁷ Ba nori e lue rima a rongki na tuna, me hopöeria a man hasobö i taren i oluna a rongki, be Iesu e gumna i tanen. ⁸ Ba u katuun u parpara koru e haholaseria a man hasobö i taren i maroro, ba palai e ngatseier a man kalan ruei me haholase rien i maroro.

⁹ U katuun u parpara koru ti mamin e Iesu na u katuun has ti murimurima i tanen i ku bate poeier, “Hosana! Soloseiam a Hatutubunei tere Devit! E Sunahan ega kalali esi te la nama tara solona a Tsunono.

Hosana! Solosei korueiam a solona e Sunahan iasa koru!”

¹⁰ Tara pöata te tukuia e Iesu i Jerusalem, ba u katuun hoboto tara taun e asingoto korur me poeier, “Esi nonei teka?” ¹¹ Ba u katuun ti la gono meien e poeier, “Nonei e Iesu a propetina i Nasaret i Galili.”

E Iesu e tsugar u katuun ti hahol ia tara Luman Lotu Pan

(Mak 11:15-19, Luk 19:45-48, Jon 2:13-22)

¹² Be Iesu e lauana tara Luman Lotu Pan mena tsuga rena u katuun ti hahol ia tara makumun lotu. Ba nonei e tula halakoponena u tebol turu katuun ti palpalisiin u moni na man gumgum turu katuun ti haholin a man kulu. ¹³ Ba nonei e poeiena i taren, “I koloto has naia turu Buku u Göagono,

‘A luma i tar e ngöeri romana a luman singo.’ Kaba limiou e kato here tsipon namien a kioun mous turu kopkop!”

¹⁴ Ba u katuun u matakiou na u mou omi e la uarima i tanen iahana a Luman Lotu Pan ba nonei e kato haniga pouts ranen. ¹⁵ Ba u pris pan na u tson hihatutsur tara Lo e raharaha mer ti tara menaien u mamana u mirakol te katoeien, na ti ku uu a galapien iahana a Luman Lotu Pan bate poeier, “Hosana! Soloseiam u Hatutubunei tere Devit!” ¹⁶ Ba nori e poeier tere Iesu, “Alö e hengoeiem a ka te ranga naren?” Be Iesu e poeiena i taren, “Alia e hengogu. Alimiou toum ima rit hanigemi u ranga teka, ‘A galapien u tetenei egi solosei a solo mölö.’ ”

¹⁷ Be Iesu e laba ranen me la uana tara han i Betani, tena keien a töa a bong.

*E Iesu e ranga hohomin u ruein fik
(Mak 11:12-14,20-24)*

¹⁸ Ba tara bongbong koru be Iesu e la pouts uana i Jerusalem, nonei e bes koru. ¹⁹ Ba nonei e tarena u töa u ruein fik i rehina maroro ba nonei e la uana i tanen, mena lagi sakesakena ta hua. E ka las mei a kala tuun. Ba nonei e poeiena turu ruein fik, “Alö ema antunan hua lel moi!” Ba nonei puku noahas tara pöata te rangaien ba u ruein fik e langona. ²⁰ Ba u katunun tsitsilo e tarer a ka teka me asingoto korur me poeier, “Ime temar lango boroboro ualala u ruein fik teka?” ²¹ Be Iesu e poeiena i taren, “Alia e hatei hamana ragou limiou, Te hamana koru mia limiou batema hula torimi, alimiou e tatei markato uamiou te markato uagu la lia turu ruein fik teka, na limiou e tatei mar ranga has uamiou teka turu pokus, ‘Alö go takei balö te lapo ba namia a peisamölö i tasi,’ ba nonei temar kato has uanou te ranga uami

limiou. ²² Na te hamana mia limiou, tara pöata te singo mia limiou ba limiou te lue mou a saha ka te singo silemi limiou.”

*A nitsunono tere Iesu e lama ime?
(Mak 11:27-33, Luk 20:1-8)*

²³ Be Iesu e kopis pouts uana tara Luman Lotu Pan, ba pöata te hihatuts ien, ba u pris pan na u tsunono turu Jiu e la uarima i tanen memi rangateren, “A saha nitsunono te ka memölö te kato memi lö a manka teka? Esi te halei lö a nitsunono?” ²⁴ Ba e Iesu e ranga palis ranen, “Alia e rangata has ragoui limiou u töa u harangata. Te ranga palise moa limiou u harangata i tar, ba lia te hatei has ragoui limiou esi te hale melia a nitsunono te kato megi lia a manka teka. ²⁵ Ime te lueia e Jon a nitsunono tega baptais meraien u katuun? Tere Sunahan tsi tara katuun tuun?” Ba nori e hiarangrangata poutsur me poeier, “Te pei roara, ‘E Jon e kamei a nitsunono tere Sunahan,’ be Iesu te pei nou i tarara, ‘Ga taraha tsiponi ba limiou tema hamanemi e Jon?’ ²⁶ Na ra ena mots poe hasera, ‘E Jon e kamei a nitsunono tara katuun.’ Taraha, u katuun hoboto e poeier e Jon a propet tere Sunahan. Na ra e matouteru tena raharaha uaren.” ²⁷ Ba nori e ranga paliseier e Iesu, “Alam ema ateimi.” Ba nonei e poeiena i taren, “Na lia has ema antunan hatei ragi limiou esi te hale mei lia a nitsunono ba lia te katoegu a manka teka.”

U haharuei tara huol a pien tson

²⁸ Be Iesu e poeiena i taren, “Ime temar hakats uami limiou tara katuun te kamena a huol a pien

tson? Nonei e la uana tara pien a hamua me poeiena, ‘A pien i tar, alö gona kui ia tara kuin grep i romana.’ ²⁹ Ba pien tson e ranga palisinen, ‘Alia ema ngilin kui gi.’ Kaba i murinen ba nonei e habiritsena u hakhakats i tanen ba nonei ena kuina tara kui. ³⁰ Ba e tamanen e lana mena katoena u töa u mar ranga noahas tara hahuoluna pien tson. Ba pien e ranga palisina me poeiena, ‘Aa, alia e la gou.’ Kaba nonei ema la ii.

³¹ “Esi i taren a huol te katoe u ngil tere tamaren?” Ba nori e poeier, “A pien tson a hamua.” Be Iesu e poeiena i taren, “Na lia e hatei hamana koru ragou limiou, e kato has uana iesana tara Nipepeito tere Sunahan. U katuun te lulueier a takis na u touhaliou u lulu tson pinopino ena tasu mammam raroua limiou iahana Nipepeito tere Sunahan. ³² Taraha, e Jon a Tsonun Baptais emi haröto rai limiou a maroro a matskö, kaba limiou uma hamane mien. Na pal tson u omi na touhaliou u omi i hamaneien. Na limiou i röto hakapeiam ti markato uen teka, kaba limiou uma palis noahasemi u hakhakats i tamilimiuu bate hamane men.”

U haharuei turu katuun u omi ti taratara kapiin a kuin grep

(Mak 12:1-12, Luk 20:9-19)

³³ Be Iesu e hihatuts lenina me poeiena, “Hen-goiam turu tana u haharuei. A töa katuun te tuei a makumun tsiktsiki i tanen e lebei a kuin grep me kui hahise neien a ololo, me kahoena a kiou ti ron kato bulbuleia u grep. Ba nonei e kui leleiena a luman pepeito kap a pia nitöa tara kuin grep. Ba nonei e hataratara kap tuun ranei u palair u

katuun a kuin grep teka me hakuin moni nanen, ba hapalana moni e la uana tara katuun terena kui. Ba nonei e la uana tara töa han i lehana.

³⁴ “Ba tara pöata te susukun tangohoia a kui, ba nonei e hala mera nei u katunun kui i tanen turu katuun ti kui ia tara kuin grep tegina lu menaien ta pala i tanen. ³⁵ Ba u katunun taratarakap tara kui e lu rer u katunun kui i tanen, me lahuser a töa, me atung hamateier a tai, ba nori e titieri a tai a hatu. ³⁶ Ba katuun terena kuin grep e hala lel ranama a palair u katunun kui i tanen, i para baler a pala ti la mamima, ba u katunun taratarakap tara kui e markato lel has mera rien iesana.

³⁷ “Ba kapakapanen ba nonei e hala nena a pien tson i tanen, ba nonei e poeiena, ‘Nori ena tara marei riou a pien tson i tar.’ ³⁸ Ba pöata ti tareien a pien tson teka ba nori e poeier, ‘A pien tson tara katuun terena kui teka te lue nou a kuin grep. Aragi atung hamateien, bara te lue rou a kui i tanen!’ ³⁹ Ba nori e pile kap naren me lapo halakasa narimen tara kuin grep ba nori e atung hamatie ren.”

⁴⁰ Be Iesu e rangata ranen, “Bora, ga tara pöata te lama a katuun te tuenei a kuin grep, nonei emi katoe nou aha turu katuun u omi teka?” ⁴¹ Ba pal kapan turu Jiu e poeier, “Nonei emi atung hamate ranou u katuun u omi teka, ba nonei te hataratara kap ranoui u katuun u niga a kuin grep teka, ba nori te hala hamatsköe roien a pala i tanen tara pöata tega tangohoiien.”

⁴² Be Iesu e ranga meranen, “Alimiou i rit ha-seiam u raranga turu Buku u Göagono, ‘A hatu ti raman u katunun kukui luma bate hapi-raka naren,

nonei a hatu te niga balana tara toukuina tara luma.

A ka teka a Tsunono te katoeien,
ba nonei te niga koruna i matarara!’ ”

⁴³ Be Iesu e poe lelana, “U raranga teka e ranga ranou limiou. Na lia e hatei ragou limiou, a Nipepeito tere Sunahan e luba rari limiou romana bate hala rari u katuun te katoeier a toukui a niga.

⁴⁴ A katuun te rusuna romana tara hatu teka nonei e tupeko nitöa naiena romana. Kaba te konena romana a hatu teka ta katuun, ba nonei te kono bulbul here nanoien u köahu.”

⁴⁵ Ba pöata ti hengoeia u pris pan na u Parasi a man haharuei teka tere Iesu, ba nori e atei siler e Iesu e ranga sil raien, ba nori e raharahar. ⁴⁶ Ba nori e katsin pile kap naren, kaba nori i matoutir u katuun u parpara koru, taraha u katuun i pei e Iesu a töa propet.

22

U haharuei tara kannou na tara hitöl (Luk 14:15-24)

¹⁻² E Iesu e ranga lenin u tana u haharuei turu katuun me poeiena, “A Nipepeito tere Sunahan e tatei herenei a king te kato be ii a pien tson i tanen a kannoun hitöl. ³ Ba king e hala ralala u katunun kui i tanen egina ngö rema u katuun tegi la uama tara kannouna tara hitöl, kaba nori ima ngilin la uamei tara kannou.

⁴ “Ba nonei e hala lel ralala a palair u katunun kui me poeiena i taren, ‘Na ranga mera muma u katuun ti tahul mam rela lia, A kannou i kato hakapi e hahalosona. Alam u atung hakapi a man kau a man tson na man tunan kau a man bokoko

hanigan töa. Na mamananaka e kana e hahalosona. Alimiou go la uamuma tara kannoun hitöl.’ ⁵ Kaba nori ima ngilin hengo sile ii a ka ti ranga meraien, me la uar tara man toukui i taren: a töa e la uu tara kui i tanen, na tai e la uu tara stoa i tanen. ⁶ Ba palai e pile kap rer u katunun kui tara king me kato hohomi raren, me atung hamate raren.

⁷ “Ba king e raharaha koruna, me hala ralala u soldia i tanen mena atung hamate rer u katuun ti atung rema u katunun kui i tanen, me hakuluper a taun i taren. ⁸ Ba nonei e ngö rena a palair u katunun kui i tanen me poeiena, ‘A kannoun hitöl i kato hakapi na e hahalosona, kaba u katuun ti ngö rela lia ema haniga nari tegi la uamen. Nori ema antunan la tala rimei. ⁹ Bora, la tala uaiam tara man maroro iahana taun bate tahul remuma u katuun tegona sabe raiam limiou bate lauaruma tara kannou.’ ¹⁰ Ba u katunun kui e la uar tara man maroro me gono rarima u katuun hoboto ti sabe raien, u katuun u omi na u katuun u niga. Ba luma tara hitöl e saputu rena u katuun.

¹¹ “Kaba pöata te tasuma a king iogana temi tara meraien u katuun ti lama, ba nonei e tarena a töa katuun ema la memei u hasoböna tara hitöl. ¹² Ba nonei poeiena i tanen, ‘A tsi hahikapien, ime temar laua muma lö teka te möa uemölö tu hasoböna tara hitöl?’ Ba katuun e kakamoto nitöa bananen. ¹³ Ba e king e ranga merena u katunun kui i tanen, ‘Kits kap naiam a limanen na mounen ba limiou te lapo ba namien ielesala turu kuhil, tara makum te tabe hohomi nouen bate kutu hakarkarangakena a liho nen.’ ”

¹⁴ Be Iesu e rangana me poeiena, “E Sunahan e ron ngö rena u katuun u parpara koru, kaba nonei

e hopö kap nanou a tsi topisa puku a tsi katuun.”

A takis tara gamman

(Mak 12:13-17, Luk 20:20-26)

¹⁵ Ba u Parasi e lakasar mena hiararanganer ime tegi mar gamo menaien e Iesu tara man raranga i tanen. ¹⁶ Ba nori e hala ralila u katunun tsitsilo i taren na palair u katuun tere Herot tere Iesu mena poeier, “Tson Hihatuts, alam e atei silem alö a katununa turu mana. Alö e roron hihatuts hamana nem a maroro tere Sunahan, taraha alö ema hakats nami a manka te hakats ner u katuun tsi a nikapan i taren. ¹⁷ Bora, alö go hatei ramou lam, ime temar hakats uemölö, e niga hasina tegi hol mei a takis tere Sisa a gamman pan, tsi e möa?” ¹⁸ Kaba e Iesu e atei sil hakapi u hakhakats u omi i taren, ba nonei e poeiena, “Alimiou u gamogamo! Aha te katsin torohana sile milimiou alia? ¹⁹ Haröte mumei lia a moni te holeri a takis.” Ba nori e lube rimeien a töa a denarius moni. ²⁰ Ba nonei e rangata ranen, “A bakuna esi, na solona esi te kar teka?” ²¹ Ba nori e poeier, “E Sisa.” Be Iesu e poeiena i taren, “Bara, hala talemi e Sisa a manka i tanen, bate hala hasemi e Sunahan a manka i tanen.” ²² Ba pöata ti hengoeien a ka teka, ba nori e asingoto korur. Ba nori e laba naren.

Pöata te töatöa pouts ria romana u katuun

(Mak 12:18-27, Luk 20:27-40)

²³⁻²⁴ Nonei noahas turu lan ba u Sadiusi e la uarima tere Iesu. A pal katuun teka nori i pei e möa ta tou takei pouts tara tou mate. Ba nori i poeier tere Iesu, “Tson Hihatuts, i manasa e Mosis te poei, ‘Tega mateia ta tson bate möana ta pien,

e toulanen e tatei tölena a amoaba, ba nori te hatuhaner romana ta pien tena luenou a solo tara tson te mate.’ ²⁵ Bora, e kamei a man munmun toulana i kaia i gusu mulam, nori i tohit. Ba ka ti posa mami e hitöluna, be matena bate möa noana ta pien. Ba hahuoluna a toulanen e töl lelana a amoaba. ²⁶ Ba nonei e mate lel hasina bate möa noana ta pien. Te markato has uen tara hatopisana a toularen, mena antunan töana ti popoien, a tohit. ²⁷ Ba nönöa ren hoboton töa tala, ba tahol e mate hasina. ²⁸ Ga tara pöata te takei pouts ria romana u katuun tara tou mate i taren, esi nonei koru i taren te tueie nou a tahol? Taraha, nori u mun toulana tohit i töl hoboto taleien.”

²⁹ Be Iesu e ranga palis ranen me poeiena, “Alimiou e gamo miou. Taraha, alimiou ema atei silemi u Buku u Göagono, na nitagala tere Sunahan. ³⁰ Pöata te takei pouts ria romana u katuun tara tou mate, nori ema antunan hitöl lel roi. Nori e ka hereroi u angelo ri Kolö. ³¹ Kaba tara tou takei pouts turu katuun ti mate, alia e ngilin rangata ragou limiou: alimiou u rit haniga haseiam u raranga tere Sunahan te ranga naien i tamilimiou? ³² Nonei e mar ranga uu teka: ‘Alia a Sunahan tere Abraham na lia a Sunahan tere Aisak na lia a Sunahan tere Jekop.’ U raranga teka e poeiena nonei ema Sunahan uanei turu katuun u mate. E möa. Nonei a Sunahan turu katuun te töatöar.” ³³ Ba pöata ti hengoeia u katuun a ka teka, ba nori e asingoto koru ner u hihatuts i tanen.

*U raranga u kapan tere Sunahan
(Mak 12:28-34, Luk 10:25-28)*

³⁴ Ba pöata ti hengoeia u Parasi te rangau e Iesu turu Sadiusi, ba nori e kakamoto nitöar. ³⁵ Ba töa tson ateina turu tson hihatutsura tara Lo, e katsin rangata torohane neien u töa u harangata. ³⁶ Ba nonei e poeiena, “Tson Hihatuts, u saha u raranga te pan balana tara man raranga hoboto tere Sunahan?” ³⁷ Be Iesu e poeiena i tanen, “Alö go ngil korui a Tsunono i tamölö e Sunahan, balö te ngil memien a tui na u namnamei hoboto i tamölö na u hakhakats hoboto i tamölö! ³⁸ Nonei u raranga tutuun teka na te pan bala koru hasna turu raranga hoboto tara Lo. ³⁹ Na u hahuoluna u raranga u kapan e kato uana teka, ‘Alö go ngil korui a tana katuun temar ngil has mena milö a peisamölö.’ ⁴⁰ U huol u raranga teka nonei a mouna u mamana u raranga turu propet na e Mosis.”

Esi terena pien e Mesaia?

(Mak 12:35-37, Luk 20:41-44)

⁴¹⁻⁴² Pöata ti gonogono hobotoia u Parasi, be Iesu e rangata ranen, “Ime temar hakats uami limiou tere Mesaia? Nonei a pien tson teresi?” Ba nori e poeier, “Nonei a pien tere Davit.” ⁴³ Be Iesu e poeiena i taren, “Ga taraha tsiponi ba u Namnamei u Göagono te harangena e Devit ba e Devit e ngöenei e Mesaia ‘A Tsunono’?”

⁴⁴ E Devit e poei, ‘A Tsunono e poei tara tsunono i tar,

Gum ia tara pal matou i tar,
antunana te hake goalia u katuun te pakö rioulö
i pitapitana a moumölö.’

⁴⁵ “E Devit e ngöei a katuun teka, ‘A Tsunono.’ Ga ime te markato uanen ba nonei te pien uana tere

Devit?” ⁴⁶ Kaba e möa ta töa tega mala raranga poutsin tatsi töa tatsi ranga tere Iesu. Na i murina pöata teka e möa ta töa tega rangate ien tu töa tu harangata, taraha nori i matout.

23

*Haneiam u tson ateira tara Lo na u Parasi
(Mak 12:38-39, Luk 11:43,46, Luk 20:45-46)*

¹⁻² Be Iesu e poeiena turu katuun u parpara koru na turu katunun tsitsilo i tanen, “U tson ateira tara Lo na u Parasi e ka mer a nitsunono tegi hatarare menaien a man Lo tere Mosis. ³ Na limiou go hengeiam a mamana te ranga mera rien limiou. Kaba limiou goma kukutiemi a markato i taren, taraha nori pouts ema kukutieri a man lo te hake rien i tamilimiu. ⁴ Nori e roron hake ria a man lo a man tiama turu katuun, a man lo te kamer a toukui pan. Kaba nori ema antunan kukutieri ta töa ta pal lo tara man lo teka.

⁵ “A mamana te roron katoe ren e kato silerien tegi tara meraien u katuun. Hena, nori e roron hakits naria a matsi bokis i poleren na i limaren te kamena u raranga tere Sunahan iahanen. Na nori e kato hanigan töa ner a man runguna a man hasobö a man ngahangaha i taren bate tataabala koruna. ⁶ Na nori e ron ngilin gum ria turu gungum tara pal kapan tara pöata tara kannou, na e ron ngilin gum koru has ria turu gungum u niga koru na i luman lotu. ⁷ Nori e roron ngiler u katuun egi hapan raien tara maku-mun töana, na nori e ngil haser u katuun egi ngö raien u Rabai.

⁸ “Kaba u katuun ema tatei ngö raroui limiou u Rabai (te poeiena a Tson Hihatuts) taraha alimiou e ka memiou a töa puku a Tson Hihatuts, nonei a Tsunono, na limiou u munmun toulana. ⁹ Ba limiou tema tatei ngöemi ta töa ta katununa i puta e Tamamilimiou, taraha alimiou e ka memiou a töa puku a Tamamilimiou, te kana i Kolö. ¹⁰ Na u katuun ema tatei ngö has rari limiou u Hihatutus, taraha alimiou e ka memiou a töa puku a Hihatutus, e Mesaia. ¹¹ A katuun te pan bala ranou limiou e tatein na katunun kui uanou i tamilimiou. ¹² A katuun te solo sei peiseiena a peisanen, a solonen ena hala puteier romana. Kaba katuun te haka pute iena a peisanen, nonei ena luena romana a solo pan.”

A man markato a man omi turu tson ateira tara Lo na u Parasi

(Mak 12:40, Luk 11:39-42,44,52, Luk 20:47)

¹³ E Iesu e ranga lel me poeiena, “Alimiou u tson ateira tara Lo na limiou u Parasi, a nomi pan e butu noa i tamilimiou! Alimiou u gamogamo, na limiou te ron hatu kap ramiou u katuun tegi tasu uen tara Nipepeito tere Sunahan, na limiou pouts has ema antunan tasumi. ¹⁴ Alimiou e roron katoemiou u singona turu lotu u ngahangaha turu rung tuun, bate lu tsipon bemi a peisa milimiou a manka turu amoaba. Te markato uamilimiou teka alimiou e luemou a nihahuna a omi koru.

¹⁵ “Alimiou u tson ateira tara lo na u Parasi, alimiou u gamogamo! Alimiou e roron la koru uamiou turu tsiktsikina i lehana na i tasi, tego kato menami ta töa ta katuun, a katunun tsitsilo i tamilimiou. Kaba pöata te lu sabe tsipone mia

limiou a töa, ba limiou te kato tsipone mien a katuun a omi koru tena hahune ria romana i hel. Na limiou e katoe men ba nonei te omi bala koru len ranou limiou.

¹⁶ “A nomi pan e butu noa i tamilimiu, alimiu u matakiou te haröto tsipon nemiu a maroro turu katuun bate poeiemiu, ‘Tega hamanaia ta katuun tara Luman Lotu Pan bate poeiena e manana iasa, a ka pinopino. Kaba tega hamanaia ta katuun tara goul tara Luman Lotu Pan bate poeiena e manana iasa, aa, nonei e tatei markato koru has uana temar ranga uanen.’ ¹⁷ Alimiu u katuun u matakiou u tutu! Saha ka te panina, a goul, tsi a Luman Lotu Pan te hagöagonena a goul?

¹⁸ Na limiou e poe hasemiu, ‘Tega hamanaia ta katuun tara makumun haats, a ka pinopino. Kaba tega hamanaia ta katuun tara manka te kana tara makumun haats, aa, nonei ega markato koru has uu temar ranga uanen.’ ¹⁹ Alimiu u katuun u matakiou! Aha te panina, a manka te kana tara makumun haats? E möa. A makumun haats te hagöagonena a manka te kana i tanen, nonei te panina.

²⁰ A katuun te hamanaia tara makumun haats e hamana hasna tara manka te kana i tanen.

²¹ Na katuun te hamanaia tara Luman Lotu Pan e hamana hasna tere Sunahan te kana i tanen. ²² Na katuun te hamanaia i Kolö e hamana has uana tere Sunahan na turu gumgum u göagono te gumnen.

²³ “Alimiu u tson ateira tara Lo na limiou u Parasi, a niomi pan e butuna romana i tamilimiu! Alimiu u gamogamo! A mamana matsi kaan hasoksoka a matsi tetenei te kana tara kui, alimiu e roron patsike men ba limiou te halemi e Sunahan a man hamalotona a man makum. Na

markato te hala menari a hamalotona makum tere Sunahan e nigana. Kaba limiou e totone miou a mar hihatuts a kapan tara Lo te markato uana teka: a markato te hamou hamatskö menari u raranga turu katuun, na markato te taatagi mera nei e Sunahan u katuun, na markato a mana. ²⁴ Alimiou u matakiau te ngilin haröto tsipon rami u katuun a maroro. Alimiou e roron hakats hapara nemiou a man markato pinopino, kaba limiou ema kato tsiponemi a markato a niga te panna i matana e Sunahan.

²⁵ “Alimiou u tson ateira tara Lo na u Parasi, a niomi pan e butunoa i tamilimiou, u katuun u gamogamo! Alimiou e roron kato hagogosemiou a murina a kap na pelete, kaba iahanen e kororianana, te kato has uana a torimilimiou te habutena a markato tara kop na te hagua be menami limiou u ngilngilina turu tuenrei.

²⁶ Alimiou u Parasi u matakiau! Alimiou go kato hagogoso mam meiam a torimilimiou, ba markato i tamilimiou te niga has noa i biou.

²⁷ “A niomi pan e butunoa i tamilimiou u tson ateira tara lo na u Parasi, u gamogamo! Taraha alimiou e heremi u kioun mate te tara ha hiaka hanigan töana ielesala, kaba i iogana e saputena u tsinön mate na mamanaka a koreme. ²⁸ Nonei noahas tara markato teka. Ba u katuun te tarer a peisa milimiou bate poeier alimiou u katuun u matskö. Kaba i iogana i tamilimiou e saputu mena a markato turu gamo na mamana markato a omi.”

*E Iesu e rangein u tson hihatuts e luer romana a nihahuna
(Luk 11:47-51)*

²⁹ Be Iesu e ranga lenina me poeiena, “A niomi pan e butuinoa i tamilimiou u tson ateira tara Lo na u Parasi, alimiou u katuun u gamogamo! Alimiou e roron kuiemiou u kahokaho u niga turu propet ti mate bate hake miou a manka a man tara hanigan töa turu kahokaho turu katuun u matskö. ³⁰ Ba limiou te poeimiou, ‘Sanena ara ti kaia tara pöata turu tuburara i manasa, ara sane ma taguhu rari ien tegi atung hamate meraien u propet.’ ³¹ Ba turu raranga i tamilimiou, alimiou e hatara marei nemiou te hatutubunei uami limiou turu katuun ti atung hamatir u propet i manasa! ³² Na limiou e markato has uamiou ti markato uaien, bate hahonoto tale miou a man markato a man omi i taren.

³³ “Alimiou u katunur tara kökötsi a omi na u gamogamo! E möa koru tego antunan bus ba mena milimiou romana a nihahuna i hel. ³⁴ Tara markato teka alia e hala ragou limiou u propet na u katuun u atei na u tson ateira tara lo. Ba limiou tena atung hamate ramiou a palai bate tapala ramien tara kuruse bate kato hamate ramen, ba limiou te lahus ramia a palai turu luman lotu i tamilimiou bate kute meramien tara mamana man taun. ³⁵ Ba limiou te alate miou romana u katuun u matskö ti atung hamatir i manasa, e taniaia tere Ebol bate lana tere Sakaria a pien tere Berekaia ti atung hamateia u tubumilimiou i gusuna Luman Lotu Pan na makumun haats. ³⁶ Alia e ranga hamana koru mera goulimiou, a nihahuna tara man markato teka e lue mou limiou u katunura i romana!”

*E Iesu e taatagini a han i Jerusalem
(Luk 13:34-35)*

³⁷ Be Iesu e poeiena, “A tei Jerusalem, atei Jerusalem, alimiou e roron atung hamate ramiou u propet bate titi hatu ramiou u katuun te hala mera mei e Sunahan i tamilimiou! A pōata a para alia i ngilin gono mera mei limiou i tar bate hatongo kap ragou limiou, temar gono mena nei a keriou u tuna i kopina pakapakanen. Kaba limiou ema ngil mi! ³⁸ Tara, man luma i tamilimiou e kaka puku koruna. ³⁹ Alia e ranga mera goulim-iou, alimiou ema tatei tara lele moi lia e antunana te pei moa limiou, ‘E Sunahan ega kalali a katuun te la nama tara solona a Tsunono.’ ”

24

E Iesu e hatein tega omi uu romana a Luman Lotu Pan

(Mak 13:1-2, Luk 21:5-6)

¹ Pōata te laba naia e Iesu a Luman Lotu Pan me katsin lana, ba u katunun tsitsilo i tanen e la uarima i tanen memi hatare rien a man luma pan. ² Be Iesu e poeiena i taren “Alimiou e tara hasemiou a mamanaka hoboto teka. Na lia e ranga hamana koru mera goulimiou, e möa lel nou ta töa ta hatu tega ka lel ia romana tara man makum te karien. A mamana hatu hoboto e tarura riou bate rusur i puta.”

A pōata a omi koru

(Mak 13:3-13, Luk 21:7-19)

³ Pōata te gum ia e Iesu turu Pokus tara Ruein Olip ba u katunun tsitsilo i tanen emi ka momous pepeisa gono meren me rangate ren, “Hatei ramei lam i hangisa te butuna romana a ka teka, na

u hiharöto te hatara nanou a pöata tego la pouts uama lö, na te kapana romana a han.”

⁴ Be Iesu e ranga palis ranen, “Haneiam, möa tu hengoeiam ta katuun tegomi gamo raiou limiou.

⁵ Taraha, u katuun u parpara e la rima romana bate ngöeri a peisaren a solor bate poeier, ‘Alia e Mesaia’ ba nori te gamo rer romana u katuun u parpara.

⁶ Alimiou e hengoemiu romana te ling uana romana a man hiatatung i susuku na u bulungana tara man pulana i lehana. Kaba limiou goma matout mi. A manka teka e butu hasina romana, kaba a nikapakapa na man lan e ka noana.

⁷ A töa han e hiatatung mena romana a tana han, na palair u hun katuun e hiapulpular romana. Na e kamenou a bes pan na nun pan has tara han a parpara.

⁸ A manka teka e kamits here nei romana te posa menari a pien tutuun.

⁹ “U katuun e hala rariou limiou romana tegi kato hakamits merai limiou, ba limiou te kato hamate rariou. Na mamana hun katuun e omi sile roi lia, alimiou.

¹⁰ U katuun u parpara koru e hapolaser romana u nihamana i taren. Nori e hala mera roi a palai turu katuun te pakö raren batena hia o omi pouts hasir romana.

¹¹ U katuun tema propet ri e butur romana bate gamour, bate ngöeri a peisaren u propet tere Sunahan, bate gamo rer u katuun u parpara.

¹² A man markato a man omi teka e para koruna romana ba u ngilngil turu katuun u parpara te kapa susul nou.

¹³ Kaba u katuun te pile kap ner romana a markato tere Sunahan tara pöata a omi teka batema hapolase-rien, e Sunahan e lu pouts mera noien i tanen.

¹⁴ Ba u Bulungana u Niga teka tara Nipepeito

tere Sunahan te hihatuts laneria romana tara manana han i puta, ba man hun katuun hoboto te hengoe ren romana, ba i murinen ba kapakapana a pöata te töan butu nou.”

A ka a omi koru e butunou
(Mak 13:14-23, Luk 21:20-24)

¹⁵ Be Iesu e poeiena, “Alimiou e tare miou romana a ka a omi koru te rangein e Daniel a propetina i manasa, te tuol ien tara makum a göagono.” (A katuun te ritena u raranga teka ega atei.) ¹⁶ “Ba pala te karia i Judia te bus uar romana turu pokus. ¹⁷ Na katuun te kana romana i pungana ema tatei koul nei romana, tegana lu menaien a manka i tanen iahana luma. ¹⁸ Na katuun te kana romana tara kui i tanen ema tatei la pouts nei romana tegana lu menaien a man hasobö i tanen. ¹⁹ A nitaatagi pan koru e kana romana tara touhaliou te kamer romana u pika nonei tara pöata, na tara touhaliou te hihasusur romana! ²⁰ Alimiou go singo uaiam tere Sunahan ba pöatan bus teka tema tatei butu neia tara pöatan hamuri na turu Lan u Göagono. ²¹ Taraha, a niomi te butuna romana nonei tara pöata e pan saluhe koru nena romana a man niomi hoboto, te butu i manasa tara pöata te katoeia e Sunahan a mananaka bate noana i romana na tara pöata hoboto i murimuri. ²² Sanena e Sunahan tema hamakmakumei a pöata teka, ega möa koru ta katuun tega tatei ka haniga romana. Kaba e Sunahan e hamakmakum menai romana a pöata teka tego taguhu meraien u katuun te hopö kap raien.

²³ “Kaba te poeiena ta katuun i tamilimiou, ‘Röto iam, e Mesaia teka,’ tsi ‘Nonei ili,’ möa tu

hamaneiam. ²⁴ Taraha, u Mesaia gamogamo na u propet gamogamo e butur romana, ba nori te katoer romana u hiharöto u kapan na man mirakol. Tegi antuna uen, ba nori te gamo rer romana u katuun te hopökapi e Sunahan. ²⁵ Hengoiam! Alia e hatei mammam ragilimiou a ka teka i mamina a pöata tena butu nen romana.

²⁶ “Bora e markato uana teka, te hatei raia limiou u katuun, ‘E Mesaia e kana tara makum a palaka,’ möa tu la uaiam nonei tara makum. Tsi tegi poeien, ‘Nonei e mousuna iahana luma,’ möa tu hamana raia. ²⁷ Taraha, Alia tu butun Katunuma e la here gumei romana u kanaha te kanahana tara mamana makum turu kolö. ²⁸ U katuun e atei siler a makum te kana u tuenrei u mate, taraha nonei a makum te gonogono ria u apena te nounouer a ka a koreme. Na e kato has uana iesana, u katuun e atei sil hase riou ime te butu goa lia romana.”

E Iesu e la pouts nama romana

(Mak 13:24-27, Luk 21:25-28)

²⁹ “I murina pouts noahas a pöata tara niomi, a pitala e kuhilina romana,

na tsihou ema piri has nei romana,
na u pitopito e rus rima romana i kolö.

Ba mamanaka a tagala na i kolö te tagasir romana.

³⁰ “Ba u hiharöto i tar tu butun Katunuma te butuna romana i kolö. Ba mamana katununa i puta te matoutur romana bate taber, ba nori te tarer romana Alia tu butun Katunuma e la meguma romana u köasi i kolö na nitagala na u ualesala u kapan. ³¹ Ba lia te pihegu a tuhil bate ling hapanina, ba u angelo i tar te la uar turu han

hoboto i puta, ba nori te gono rarima u katuun te hopö kapir e Sunahan.”

*U hihatuts turu ruei te suluna
(Mak 13:28-31, Luk 21:29-33)*

³² Be Iesu e ranga lenina me poeiena, “Alimiou go lue mia ta niatei tego haharuei mena milimiou u ruei te ngöeri u fik. Tara pöata te mararana a kalana u ruei bate rurusuna, alimiou e atei sil hakape mula a pöata tara pitala e susukuna.

³³ Te kato has uamou limiou, tara pöata te tare moa limiou romana a mamananaka hoboto teka, ba limiou te atei sile mou nonei e susukuna i matan tamana hamatskön töa. ³⁴ Alia e hatei hamana koru ragou limiou, a mamananaka hoboto teka e butuna romana i mam te mate ria a palair u katuun te töatöar tara pöata teka. ³⁵ U kolö nu puta e taia riou, kaba u raranga i tar ema antunan taia koru nei romana.”

*E möa ta töa tega atei sileiou nonei u lan na aua
(Mak 13:32-37, Luk 17:26-30,34-36)*

³⁶ Be Iesu e poeiena, “Kaba e möa ta töa tega atei sileiou u lan tsi a aua te butu nama romana a manka teka. U angelo ri Kolö has ema atei roi, na lia has tu butun Katunuma ema atei has goi. E Tamar puku lasi te ateina. ³⁷ A pöata te la pouts guma romana lia tu butun Katunuma e markato has uanama romana tara pöata tere Noa i manasa. ³⁸ Tara man lan i mamina u uolo pan, u katuun i nou na i ua, na pal tson na touhaliou i hitöl e antunan töaia turu lan te tasuia e Noa tara tolaala. ³⁹ Na nori ima atei sil noa hasei aha tega butu. Antunaia te butuma u uolo pan me söata ba hakapa ranen. E markato has uanou iesana tara

pöata te la pouts guma lia romana, Alia tu butun Katunuma. ⁴⁰ Nonei tara pöata a huol a tson e kui ria romana tara kui. Ba töa te lueier romana, ba tai te kakana. ⁴¹ Na a huol a tahol e katoeier romana a palaua. Ba töa te lueier romana, ba tai te kakana. Te markato uanoien teka, ba limiou te haneimiou.

⁴² “Taraha, alimiou ema atei silemi u sahu lan te la nama romana a Tsunono i tamilimiou. ⁴³ Kaba limiou go atei iam: sanena a katuun terena luma ega atei sil i hangisa tega lama a kopkop tara bong, ba nonei te kalkalatana bate hatu kap nena a kopkop tega tasu uaien i luma. ⁴⁴ Te markato uanen teka alimiou go hanei hasiam. Taraha, Alia tu butun Katunuma e la pouts guma romana tara pöata, alimiou ema atei silemien romana.”

A katunun kui a niga na omi
(Luk 12:41-48)

⁴⁵ Be Iesu e pei lelana, “Esi nonei ta katunun kui ta atei te tatei kato hanigan töa nena a toukui tanen? A Tsunono te tatei hataratara kap nanei a katuun teka a palair u katunun kui i tanen tega hala meraien a kannou i taren tara pöata hamatskö. ⁴⁶ A katunun kui teka e tatei sasaalana tara pöata temi sabienen a katuun pan i tanen, tara toukui te kuinen. ⁴⁷ Na lia e ranga hamana koru mera goulimiou, a katuun pan i tanen e tatei hataratara kap nanoi a katunun kui teka a mamanaka hoboto te teie nen. ⁴⁸ Kaba tega omia a katunun kui teka, ba nonei te rangana i torinen bate poeiena, ‘A katuun pan i tar ema sesein la pouts namei romana.’ ⁴⁹ Ba nonei te tanian atung rena romana a palair u katunun kui, ba nonei te nouna bate ua gono merena u katuun u uaua pala.

⁵⁰ Ba katuun pan tara katunun kui teka, te songots la nama romana tara pöata, a katunun kui i tanen ema atei silenei nonei e la nama tara pöata teka.

⁵¹ Ba katuun pan te hahune noen, ba nonei tena haka gono mera neien u katuun u gamogamo. Tara makum tena tabe hohomi rouen bate kutu hakarkarangaker a liho ren.”

25

U haharuei tara maloto a tahol a kukubei

¹ Be Iesu e ranga lelina turu katunun tsitsilo i tanen me poeiena, “Pöata te butu nama romana u lan tego la pouts ma a Tsunono, ba Nipepeito tere Sunahan te here namei romana a maloto a tahol a kukubei ti lui a man lam i taren bate la siler tegina tara menaien a tson tego hitöl. ² A tolima a tahol a tutu na tolima a tahol atei. ³ A touhaliou u tutu i lui a man lam i taren, kaba nori ima lu hapare lei ta karasin. ⁴ Kaba touhaliou u atei i luela a man lam i taren na man botolo karasin a man saputu. ⁵ Kaba a tson tegomi hitöl ema la boroboro mei, ba nori hoboto e topi korur be sohor.

⁶ “Ba tara gusuna bong ba töa katuun e kuna me poeiena, ‘A tson tega hitöl e la hamanasa nama. Alimiou go la muma batemi tare men.’ ⁷ Ba touhaliou u kukubei hoboto e taker be pilits sei hobotoner a man lam i taren. ⁸ Ba tolima tahol a tutu e poeier tara tolima tahol a atei, ‘Alimiou go hala ramumei lam ta tsi karasin i tamilimiou, taraha a man lam i tamulam e katsin osor.’ ⁹ Kaba a tolima tahol a atei i ranga palis raien me poeier, ‘E möa. U karasin ema antunanei i tamilimiou na i tamulam has. Alimiou go la mula i stoa batena hol peise miou ta karasin i tamilimiou.’

10 “Ba pal touhaliou u tutu ena hol karasinir. Ba pöata ti tia noa men, ba tson tegi hahitölini e tukuna. Ba pala ti hahaloso* e tasu gono mer a tson ti hahitöli tara kannouna tara hitöl, ba tamana e hapilie ier. 11 Ba i murinen ba palair u touhaliou u kukubei e la pouts rima memi poeier, ‘O Tsunono, o Tsunono, kalatema a tamana ba lam te tasu mou.’ 12 Kaba a tson ti hahitölin e ranga palis raien me poeiena, ‘Alia e hatei hamana koru ragou limiou, alia ema atei sil ragi limiou.’ ” 13 Be Iesu e poeiena, “Alimiou go haneiam, taraha alim-iou ema atei silemi u lan tsi a aua te butu nama romana a Tsunono i tamilimiou.”

*U haharuei tara topisa katunun pepeito kap
(Luk 19:11-27)*

14 Be Iesu e poeiena, “A Nipepeito tere Sunahan e here hase nei romana a katuun te katsin laba nena a han i tanen bate lauana i lehana. Ba nonei te ngö gögono rena u tson pepeito kap i tanen bate hataratara kap raneien a mamananaka i tanen. 15 Ba nonei e hala raneien a moni, e hala hapopo naien tara nikukui i taren a man tötöa. Nonei e halei a töa katuun a tolina talen moni e antunaia tara 5,000 kina. Ba nonei e hale nei a tai a huol a talen moni, e antunaia tara 2,000 kina, na tai i halei a töa talen moni e antunana tara 1,000 kina. Ba nonei e la uana tara tou lala i tanen.

16 “Ba tson pepeito kap te lui a tolina a talen moni e lana mena hakui nena a moni teka ba nonei e luena a tana a tolina a talen moni. 17 Na tara töa noahas a markato ba tson pepeito kap te lui a huol a talen moni ena luena a taina a huol a

* **25:10:** A tolina a man lam taren ti kamei a karasin.

talen moni len. ¹⁸ Ba tson pepeito kap te lui a töa a talen moni e lana, mena kaho hamous nena a moni tara katuun pan i tanen.

¹⁹ “Ba i murina a pöata a ngahangaha koru, ba katuun pan turu tson pepeito kap teka e la pouts nama memi ase gono mera neien u moni ti lueien.

²⁰ Ba tson pepeito kap te lui a tolima a talen moni, e la nama memi hala nena a moni i tanen me hala gono meneien a tana a tolima a talen moni i tanen me poeiena, ‘O tsunono, alö u hale lei lia a tolima a talen moni i tamölö. Tara! A tana a tolima a talen moni has teka tu lui lia.’ ²¹ Ba katuun pan i tanen e poeiena, ‘E niga nitöana, alö a tson pepeito kap hamana na lö u kato hanigan töani a toukui i tamölö. Alö u tara kap haniga koruni a matsi topisa koru a mats ka, na lia e ha taratara kap tala nagi lö a mamanaka a pannen. Tasu hongo tala uu tara nisasaala tara katuun pan i tamölö!’

²² “Ba tana tson pepeito kap ti halei a huol a talen moni e la nama memi poeiena, ‘O tsunono, alö u halei lia a huol a talen moni i tamölö. Tara! Alia i kui habutu leli a tana huol a talen moni len.’ ²³ Ba katuun pan i tanen e poeiena, ‘E niga koruna, alö a tson pepeito kap hamana na lö u kato hanigan töani a toukui i tamölö. Alö u tara kap haniga koruni a matsi topisa koru a mats ka, na lia e hataratara kap tala nagi lö a mamanaka a pannen. Tasu hongo tala uu tara nisasaala tara katuun pan i tamölö.’

²⁴ “Ba tson pepeito kap te lui a töa a talen moni e la nama memi poeiena, ‘O tsunono, alia i atei sil alö a katunun hakhakui hatagala koru, kaba lö e roron lu noa hasem a hihol tara toukui tara tana katuun. ²⁵ Alia u matout ba lia ena hamouse gia a

moni i tamölö turu tsiktsiki. Tara! A moni i tamölö teka.’ ²⁶ Ba katuun pan i tanen e poeiena, ‘Alö a tson pepeito kap a omi na karous! Alö e poeiem alia ema kui gi kaba lia e roron luegou a hihol tara toukui tara tana katuun?’ ²⁷ Ga lö go mala haka taleia a moni i tar tara beng, ba lia te tatei lu pouts gono megien ta taina ta moni tara pöata tego kopis pouts malia.’

²⁸ “Ba nonei e poeiena tara palair u katunun kui i tanen, ‘Luba nami a moni bate halemi a katuun te ka mena a maloto a talen moni. ²⁹ Taraha, a katuun te kamena a huhua tara toukui i tanen e hala hase roi a maroro tego kui menaien a huhua i tanen, ba nonei te kamenou a mamanaka a parpara. Kaba a katuun te möa ta huhua tara toukui i tanen e luba naroi a mats ka pinopino te ka menen. ³⁰ Bate lapo ba naroa ielesala turu kuhil. Tara makum tena tabe hohomi koru ria romana u katuun bate kutu hakarkarangaker a liho ren.’ ”

U kout tere Sunahan

³¹ Be Iesu e ranga lenina me poeiena, “Alia tu butun Katunuma e la guma romana bate heregi a king, u angelo hoboto e la gono has meri mou lia romana. Na nonei a pöata teka, alia e gum goa turu gumgum u göagono i tar. ³² U katuun hoboto e gono hoboto ria romana i matar. Ba lia te lu kaakata ragen romana te kato uana a katunun taratarakap te lu kaakata rena u sipsip na u meme. ³³ Ba lia te haka ragia romana u sipsip tara pal matou i tar na u meme tara pal keruka i tar.

³⁴ “Ba lia te ranga merakou u katuun tara pal matou i tar, ‘U katuun te kato hasasaaler

e Tamar, lamuma batemi luemiou a Nipepeito ti kato taatago berai limiou i manasa noa te habuteia e Sunahan a mamananaka. ³⁵ Taraha, alia u bes ba limiou e hale milia a tsi kannou. Na lia u maka ba limiou e haue moulia. Na lia a katununa tara tana han ba limiou e lu mena milia i luma i tamilimiou. ³⁶ Alia u möa tu hasobö ba limiou e hale mi lia u hasobö. Na lia u kamei a siki ba limiou e taguhe moulia. Alia u kaia tara karabus ba limiou emi tare moulia.’

³⁷ “Ba u katuun u matskö te poeier romana i tar, ‘O Tsunono, i hangisa ti tareia lam ti bes uu lö ba lam e hale mi lö a kannou? Na i hangisa ti tareia lam ti maka u lö ba lam e haue mölö? ³⁸ Na tara saha pöata tu tareia lam alö a katununa tara tana han ba lam e lu mena milö i luma i tamulam? Na tara saha pöata tu tareia lam alö i möa tu hasobö ba lam e hale mi lö u hasobö? ³⁹ Na i hangisa ti tareia lam ti siki ialö tsi ti kaia lö tara karabus ba lam ena tare mölö?’

⁴⁰ “Ba lia te ranga palis ragouen bate peigou i taren, ‘Na lia e hatei hamana koru ragou limiou, tu katoe mia limiou a markato teka ta töa tara man hahatoulana i tar, alimiou u kato be mien lia.’

⁴¹ “Ba lia te ranga meragou u katuun tara pal keruka i tar, ‘U katuun te hamalir e Sunahan, laba nemou lia ba limiou te la uamiou turu tula te ka nitöana, ti kato hahaloso bei e Satan na u angelo i tanen. ⁴² Taraha, alia u bes ba limiou ema hale milia ta tsi kannou. Na lia u maka ba limiou ema haue milia ta tsi ramun. ⁴³ Na lia a katununa tara tana han, kaba limiou ema lu mena milia i luma i tamilimiou. Alia u möa tu hasobö ba limiou ema hale milia tu hasobö. Alia u siki ba limiou ema taguhe milia, na ti kaia lia tara karabus, alimiou ima tare milia.’

⁴⁴ “Ba nori te ranga palis meriou lia bate poeier i tar, ‘O Tsunono, i hangisa tu tareia lam tu bes uu lö na tu maka uu lö na tu katuun uu lö tara tana han ba lam ema taguhe mi lö? Tara saha pöata tu tareia lam ti möa ialö tu hasobö na ti siki ialö na ti kaia lö tara karabus ba lam ema taguhe mi lö?’ ⁴⁵ Ba lia te ranga palis meragouen bate peigou i taren, ‘Alia e hatei hamana koru ragou limiou, a pöata tu raman katoe mia limiou a markato teka ta töa tara man hahatoulana i tar, alimiou u raman kato be hase mien lia.’ ⁴⁶ Ti markato uaien teka ba u katuun teka tena lue riou u nihahuna te ka nitöana, ba u katuun u matskö tena lue riou a nitöatöa te ka nitöana.”

26

U katuun u kapan i ranga sil tegi atung hamate menaien e Iesu

(Mak 14:1-2, Luk 22:1-2, Jon 11:45-53)

¹⁻² A pöata te ranga hakapa naia e Iesu a manka teka, ba nonei e poeiena turu katunun tsitsilo i tanen, “Alimiou e atei miou, u huol u lan patu ba kannouna turu Paska turu Jiu te katoeier. Ba Lia tu butun Katunuma tena hala naroa turu katuun tena nila naria lia romana tara kuruse.” ³ Ba u pris pan na pal kapan turu Jiu ena gono hoboto ria tara luma a kapan tere Kaiapas, a tsunono pan turu pris. ⁴ Ba nori e korupakö ner tegi pile kap hamous menaien e Iesu bate atung hamatie ren. ⁵ Ba nori e poeier, “Ara ema tatei katoe rien tara pöata tara kannou, taraha u katuun e namots hiagetagetar.”

A tahol e kis naia u uapi u soksoka i bakuna e Iesu

(Mak 14:3-9, Jon 12:1-8)

⁶ E Iesu e kaia i Betani tara luma tere Saimon te ka mam mei a toba be niga poutsuna. ⁷ Ba töa tahol e la uanama tere Iesu, nonei e kamei a botolo uapi a soksoka haniga koru na hihol i tanen e la sei koruna. Ba nonei e kis nena u uapi i bakuna e Iesu tara pöata te nouien. ⁸ Pöata ti tareia u katunun tsitsilo i tanen a ka teka banori e raharaha korur me poeier, “A saha a ka te kato baba sileri u uapi? ⁹ Sanena u uapi teka tegi haholin, bate lueri ta moni ta para bate hala rari u katuun ti möa ta moni!” ¹⁰ E Iesu e atei sil a saha ka ti ranga naien ba nonei e poeiena i taren, “Aha te ngena sile milimiou a tahol teka? Nonei e katoe lala a ka a niga koru i tar. ¹¹ Alimiou e ka gonon töa mera mou u katuun te moar ta moni. Kaba lia ema tatei ka gonon töa mera goi limiou. ¹² Nonei e kis mam nelala u uapi i tuenreir, e kato mammam melaleien tegina kaho mei lia romana. ¹³ Na lia e hatei hamana koru ragou limiou! Tara mamana han hoboto i puta tena hihatuts naria romana u Bulungana u Niga, nori ena hihatuts nariou a ka a niga te katoe lala a tahol teka, ba u katuun tena hakats kap nitöa narouen bate rarare ren romana.”

*E Judas e katsin harötein e Iesu turu pakö i tanen
(Mak 14:10-11, Luk 22:3-6)*

¹⁴⁻¹⁵ Ba töa i tamulam tara maloto na huol a katunun tsitsilo, ti ngöei e Judas Iskariot, e la uana turu pris pan ti korupaköni e Iesu mena poeiena, “Alimiou e hale moi lia aha ba lia te hatara ragoui limiou e Iesu?” Ba nori e hale rien u topisa u maloto tara moni a silva. ¹⁶ Ba nonei tara pöata

teka, e Judas e tanian sake hamanasena ta maroro tego haröto menaien e Iesu turu katuun teka.

A kannouna turu Paska

(Mak 14:12-21, Luk 22:7-14,21-23, Jon 13:21-30)

¹⁷ Turu lan tutuun tara kannou te noue ria a beret te möa ta is, ba u katunun tsitsilo i laua rima tere Iesu memi rangate ren, “Alö e ngilem alam go la u ime batena kato hamatskö bemi lö a kannouna turu Paska?” ¹⁸ Ba nonei e poeiena, “Alimiou go la uaiam tara töa tson e kana tara taun teka ba limiou tena hateie men, ‘A Tson Hihatuts e poe nama, A pöata i tar e sukusukuna. Alam na u katunun tsitsilo i tar ena noue moa a kannouna turu Paska i luma i tamölö.’” ¹⁹ Ba u katunun tsitsilo ena markato has uer te ranga mera leien e Iesu, tegina kato hamatskö mam menaien a kannouna turu Paska.

²⁰ A pöata te lahibong ma a ka e Iesu e gum gono mei a maloto na huol a katunun tsitsilo i tanen. ²¹ Ba tara pöata ti nouien be Iesu e poeiena i taren, “Alia e hatei hamana koru ragou limiou, a töa i tamilimiou e haröto nanao lia turu katuun ti korupakö neiou lia.” ²² Ba u katunun tsitsilo e toku korur me rangate ren, “O Tsunono, esi nonei? Alia romana?”

²³ Be Iesu e ranga palis ranen me poeiena, “A töa i tamilimiou te habu gono melalei lia a beret tara töa pelete, nonei tena haröto nanao lia turu katuun ti korupakö naiou lia. ²⁴ Alia tu butun Katunuma e mar mate uagou temar ranga uana u Buku u Göagono. Kaba a niomi pan e butuna romana tara katuun te haröto nanou lia turu katuun ti korupakö naiou lia. E niga bala nena a katuun teka egima mala posei.” ²⁵ Be Judas nonei

a katuun te haröto nanoi e poeiena, “O Tsunono, esi nonei? Alia romana?” Be Iesu e poeiena i tanen, “Alö peisa has te ranga namen.”

A Komunio tutuun

(Mak 14:22-26, Luk 22:15-20, 1 Korin 11:23-25)

²⁶ Tara pöata ti nouien be Iesu e luena a beret me haniga uana tere Sunahan ba nonei e posepose nen me hala ranei u katunun tsitsilo i tanen. Ba nonei e poeiena, “Lueiam ba limiou te nou miou. Nonei teka u tuenrei i tar.” ²⁷ Ba nonei e luena a kap uain me haniga uana tere Sunahan me hala ranen. Ba nonei e poeiena, “Alimiou hoboto go ua mia tara kap teka. ²⁸ Taraha, nonei u rahatsing i tar te kato hatagalenou u rangan kits tere Sunahan na te takis bera nou u katunou u parpara bate luba nanou a markato a omi i taren. ²⁹ Na lia e hatei ragou limiou, alia ema tatei ua lele goi romana u uain teka e antunana tara pöata tena ua gono mera goa lia limiou u uain u tsimus tara Nipepeito tere Tamar.” ³⁰ Ba i murina pöata ti kömeien u köman lotu, ba nori e la uar turu Pokus tara Ruein Olip.

E Iesu e hatei mamin tego holis uu e Pita

(Mak 14:27-31, Luk 22:31-34, Jon 13:36-38)

³¹ Be Iesu e poeiena i taren, “Alimiou hoboto e matout mou bate laba namou lia i bong teka. Taraha, e Sunahan e mar ranga uu teka turu Buku u Göagono:

‘Alia e atung hamate gou romana a katunun taratarakap

ba heis sipsip te bus kalakalar romana.’

³² “Kaba i murina te hatakei poutse noa e Sunahan alia tara tou mate i tar, balia te mam ragou limiou i

Galili.” ³³ Be Pita e rangana me poeiena i tanen, “U katuun hoboto teka e laba nariou lö romana, kaba lia ema antunan laba nagilö romana!” ³⁴ Be Iesu e poeiena tere Pita, “Alia e hatei hamana korue goulö, i mam te kekeretskö noa a keriou a tson i bong teka, balö te holis namou tego atei sil menai lö alia tara topisa a pöata.” ³⁵ Be Pita e poeiena i tanen, “Noahasina te mate gono megoa lia alö, alia ema antunan holis kap koru nagilö romana.” Ba u katunun tsitsilo hoboto e mar ranga has uer iesana.

*E Iesu e singo uu tere Sunahan i Getsemani
(Mak 14:32-42, Luk 22:39-46)*

³⁶ Be Iesu e la gono mera nen tara töa makum te ngöeri i Getsemani, ba nonei e poeiena i taren, “Gum mia teka balia te la uagu ili bate na singo gia tere Sunahan.” ³⁷ Ba nonei e la meraiena ere Pita mera huol pien tson tere Sebedi, a torinen e tiama koru me taatagi koruna. ³⁸ Ba nonei e poeiena i taren, “A peisar e tiama koru mena a nitaatagi pan. Kaka mia teka ba limiou te kalkalata gono memou lia.”

³⁹ Ba nonei e gamon lana me tuhalakopo nena turu tsiktsiki me singona, “O Tamar, tego antuna ialö, balö te hatongo kap bane milia a kamits teka te katsin butuna i tar. Kaba alö goma kato uai turu ngil i tar. Alö go markato uu turu ngil i tamölö.” ⁴⁰ Ba nonei e la pouts uana tara topisa katunun tsitsilo i tanen mena sabe ranen ba nori te sohor. Ba nonei e poeiena i taren, “Pua! Alimiou ema antunan kalata gono koru las memi lia tara töa puku a aua? ⁴¹ Alimiou go tara kap iam bate singo uamiou tere Sunahan. U hiamus u omi e

namots buturia i tamilimiou. A man namnamei i tamilimiou e ngilin kato nena a ka teka, kaba a tuenrei milimiou ema tagala nei.”

⁴² Be Iesu e la hahuol lenina mena singo uana tere Sunahan me poeiena, “O Tamar, tema antunan hatongo kap nami lö a kamits teka na tego sagoho koru menaien lia, balö te kato uem turu ngil i tamölö.” ⁴³ Ba nonei e la pouts uana turu katunun tsitsilo i tanen me sabe ranen ba nori te sohor, taraha nori i topi koru.

⁴⁴ Be Iesu e la lel ba ranen mena singo hatopisa uana tere Sunahan turu töa puku noahas u mar singo. ⁴⁵ Ba nonei e la pouts uana turu katunun tsitsilo i tanen me poeiena i taren, “Alimiou e soho noahas miou na e husa noahas miou? Hengoiam! A pöata e butu hakapa. Alia tu butun Katunuma e hala tala naria tara nitagala turu katuun u omi. ⁴⁶ Takei iam, ba ra te lara. Rötoiam, a katuun te haröto nanou lia turu katuun ti korupakö naiou lia e tuku hakapa.”

Nori i pile kapiin e Iesu

(Mak 14:43-50, Luk 22:47-53, Jon 18:3-12)

⁴⁷ A pöata te ranga noaia e Iesu, be Judas, a töa tara maloto na huol a katunun tsitsilo i tanen, te tukuna. Nonei e peigi rema u katuun u parpara koru ti söatema a man lahoton hiatatung na man baru. U pris pan turu lotu na pal kapan turu Jiu ti hala ramen. ⁴⁸ Na katuun tena harötein e Iesu e hala hakapa raien a ka temi katoe noen. Nonei e hatei hakapa mamir u katuun te peigi ramen me poeiena, “A katuun tena mutsi nagoa lia i abuabunen, nonei a katuun tena pile kap namou limiou.” ⁴⁹ Ema pina töa ii be Judas te tukuna me

la uana tere Iesu me poeiena, “A tsi bong, o Tson Hihatuts.” Be Judas e mutsi nanen i abuabunen.

⁵⁰ Be Iesu e poeiena i tanen, “Hahikapien, alö go kato a ka temi katoe mula lö.” Ba nori emi pile kakap naren. ⁵¹ Ba töa turu katuun ti ka gono mei e Iesu e lousena u lahoton hiatang i tanen me katsin atungena a katunun kukui puku tara tsunono pan turu pris ba nonei e ngats harus banena a talinganen. ⁵² Ba e Iesu e poeiena i tanen, “Haka poutsi u lahoton hiatang i tamölö tara makum i tanen. Taraha, a katuun te luenä u lahoton hiatang e atung hamate roi u lahoton hiatang. ⁵³ Tsi alö ma atei silemi alia e antunan rangategu e Tamar eni tuun ba nonei te hala nanama a maloto na huol tara man angelo te para bala rer u ami ba nori temi taguhe riou lia. ⁵⁴ Kaba tego markato u lia teka, ga ime temar mana uanou u raranga te kana turu Buku u Göagono? Taraha, u Buku u Göagono e poeiena nonei ega mar butu uu teka.”

⁵⁵ Be Iesu e poeiena turu katuun u parpara koru, “Alimiou e la memuma a man lahoton hiatang na man baru tegomi pile kap here memilia a katuun a hihatung na kopkop. Ga taraha, ba limiou tema pile kap nami lia turu mamana u lan ti ron hihatuts ialia iahana a Luman Lotu Pan. ⁵⁶ Kaba mamana hoboto teka e butu silena tego kato hamana menaien u raranga ti koloto naia u propet turu Buku u Göagono.” Ba u katunun tsitsilo hoboto i tanen e laba naren me busur.

*E Iesu e kaia turu Kout Pan turu Jiu
(Mak 14:53-65, Luk 22:54-55,63-71, Jon 18:13-14,19-24)*

⁵⁷ Ba u katuun ti pile kapiin e Iesu e la meren mena piou narien tere Kaiapas a tsunono pan turu pris ti gono hobotoia u tson ateira tara Lo na pal kapan. ⁵⁸ Kaba e Pita e kukutela e Iesu kaba nonei e tataala halehana ba raien me lan töa uana tara luma tara tsunono pan turu pris, ba nonei ena kana i pal matana a luma iahana ololo ti ololo hahisei a luma. Ba nonei e gum gono merena u tson pepeito kap tego tara kap menaien a saha ka tego butuia tere Iesu.

⁵⁹ Ba u pris pan na u katuun hoboto ti kaia turu Kout Pan e sakier ta maroro na tu mar gamo tegi kout mei e Iesu bate atung hamateier. ⁶⁰⁻⁶¹ U katuun u parpara ti lama batemi sake rien a man raranga man gamo, kaba a pal kapan ima sabeit ta töa ka tega omi ia i tanen. Ba huol a katuun e la uarima i mam memi poeier, “A katuun teka e pei, ‘Alia e antunan rura negu a luman singo tere Sunahan bate hatakei poutse gen turu topisa u lan.’”

⁶² Ba tsunono pan turu pris e tuoluna me poeiena tere Iesu, “Alö ema ranga palis memi aha? Gaha nonei te kout meri lö u katuun teka?”

⁶³ Kaba e Iesu e kakamoto ba nitöa raien. Ba tsunono e ranga lelina i tanen me poeiena, “Alia e rangate gia lö i matana e Sunahan, alö go hatei ramei lam, alö e Mesaia, a Pien Tson tere Sunahan?”

⁶⁴ Be Iesu e poeiena i tanen, “Alö peisa has te ranga namen. Na lia e hatei ragou limiou, i murina a pöata teka ba limiou te tare mou Lia tu butun Katunuma e gum goa tara pal matou tere Sunahan te tagala koruna, ba lia te la sila guma romana turu köasi i kolö.”

⁶⁵ Ba tsunono pan turu pris e raharaha koruna be kiise iena u hasobö i tanen me poeiena, “Nonei e katoe lala u rangan hahakus ba nonei e poeiena, nonei e kamena a nitsunono tere Sunahan. Ara ema tatei ngö lele rimeï ta katuun tega kout gono meien. Alimiou e hengo hakape mula u rangan hahakus i tanen. ⁶⁶ Ga ha te poemi limiou?” Ba nori e ranga palisir me poeier, “Nonei egi atung hamati!” ⁶⁷⁻⁶⁸ Ba nori e kahuseier a matanen me muke ren. Ba palai e tapale ren me poeier, “Bora! Tego Mesaia uu lö, balö te markato uem te kato uana a propet. Poa talei esi te muke lalou lö.”

E Pita e holisin tego atei sil menaien e Iesu

(Mak 14:66-72, Luk 22:56-62, Jon 18:15-18,25-27)

⁶⁹ E Pita e gum ia ielesala i pal matana luma. Ba töa taholun kui e la uanama i tanen memi poeiena, “Alö has i ka gono mei e Iesu a toun Galili.” ⁷⁰ Be Pita e holisna i matar u katuun hoboto me poeiena, “Alia ema atei silegi a ka te ranga nemölä.” ⁷¹ Ba pöata te lakasaïen bena kana tara ololo i rehina tamana, ba tana taholun kui e tare nen me poeiena turu katuun ti tuol ia i sulusuku, “A katuun teka e ka gono hasmei e Iesu a toun Nasaret.” ⁷² Be Pita e holis lenina me poeiena, “U mana hamanan töa iasa, alia ema atei silegi a katuun teka.” ⁷³ Ema pinai ba u katuun ti tuol ia i sulusuku e la uarima tere Pita memi poeier, “Alö has a töa katuun tere Iesu, taraha u ranga i tamölä e haröto nena tu la malö.” ⁷⁴ Be Pita e ranga homi nena a peisanen me poeiena, “E Sunahan e tatei hahune noulia tegoma ranga hamana uai lia. Alia ema atei silegi a katuun

teka!” Ba keriou e kekeretskö hamanasana. ⁷⁵ Be Pita e hakats pouts nena u raranga te hateien e Iesu, “I mamina te kekeretskö noa a keriou alö e holis topisa namou tego atei sil menai lö alia.” Ba nonei e lakasana mena tabe hohomi koru mena a nitaatagi pan koru.

27

*E Iesu i lu menai tere Pailat
(Mak 15:1, Luk 23:1-2, Jon 18:28-32)*

¹ Ba tara bongbong koru ba u pris pan na pal kapan hoboto has turu Jiu e hagum hoboto siler tegi koru pakö menaien e Iesu. ² Ba nori e kitse rien a tsien me la menarien tere Pailat a gamman.

*E Judas e mate hakapa
(Aposol 1:18-19)*

³ E Judas nonei a katuun te hala menai e Iesu turu katuun ti paköeien, nonei e tara marei ti hopö kap hamasana menaien e Iesu tega mate uen. Ba nonei e palisena u hakhakats i tanen me lu pouts mena nei u topisa u maloto a moni silva turu pris pan na tara pal kapan turu Jiu. ⁴ Ba nonei e poeiena, “Alia u kato a markato a omi koru ti hala menai lia a katuun tema kato homiei ta töa taka, ba nonei tena mate nou!” Ba nori e poeier, “Ema ka uanei i tamulam. A ka i tamölö pepeisa.” ⁵ Be Judas e lapo ba nena a moni tara Luman Lotu Pan me lana, ba nonei ena hakutena.

⁶ Ba u pris pan e luer a moni me poeier, “A moni teka a hihol te kato hamate meri a katuun. A Lo i tarara e hapiou nena a mar moni teka egima hakeia tara kolo tara Luman Lotu Pan.” ⁷ Ba nori e hagumur me kitser u ranga, ba nori ena

holeri a moni teka a makumun tsiktsiki ti kukuiei a tabeli, tegi kaho raia u katunura tara a man han i lehana. ⁸ Nonei te ngö sila beri a makum teka, “U Tsiktsikina turu Rahatsing” tara man pöata i romana.

⁹⁻¹⁰ Na u raranga tere propet Jeremaia na i man-asa e butu hamana talana, “Nori i lui u topisa u maloto a moni silva, a hihol ti haka bei u Jiu a katuun teka, ba nori ena hole rien a makum te kukuie ria a tabeli, temar ranga mei lia a Tsunono.”

*E Iesu e kaia turu kout tere Pailat a gamman
(Mak 15:2-5, Luk 23:3-5, Jon 18:33-38)*

¹¹ Be Iesu e tuolna i matana e Pailat a gamman be Pailat e rangate nen, “Alö a King turu Jiu?” Be Iesu e ranga palisinen, “Alö peisa has te ranga namen.” ¹² Kaba nonei ema ranga palisei u ranga ti kout meien u pris pan na pal kapan. ¹³ Be Pailat e poeiena i tanen, “Alö be hengo hasem u mamana u raranga te kout merilö u katuun teka?” ¹⁴ Kaba e Iesu ema ranga palis töa ii, be gamman e asingoto koruna.

*E Pailat e rangein e Iesu ga mate
(Mak 15:6-15, Luk 23:13-25, Jon 18:39–19:6)*

¹⁵ Turu mamanu hiningal tara pöata tara kannauna turu Paska, e Pailat e roron hapuresen a man töa man karabus, na u katuun peisa has ti ron poei a solora u katuun ti hapureser. ¹⁶ Na tara pöata teka a töa katuun a omi koru e kaia tara karabus ti atei sil u katuun, a solonen e Barabas. ¹⁷ Ba tara pöata ti gonogonoia u katuun, be Pailat e rangata ranen, “Alimiou e ngilemiou esi tegi hapureseia tara karabus, e Barabas tsi e Iesu te

ngöeri e Kristo?” ¹⁸ Nonei e atei sil a saha ka tina hala sileien e Iesu i tanen, taraha nori i hiomi.

¹⁹ Tara pöata te gum noaia e Pailat turu kout, ba tahol i tanen e hale neien u raranga me poeiena, “Alö goma katoei ta ka tara katuun teka. Alia e tare gulen turu sinasoho i tar i bong, balia e toku korugu. Taraha nonei e möa ta töa taka ta omi i tanen.”

²⁰ Ba u pris pan na pal kapan turu Jiu e hatagala korueier u hakats turu katuun me kitser u ranga tegi rangata menai e Pailat bate hapuresener e Barabas tara karabus bate hala menari e Iesu tara tou mate. ²¹ Be gamman e rangata lel ranen, “Esi tara huol a katuun teka te ngile milimiou tegi hapuresi?” Ba nori i poeier, “E Barabas!”

²² Be Pailat e rangata ranen me poeiena, “Ga saha ka te katoe gou lia tere Iesu te ngöeri e Kristo?” Ba nori hoboto e poeier, “Nila namia tara kuruse!” ²³ Be Pailat e poeiena, “E ha koruna? A saha ka omi te katoeien?” Ba nori e ku sei bala tuun len meier, “Nila namia tara kuruse!”

²⁴ E Pailat e atei sili nonei ema antunan kato len nai taka, na u katuun i taniaan hiagetageta hamanasa. Ba nonei e luena u ramun me galusena a limanen i matar u katuun hoboto, me poeiena, “Alia u möa ta ka ta omi tego ha atung hamate sil mei lia a katuun teka! A ka peisa i tamilimiou.”

²⁵ Ba u katuun hoboto e hatanganar me poeier, “A nihahuna tara tou mate i tanen e tatei la uana i tamulam na tara galapien i tamulam!”

²⁶ Be Pailat e purese bera neien e Barabas tara karabus. Ba nonei e halahus nena e Iesu me hala mena neien i taren tegina nila menaien tara kuruse.

*U soldia i hahakosia tere Iesu
(Mak 15:16-20, Jon 19:2-3)*

²⁷ Bu soldia tere Pailat e lu menari e Iesu tara luma tere gamman, ba u soldia hoboto emi gono hahise ren. ²⁸ Ba nori e hiser u hasobö i tanen me haseie rien u hasobö u rörö u ngahangaha te tara herei u hasobö tara king. ²⁹ Ba nori e hil haperperere ier a kolits a hihitoka me hasoge ren i bakuna e Iesu, ba nori e hapile rien a tsi ruei tara pal matou i tanen. Ba nori e hatukun ria i matanen me hahakosir me poeier, “Solosei iam a King turu Jiu!” ³⁰ Ba nori e kahuse ren, me luer a tsi ruei i tanen me obi narien i bakunen. ³¹ Pöata ti hahakos hakapaien tere Iesu, ba nori e his ba narien u hasobö u rörö ba nori e hasogo poutse rien u hasobö i tanen, me lakasa meren tegina nila menaien tara kuruse.

*E Iesu i nila naia tara kuruse
(Mak 15:21-32, Luk 23:26-43, Jon 19:17-27)*

³² Tara pöata ti laien, ba nori e sabeier a töa tsonuna i Sairini, a solonen e Saimon. Ba nori e hatöe rien a kuruse tere Iesu. ³³ Ba nori e la uer tara makum te ngöeri i Golgota, te poeiena “A Makum turu Lakö.” ³⁴ Tara makum teka ti katsin haueien e Iesu u uain ti sohaleien u meresin u mal koru. Ba nonei e ua torohane nen, me raman ua nanen.

³⁵ Ba nori e nila narien tara kuruse, me satu siler a man hasobö i tanen. ³⁶ Ba nori e gumur me pepeito kap naren. ³⁷ Ba nori e hopö naria u raranga ti kout meien e Iesu i bakuna a kuruse te poeiena: NONEI E IESU TEKA, A KING TURU JIU. ³⁸ Ba nori e nila has naria a huol a katuun a kopkop tara

man kuruse i rehina e Iesu, a töa tara pal matou na tai tara pal keruka.

³⁹⁻⁴⁰ Bu katuun ti hula laia i matanen e ranga hangisei ria tere Iesu me tsibtsibil ner a bakuren me poeier, “Alö a katuun te tatei rureiem a Luman Lotu Pan bate kui poutse men turu topisa u lan, taguhi a peisa mölö! Tego Pien Tson uu lö tere Sunahan, bara, koul talama tara kuruse!”

⁴¹⁻⁴² Ba u pris pan na u tson ateira tara Lo na pal kapan e markato has uar iesana ti ranga hangisei uen bate poeier, “Nonei e taguhu hanigeir a palair u katuun, gehana ba nonei tema antunan taguhu poutsenei a peisanen? Nonei a Kingina i Israel, Ga nonei ega koul ba tala nema a kuruse bara te hamane ren! ⁴³ Nonei e hamanana tere Sunahan ba nonei te poeiena nonei a Pien tson tere Sunahan. Bora, ge Sunahan ega ngil taleien bate taguhenen!” ⁴⁴ Bu katuun u kopkop ti nila gono meien e mar ranga hangisei has uar ti ranga uu a palaiier u katuun.

E Iesu e mate hakapa

(Mak 15:33-41, Luk 23:44-49, Jon 19:28-30)

⁴⁵ Ba tara gusuna söasa bu kuhil e kopo kap nena a han hoboto, me antunan töana tara topisa a aua. ⁴⁶ Ba tara 3 kilok be Iesu e ku hapanina me poeiena, “Eli, Eli, lama sabaktani?” E poeiena, “O Sunahan i tar, Sunahan i tar, alö e laba sile mulei lia aha?” ⁴⁷ Ba palair u katuun ti tuol ia i susuku e hengor me poeier, “A katuun teka e ngöeiena e Elaitsa!” ⁴⁸ Ba töa i taren e pita boroborona, mena hapötöe nei u spants u uain u melil, me hakei nen i runguna a tsi ruei, me hasoa nanen tere Iesu tego ua menaien. ⁴⁹ Ba palai e poeier, “Haka banaiam,

bara te tarera tega la uama e Elaitsa batemi taguhe nen!”

⁵⁰ Be Iesu e ku hapan lenina, ba nonei e hala banena u namnamei i tanen be matena. ⁵¹ Ba u labalaba pan te kuteia i Luman Lotu Pan e takiis katana iasa me la nitöana i puta. Bu tsiktsiki e tagasina, bu hatu e tapose kaakatana. ⁵² Bu kioun mate e takalata hobotor, ba para a katuun tere Sunahan ti mate e taker me töatöa poutsur. ⁵³ Ba i murina te takei poutsia e Iesu tara tou mate i tanen, ba nori e labaner u kiou me la uar i Jerusalem, bena butu ria turu katuun u parpara.

⁵⁴ Ba tsunono turu soldia na u soldia i tanen ti pepeito kapiin e Iesu e tarer a mamanaka te butu, na nun has, ba nori e matout korur me poeier, “U mana koru lahas nonei a Pien Tson hamana tere Sunahan!” ⁵⁵ U touhaliou u parpara ti kukutie ma e Iesu i Galili na ti taguhe men i tuol ma i lehana bate taratara kap has rima. ⁵⁶ Na i gusuren e Maria Matalina na e Maria e tsinana ere Jemis mere Josep, ne tsinana a galapien tson tere Sebedi ere Jemis mere Jon.

E Iesu i hongeia tara kiou

(Mak 15:42-47, Luk 23:50-56, Jon 19:38-42)

⁵⁷ Tara pöata te lahi ia a ka, ba töa katuun te kamei a moni a parpara koru e la nama, a solonen e Josep. Nonei a katununa i Arimatia, na nonei has a töa katunun tsitsilo tere Iesu. ⁵⁸ Ba nonei e la uana tere Pailat mena rangate neien u tuenrei tere Iesu. Be Pailat e haniga nena tega lu menai e Josep u tuenrei tere Iesu. ⁵⁹ Be Josep e lue nen, me pitse neien u labalaba u hiaka u tsimus na u gogoso nitöa. ⁶⁰ Mena hakeie nen tara kiou hamatskö

i tanen te hakaho naien turu lapo. Ba nonei e hategele tupe nei a matana kiou a töa hatu pan me lana. ⁶¹ E Maria Matalina na taina Maria i gum ia i hapalana a kiou, bate tara uar tara kiou.

U soldia i taratara kapiin a kiou

⁶² Ba turu hamahö, turu Lan u Göagono, ba u pris pan nu Parasi e lar mena gono ria tere Pailat. ⁶³ Ba nori e poeier, “O Tsunono, alam e hakats kap nem u raranga te kati e Iesu a katuun a gamogamo tara pöata te töatöa noa ien ba nonei e poeiena, ‘I murina u topisa u lan ba lia te takei pouts gou.’ ⁶⁴ Bora alö go halan tu raranga tegi taratara kap haniga menai a kioun mate e antunana turu hatopisana u lan, taraha u katunun tsitsilo i tanen ena mots larima bate kope ren batena poeier turu katuun, ‘Nonei e takei poutsia tara tou mate.’ Ba u gamo i taren tena karase nou u gamo mam.” ⁶⁵ Be Pailat e poeiena i taren, “Lu raiam u soldia batena taratara kap haniga nitöa ner a kiou.” ⁶⁶ Ba nori e lar, mena harokoto kap ner a hatun pilpili na tara kiou, ba nori e haka rer a palair u soldia tegi taratara kapiin a kiou.

28

*E Iesu e takei pouts ia tara tou mate i tanen
(Mak 16:1-10, Luk 24:1-12, Jon 20:1-10)*

¹ I murina te kapaia u Lan u Göagono, tara bong-bong koru turu Sanrei, be Maria Matalina na taina Maria e lar tegina tara menaien a kioun mate. ² Ba nun a tagala e songots gasina, taraha a angelo tara Tsunono e lama i Kolö me hategele ba nena a hatu, me gumna ielunen. ³ A matanen e alesala herei u

kanaha, na u hasobö i tanen e hiaka herei u köasi. ⁴Ba u soldia e matout korur ba nori e toltololor me hererari u katuun u mate.

⁵Ba angelo e poeiena tara touhaliou, “Alimiou goma tatei matoutmi. Alia e atei silegu alimiou e sake miou e Iesu ti nila naia tara kuruse. ⁶Nonei ema ka neia teka. Nonei e takei pouts lala tara tou mate i tanen, temar ranga noahas uaien. La muma batemi taremiou a makum te opöien. ⁷Bora alimiou go la boroboro mula batena hatei ramiou u katunun tsitsilo i tanen, ‘Nonei e takei pouts hakapaia tara tou mate, na nonei e la mam ranou limiou i Galili. Tena tare moien limiou.’ Hakats naiam a ka te ranga mera gulei lia limiou.”

⁸Ba nori e la boroboro ba tuun ner a kiou, nori i matout kaba i ka noahas mei a nisasaala pan, me piata tunur tina hatei meraien u katunun tsitsilo i tanen. ⁹Be Iesu e sabe ranen i maroro me hatsi bongbong ranen. Ba nori e la uarima i tanen, memi pile ria i mounen me hatsunone ren. ¹⁰Be Iesu e poeiena i taren, “Ma matoutmi. La iam batena ranga meramiou a man hahatoulana i tar bate la uar i Galili, nori ena tare roa lia ili.”

U hahatei turu soldia

¹¹Tara pöata ti la poutsia a touhaliou, ba a palair u soldia e la pouts uar tara taun mena hahatei rari u pris pan a manka hoboto te butu. ¹²⁻¹³Ba u pris pan e gono meraier u pal kapan me kitseier u ranga. Ba nori e hala rari u soldia a moni pan koru me poeier, “Alimiou egona mar ranga merami u katuun teka, ‘U katunun tsitsilo tere Iesu e la rima i bong memi koper u tuenrei i tanen tara pöata te soho mula lam.’ ¹⁴Na te hengo nanao a gamman a

ka teka, alam e tatei hale mien tu raranga tu niga, ba limiou te möa mou ta niomi.” ¹⁵ Ba u soldia e lueier a moni me katoer a ka ti ranga meraien tegi katoeien. Na nonei u raranga teka ti hatei rai u Jiu hoboto nonei tara pöata bate la nama na e hatei noahas naren i romana.

*E Iesu e butuia turu katunun tsitsilo i tanen
(Mak 16:14-18, Luk 24:36-49, Jon 20:19-23,
Aposol 1:6-8)*

¹⁶ Ba u töa u maloto na töa tara katunun tsitsilo e la uar turu pokus i Galili te hatei raien e Iesu tegi la uaien. ¹⁷ Ba nori e tareier e Iesu me hatsunone ren, kaba palai i tareien me hula hakatsir. ¹⁸ Be Iesu e la hasukusuku uama i taren me poeiena, “E Sunahan e halei lia a nitsunono hobotona i Kolö na i puta. ¹⁹ Bora, alimiou go la uaiam tara man hun katuun hoboto tara mamana han bate kato ramien u katunun tsitsilo i tar. Ba limiou te baptais ramen tara solona e Tamar na tara solor, a Pien Tson i tanen, na tara solo turu Namnamei u Göagono i tanen. ²⁰ Ba limiou te hatuts ramien tegi kukute menaien a mamanaka tu ranga merai lia limiou. Bate hakats namiou: alia e ka gono nitöa mera gou limiou e antunanoa tara kapakapana a pöata.”

U BULUNGANA U NIGA
The New Testament in the Halia Language of Papua
New Guinea
Nupela Testamen long tokples Halia long Niugini

copyright © 2020 Bible Society of Papua New Guinea and Wycliffe Bible Translators, Inc.

Language: Halia

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-08

PDF generated using Haiola and XeLaTeX on 11 Nov 2022 from source files dated 5 May 2022

03815460-d6a0-5a59-aa7b-2a4278f7e67d